

Suão Sesus soho wasaniha ziwatahaka

Suão Sesus tuk zinymyrykya. Taparaka Tsiaku iziky tazo tuk iwatsa piknutsa tahatõhõryk humo ziknasi-zokonaha, iwaze ustsya kytsa piknutsa nisbykyknaha. Sesus ziakzoze tazo zerekik ituk niukuru. Sesus tazo bo ziksizoze Deus hyrikoso ituk niapykyryk iwatahi papeu humo Sesus soho ziwatahaka iwatsahi katsa kino niwatihi tanymyryky.

Suão Sesus wasaniha soho ziwatahaka.

¹ Tapara mybarawy isuknihyize Sesus Kiristu my. Atahi koikny baktatu Deus. Inaro kino ana zuba — Deus harere baba zuba — hỹ. Tapara bjoikpe wytyk nizukni — Deus harere baba zuba — nikara. Atahi Deus tihi nikara. Deus koikny baktatu nikara. Iwa tapara nikara. ² Iwa tapara Deus koikny baktatu. Atahi — Deus harere baba zuba — niwatihi. Deus tuk atatu nikara hỹ. ³ Deus nanabyi nizukni ihumo hi. Nanabyi nizukninaha ituk tu nikara. ⁴ Tazikwy humo tsizubarẽna mykara. Tazikwy humo myzubaha myspitu tsimykaranaha. Myzubaha nisi-hyrinymyryky. Wasaniha ty hi sibo ziwatawyky. Hawa myzubaha amypubyriha bo iktsa mykaranaha iwa Sesus myzubaha nisi-hyrinymyryky. Sihyrinymyrẽtsa moziknaha. Atahi rika wata niy.

⁵ Rika miwa haeze pok maha zeka amypubyri mozik. Iwaha hi — Deus harere baba zuba — myzubaha bo nisi-hyrinymyryky iwatsahi ihumo sispirikporẽtsa moziknaha. Iwatsahi wasania ty ninyhyrinymyryknaha rika ty hopok my tawa. Myzubaha simysopyksapybyitsa nikaranaha. Asahi

wasani haty batu ziknakaranaha. Wasaniha ty — Deus harere baba zuba — nisihyrinymyryky, atahi rika ty pok maha tawata.

⁶ Aiba Deus maku myzubaha bo zipaha. Suão inarokota niy. ⁷ Deus sohotsa zumuze Sesus mybo ziwatawy. Sesus — Deus harere baba zubata — hỹ niy. Iwaze Sesus amy-pubyriha hyritywa kytsa bo ziwatawyky iwatsahi kytsa Deus harere bo hyỹ mykaranaha. ⁸ Suão byitatu — Deus harere baba zuba. — Isoho tsasohotsazubata nitsasoko. Ata soho hi ziwatawyky. Myzubaha pe nikara: ⁹ — Deus harere baba zubata hi mozumuze pahahyrinymyry. Mybarawy bo mynasikze myzubaha Deus harere ty mysihyrinymyry iharere amy-pubyriha hyritywa my — Suão niy.

¹⁰ Iwaze mybarawy bo inasik. Myzubaha bo zumu. Tapara mybarawy nizukni. Ata hi izumu. Iwaze mybarawy ezektsa ihumo batu sispirikpo. Tsimysapyrêta tu mybarawy ezektsa ihumo batu sispirikpo. ¹¹ Tatukytsa bo izumu. Sudeja ezektsa tatukytsa bo izumu. Asa kino niwatihi ihumo sispirikpo byitsa nikaranaha. ¹² Wastuhu ihumo sispirikporêta. Iwatahi ispe niy:

— O ikiahatsa Deus tuktsa tsimoziknaha. Kahumo tsimyspirikponahaze Deus tyryktsa tsimoziknaha. Deus hyrytsa tsimoziknaha — niy. ¹³ Deus hyrytsa niyziknaha. Aparakbaha wytykyryk ikny nipupurukuknaha. Kytsa wytykyryk niwatihi isty tyrykzuwy naha humo nipupurukuknaha. Kytsa aba ziknakaranaha iwatsahi sihyrytsa nipupurukuknaha. Deus hyrytsa meky watu. Deus ispe:

— O ikiahatsa kahyrytsa tsimoziknaha. Ikiahatsa Sesus harere bo hyỹ tsimykarannahaze ihumo ahaspirikporêta iwatsahi kahyrytsa tsimoziknaha — my. Iwa Deus tahyrytsa soho motsasoko.

¹⁴ — Deus harere baba zuba — mywata niyzik. Sesus Kiristu maku babata niyzik. Ata zuba Deus tse. Atahi mybo inasik. Mytuk zikzuruku niy. Kytsa tuk zik-napykyryk. Sesus Kiristu sihumo tsimypokzitsiarêta zik-nakara, nisitsumuêhĩ tsihikik tsimyzihikrêta wasania ty nisihyrinymyryky. Deus harere ty nisihyrinymyryky. Isoho tsimaha:

— O atahi imysapyrênikita ipunihikrênikita — tsimaha.

¹⁵ Suão Batista Sesus soho ziwatawyky iwatahi myzubaha bo hua nikara. Atahi:

— O Sesus imysapyrênikita. Utakta batu. Atahi tazikwy tsizubarêna my. Utakta batu. Kazikwy tsikaeni zuba. Uta kapurukbyizetu atakta koikny baktatu mykara. Tawahi koikny baktatu my.

¹⁶ Katsaktsa mysopyksapybyitsa tsimykaranaha. Sesus myzibiyituhukutu mymysapywyky. Katsaktsa mysopyksapybyitsa tsimykaranaha atahi myhumo tsimypokzitsiarêta my, iwatahi myzibiyituhukutu mymysapywyky hỹ.

¹⁷ Tubabatu Moises Deus harere ziwatahaka. Ana harere humo hyỹ tsimykaranahaze, wasani tsimaha, Moises niy. Sesusta mype niy:

— O ikiahatsa humo kamypokzitsiarêta. Ahasopyksapybyitsa tsikykaranaha iwaha humotu Deus ahahumo tsimypokzitsiukrêta.

Deus harere ty nisihyrinymyryky.

¹⁸ Ba aty tohi Deus iny. Ikatahi itse zuba ziny. Ata Deus ihumo tsimypokzitsiarêta. Atahi mybo inasikze, mytuk zikzuruku iwatahi Deus mybo ziwatawy — niy.

Suão Batista isoho nitsaso.

¹⁹ Iwaze kytsa Sudeja ezektsa taparaktsa ziknapamykysokonahatsa sistsumuêhĩtsa iwatsa Suão Batista bo kytsa nisipeha. Aty skaraba ikia Suão Batista pe taha. Iwaze Suão Batista bo zumunahaze asahi:

— Aty skaraba ikia. Tozeka ja ikia Deus zapehata. Tozeka ja usta ja. Katsa batu myhyrinymyry — nikaranaha. ²⁰ Iwaze Suão tihi:

— O batu. Utakta Deus humo kapehabyita atahi kytsa mymyokhyrykta — niy. Iwa nitsasoko.

²¹ Iwaze kytsa ipe niahazo:

— Aty skaraba ikia. Ikia hi sa Erias — niaha.

— Erias byitatu — niy.

— Ikia hi sa Deus sohokotsa — niaha. — Tubabatu Moises nitsaso Deus sohokotsa mozumu. Ikia hi sa isohokotsa — niaha.

Batu niy.

²² — Iwaze Suão pe niaha mypetykta aty skaraba ikia. Katsa mybo tytsasokta iwaze taparaktsa bo tsimaha. Hawa ikia soho mytsaty tsimykaranaha. Tsinymyry tsihikknaha — nikaranaha.

²³ Suão tihi:

— Utakta jerukbara eze hua mykara niy. Opykani mot-sasoko. Hawa Isaijas Deus sohokotsa tubabatu ziwatahaka atsatu mynakara. Deus harere tsiwabyziukunahaktsa. Iharere bo hyÿ tynakaranahaktsa kytsa mykara — niy. Iwa Suão niy.

²⁴⁻²⁵ Kytsa zumukunahatsa Suão pehatsitsa, Pariseutsa maha. Ipe niaha:

— Ikia Kiristu byitatu Erias byitatu. Deus sohokotsa byitatu tsiky. Iwatatu sa kytsa pihik ty tsimysiharasusuku — niaha.

²⁶⁻²⁷ Suão ispe niy:

— Utakta pihik ty kytsa mysiharasusuku. Usta ahatuk mykarata. Aba ikiahatsa batu ahany hÿ. Utakta Deus harere ty pahahyrinymyry. Abahi ata kino niwatihi pahahyrinymyry. Izikwyrënikita. Utakta tsikaeni zuba kahyrinymyrytatu. Atahi tsihyrinymyrëta hÿ utakta batu. Iwaze utakta ihumo kasikpybyrëta. Ipyryksuktsa

mysibokik zeka kasikpybyrëta mozik utakta iwabyita tu my. Atahi imysapyrënikita iwatahi utakta kasikpybyrëta — niy.

²⁸ Iwa Suão nitsasoko. Kytsa asahi ibo izumukunaha iwa nitsasoko. Betanija eze nisiharasusuku. Betanija koiknykta sak eze buburu Sorodão inarokoha.

Deus hozipyrykza wata izumu.

²⁹ Byi izokoroze iwaze Suão Sesus bo nikozo jokeryk inaukuru. Iwaze Suão kytsa pe niy:

— Iktsaziutahaktsa kytsa. Ta maku bo iktsaziutahaktsa. Atahi Deus izipehata. Ziknapamykysokonahatsa hozipyrykzatsa ziknasibakanaha kytsa sisopyksapybyitsa ziknakaranaha, sisapyzeken hozipyrykzatsa ziknasibakanaha. Iwaze Deus sisopyksapybyitsa nikaranaha nisiokzohik. Nawa ata kino mysapyzeken mohyrikosokda. Mysopyksapybyitsa tsimykaranaha atahi mysapyzeken mohyrikosokda. Hozipyrykzatsa watsa — Suão niy. Sesus soho iwa nitsasoko. ³⁰ Tapara isoho iktsasoko. Ahape iky: — Atahi izikwyrënikita ana hi iwaby niy. Uta batu. Kazikwy tsikaeni zuba. Utakta kapurukbyize atakta niwata tu atahi koikny baktatu. Tawahi mynapykyryk — iky. ³¹⁻³³ — Sesus tsimysapyrëta izikwy tisapyrëna. Taparaka batu kahyrinymyry. Aba kahyrinymyrëta. Tapara Sesus zikwy ty batu tyny. Jatu tu Deus zikpeha:

“Myzubaha tysiharasusu” niy ana humo hi zikpeha. Myzubaha pihik eze iksiharasusuku.

Deus zikpehaze tihi: “Atahi tsimysapyrëta izikwy tsizubarëna tsipiny” niy. Iwa tsipiny.

“Utakta kahyrikoso myzipeha. Kahyrikoso mynasik amyvodu wata mynasikke maku papyry bete inazok. Ata kino tsimysapyrëta izikwy tisapyrëna tsipiny. Atahi

pahatsumuẽhĩ. Atahi kahyrikoso pipehaze ahatuk my-napykyry hỹ” niy. Iwa Deus kabo nitsasoko. Zikpehaze iharere bo hyỹ iky — Suão niy. Kyze Suão nitsasokozo.

³⁴ — Iwaze jobo iktsa iky. Deus tahyrikoso amytudu wata inasikze iktsa iky. Amytudu Sesus papyry bete inazoze ikozo. Sesus Deus zipehata kahyrinymyrẽta. Iwatahi ahabo: “Sesus Deus tse babata tsimysapyrẽta izikwy tsizubarẽna”. Iwa ikiahatsa bo mykara — niy.

Tapara babatsa Sesus tuktsa.

³⁵ Iwaze Suão Batista Sesus bo nikozozo. Suão zinymyrykynahatsa petoktsa tuk niriktohoko. ³⁶ Iwaze Sesus ziharamuze.

— Iktsaziu tahaktsa — Suão niy. — Atahi Deus zipehata. Hozipyrykzatsa wata myzubaha pibezenaha. Sisopyk-sapybyitsa sapyzeken mohyrikosokda — niy.

³⁷ Niahatsahi Suão zinymyrykynahatsa iharere ziwaby-nahaze zerekiknaha. Sesus hapik niukurunaha. ³⁸ Sesus tasukpe bo uwok niyze sibo iktsa niy. Ispe niy:

— Amo sa kapik tsinakurunaha. Amy sa tsipiberikinaha — niy.

— O myhyrinymyrytsa haneze sa awanu sapy — petoktsa iapik niukurunahatsa nikaranaha.

³⁹ — Pany! Katuk tyzinyre — niy.

Iwaze Sesus hapik niukurunaha. Iwanu sapy bo zumukunaha. Tyk boze niy. Ibaze nidyhydyhykynaha. Ituk nipamykysokonaha. Ibaze tu zunubaiknaha.

⁴⁰ ãdere inarokota. Atahi Simaõ tsy niy. Suão ziwabyze Sesus hapik niukuru.

⁴¹ Kyze zokorobyi tu atsoko taziky bo niukuru. Zihobykze ipe niy:

— O kaziky Deus zipehata Kiristu tsinynaha. Atahi Deus bo mymyoktyhyrykta my — niy.

⁴²Iwaze taziky Sesus bo zioқтыhyryk. Izumuze Sesus ibo iktsaziu niy. Ipe niy:

— O ikia hi Simaõ Suão tse. Abaka mekytu anaro myzik. Sepas ty pinaroko. Sepas Peduru atsatu maha. Petok inarohota atsatu piwatawyky. Atahi harahare wata — mykara.

Sesus Piripi Natanieu iwa ahatsa nisipeha.

⁴³Iwaze izokoroze Sesus:

— Utakta Karireja bo moparak — niy.

⁴⁴Tapara jubyi tu Piripi ziberiki ipe niy:

— Aidykta katuk — niy. Piripi Betesaida ezekta niy. Anaeze Ædere Simaõ ahatsa zikzurukunaha Betesaida ezektsa niaha. Sesus Piripi zihobykze ipe:

— O katukta — niy.

Piripi hyñ niy. ⁴⁵Kyze Piripi Natanieu iberiki zihobykze. Ipe niy:

— O Natanieu katsaktsa Deus zipehata tsinynaha. Tubabatu Moises isoho ziwatahakata. Tapara Deus sohotsitsa niwatihi isoho ziwatahakanahatsa. Abaka tsinynaha. Sesus inarokota. Sosetse. Nasare ezekta — niy.

⁴⁶Niytahi Natanieu ipe niy:

— Anahi batu kanyhy niy. Tyzeka ja amy Nasare eze ja tisapyrëna — niy.

— Pany katuk iktsa tsimy! — Piripi niy.

⁴⁷Iwaze Sesus Natanieu bo nikozo. Izumuze Sesus kytsa pe niy:

— Iktsataha. Atahi mozumuku Isareu ezekta. Maku mospihikbatabyikita tsimysapyrëta — niy. Iwa Sesus Natanieu soho nitsaso.

⁴⁸Iwaze Natanieu Sesus pe niy:

— Haneze sa tsikny — niy.

— O tapara Piripi zaberiki, uta botu any, ikia umaha pukezi tsikdyhykyze anaeze any — Sesus niy.

⁴⁹ Natanieu ipe niy:

— O ikia Deus tse babata. Ikia Isareu ezekta tu abazubata tsimy — niy.

⁵⁰ — O ikia kahumo tsaspirikporêta. Tapara umaha pukezi tsikdyhykyze any tawy iwatahi kahumo tsaspirikporêta. Kazikwy hi abazuba bo iktsa tsimy. ⁵¹ Utakta maku babata iknasikta ahawata ikyzik, ikiahatsa bijoikpe zoksapare naha bo iktsa tsimy. Kyze tsipinyaha bijoikpe iknyktsa Deus tsumuêhĩtsa kabo nasik nasikiknaha. Iwaze neduk nedukuknaha. Ana hi tsipinyaha — Sesus niy.

2

Sesus mysukzawy bo niukuru.

¹⁻² Kyze petok zuruze Sesus mysukzawy bo niukuru. Mywanu horokwy myikaha Kanaã eze. Kanaã Karireja eze niy. Sesus je imyikaha bo niukuru. Sesus tuk zinymyrykynahatsa kino niwatihi imyikaha bo niukurunaha. Tapara zihitsa ispe niy:

— Pany! Kamyikaha bo tynaha — niy.

Yhỹ niaha. Iwaze simyikaha bo niaha. ³ Kyze duabohotsa tsik zikukunaha. Iwaze duabohotsa tsik nipykze Sesus je tihi tatse pe niy:

— Katse duabohotsa tsik nepykba — niy.

⁴ — Kaje amykzo byihuktsa. Abaka Deus zikwy piwatawy zeka batu wasani ziky — niy.

⁵ Niytatsahi zihitsa tsumuêhĩtsa pe niy:

— O kytsa katse ahape my zeka hyỹ tsimaha — niy.

⁶ Bytykareze tu pihik suk niapykyryk. Napetok napetok napetok pihik suk niy. Pihik suk morosuk ibuzoinikia zuba tsipomobyitsa. Sudeutsa tapara tahadisahakanaha tahatsyhyrypikiknaha. Bykyze tahatsyhyrypikikzonaha simypewytsa niwatihi nisiokipikiknaha. Siwahoro eze

pihiksuk tsizubarëna. ⁷ Iwaze Sesus zihitsa tsumuëhïtsa pe niy:

— Pihik ty susutaha! Pihiksuk tyzihareknahaktsa! — niy.

Hyÿ niaha.

— Pihik ty zak bo tu tyharektaha.

⁸ Iwaze pihik ty zihitsa bo nyny tsimaha — ispe niy.

Hyÿ niaha. Iwaze pihiksuk ty okok maraksu maraksu nikaranahaze iwaze zihitsa bo wabehyryk niy. ⁹ Pihik tu duabohotsa tsik niyzik. Zihitsa ziakpy. Zihitsa batu inyhy. Aty sa pihik duabohotsa tsik nizuknihik anahi batu inyhy. Sitsumuëhïtsa zuba zinymyrykynaha. Niytahi zihitsa tasukzakata pe niy:

¹⁰ — Taparaka kytsa bo duabohotsa tsik tisapyrëna situksa bo nyny ziknakaranaha. Bykyze tahasoroknahaze zuba duabohotsa tsik isapybara ty situksa bo nyny ziknakaranaha. Ikiakta batu. Aba zuba ikia duabohotsa tsik tisapyrëna tsipokzitsarëna mybo nyny tsiky — niy.

¹¹ Iwaze Sesus zinymyrynahatsa ihumo sispirikporëtsa.

— O atahi Deus zikwy ziwatawy — nikaranaha. Tapara Deus zikwy Kanaã ezektsa bo ziwatawyky. Kanaã Karireja eze niy. Anaeze hi Deus zikwy Sesus tuk niapykyryk niy.

¹² Niahatsahi Kaparanaũ hudikhudikwy bo niaha. Sesus, taje, tatukytsa, zinymyrykynahatsa ahatsa Kaparanaũ bo zumukunaha. Anaeze niapykyrykspyknaha.

Sesus Deus wahoro zubata bo zumu.

¹³ Kyze Sesus zinymyrykynahatsa tuk Serusarëhe bo niukuru. Sudeutsa myikaha bo pororo ziknakaranaha. Tubabatu Deus taparaksu Esito ekze mekybotu nisioktyhyryk ana bo hi mytsaty ziknakaranaha. Myikaha paskoa inarokoha niy. ¹⁴ Deus wahoro zubata isturupeze bo zumuze nitsuk. Anaeze kytsa sizubarëtsa bo nikozo. Wastuhutsa pikuzatsa ty, hozipyrykzatsa ty, amy tudutsa

ty iwatsa ty nisihuakaknaha. Utsa kytsa okyrysaro humo harape bo zihuakaknaha. Anaeze nidyhydyhyknaha. Kytsa inapupunahaze siokyrysaro ty zihuakzonaha. ¹⁵ Sihumo Sesus taokaniki. Pikuzatsa hwyk tsaziki ty tsizezerēna ty wabe niy. Kytsa ipokso zipobaiknaha. Aidy nitururuknaha. Kytsa tahapybyspyk niwakbaiknaha. Hwibihitsa nisitsihipetotokbaik. Okyrysaro tsizubarēna zitōbaik. ¹⁶ Sesus opykani huahua niy:

— Ahanamy ty ka wabehyryktaha! Ikiatsa kazo wahoro zubata eze ahanamy zozowy tsikzukninaha ba zikaha. Niwazubaktsa. Nabo pāotaha — niy.

¹⁷ Iwaze zinymyrykynahatsa ibo iktsa nikaranahaze mytsaty nikaranaha. Tubabatu Deus harere papeu humo ziwatahaka ana bo hi mytsaty nikaranaha.

— O Deus awahoro zubata kytsa ataeze hi simysapybyikitsa mykaranaha. Iwatahi taokaniki — niy. Iharere bo mytsaty nikaranaha.

¹⁸ Iwaze Sudeutsa taparaktsa Sesus pe niaha:

— Aty sa ape niy: “Kytsa Deus wahoro zubata eze tysiksiwyhiktsa!” Aty sa anaharere ape niaha. Deus zikwy ty mybo tsiwatawykta! Deus zikwy mybo tsiwatawy zeka wasani — niaha.

¹⁹ Sesus ispe niy:

— Ikiatsa Deus wahoro zubata tsipitsehepetotokbaiknaha zeka usta wahoro mektatu mozoknizo. Mek-tatu ezytyk mozoknizo. Harakykbyihi puru nahatuk tu pikymy hỹ — niy.

²⁰ — Batu ba niaha. Harakykbyihi puru nahatuk tu Deus wahoro zubata mektatu ba zikukni mybarapetu tsimy kara — niaha. — Mytukytsa tubabatu tawahoro nizuknikinaha, kuarēta seis niytyk tseheze zikymynaha. Paze harakykbyihi puru nahatukta zuba mektatu ba zikzuknizo — niaha.

²¹ Sesus harere humo batu sihyrinymyry. Iharere tsihokdahaŕena. Nitsasokoze wahoro tanury humo ziwatawyky. Inury wahoro wata niy. Mohyrikosokdaze petok puruze mynahyryzikpo mykara. Anahi ziwabyky-nahatsa batu sihyrinymyry. ²² Sesus nahyryzikpoze anaharere bo mytsaty nikaranaha. Iharere ty zinymyryky-nahatsa mytsaty nikaranaha. — Deus harere wasani my, hawa ha ty Sesus nitsasoko inury soho atsatu niy — nikaranaha. Iwaze iharere bo hyŷ nikaranaha ihumo sispirikporëtsa niyziknaha.

Sesus mywatu nimynyba.

²³ Sesus Serusarëhe eze tuze kytsa sizubarëtsa ihumo sispirikporëtsa moziknaha. Paskoa myikaha myze sizubarëtsa ihumo sispirikporëtsa moziknaha. Deus zikwy ty ituk iktsa nikaranahaze iwatsahi iharere bo hyŷ nikaranaha ihumo sispirikporëtsa niyziknaha. ²⁴ Sesus sibo tasoho ty batu watawy sihumo tsimytsatyharëta nikara. ²⁵ Kytsa mytsaty mykaranaha ana humo hi Sesus tsihyrinymyrëta. Sesus batu tyso:

— Hawa takta sa mytsaty my — my. Iwa batu tyso. Amy ty kytsa mytsaty mykaranaha humo tsihyrinymyrëta hŷ.

3

Nikodemus Sesus bo nikozone.

¹⁻² Unata eze Nikodemus inarokota Sesus bo zumu. Taparakta Pariseutsa Sudeutsa niy. Atahi unata wahoro hara bo nidoko. Atahi:

— O myhyrinymyrytsa! Ikia mopyktsa babata tsihyrinymyrëta. Deus zikwy ty kytsa bo tsipiwatawyky. Ikia zuba Deus harere bo hyŷ tsimykara iwatahi Deus zikwy ty mybo tsipiwatawyky. Iwaze katsa tsimytsasokonaha Deus ikia zapehaka tsimykarana — niy.

³ Sesus ipe niy:

— Tsiwabytotokta! Hawa haja motsasoko wasani my. Ikia kyripuruzo ahahabyizeka batu Deus tyryk zikyzyk. Deus tyryk tsimozik tsihikik zeka tsimypurukzokta — niy.

⁴ Iwaze Nikodemus hi:

— Hawa sa maku taypykta tu mopurukzo. Taje harakoke bo ba ziktsukzo — niy.

⁵ Niytahi Sesus ipezo niy:

— Hawa motsasoko wasani my. Maku pihik ikny nipurukze niy. Maku mopurukzoze Deus hyrikoso ituk mynapykyryk iwaze Deus tyryk mozik. Iwa mopurukzo zeka Deus tyryk mozik. ⁶ Tsikpuruknahaze myje ikny katsa myzotsa hyrytsa zuba tsimaha. Katsa tsimypupurukzonahaze Deus hyrikoso humo iwatsahi katsa Deus tyryk tsimoziknaha. ⁷ Iwatahi ape my:

“Tsimypupurukzonahakta” my. Iwaze ikia batu apyby Deus tyryk tsimozikta iwa abo motsasokoze mytsaty mytsaty byity tsimy. ⁸ Zopoktsa nabybykyknahaze hana ikny ja batu myhyrinymyry siakpyri zuba piwabynaha. Hana bo mokurunaha batu myhyrinymyry. Ba nabo myku zikaha. Atsawatu hawa Deus tyryk tsimozik batu ahyrinymyry, Deus hyrikoso kino zopoktsa waha nabybykyk my. Hana ikny ja batu myhyrinymyry. Hana bo ja batu myhyrinymyry. Katsa Deus hyrikoso humo ityryk tsimoziknaha iwa ahahyrinymyrëtsa zuba — niy.

⁹ Iwaze Nikodemus ipe niy:

— Hawa sa my. Aharere humo batu kahyrinymyry — niy.

¹⁰ Sesus niy:

— Ikiakta Isareu ezekta sihyrinymyrykytsa iwatatu sa batu ahyrinymyry. ¹¹ Amy ty inymyryky hi anahi motsasoko. Amy ty botu iwaby anahi zuba motsasoko. Tanyhyhi motsasoko. Ikiyahatsa kaharere batu ahakparawy — niy. ¹² — Ikiyahatsa Deus tyryktsa tsimoziknaha ana soho

hi motsasoko. Anahi motsasokoze kaharere humo batu yh̄y tsimaha. Kaharere bo hȳy tsimaha zeka hawa Deus tuk ahawahi tsimynapykyknaha anatyhi yh̄y tsimaha — my.

— Kaharere Deus tuk ahawahi tsimynapykyryknaha soho anatyhi hȳy tsimaha. Batu ahahyrinomyry mytsaty my. ¹³ Uta zuba bjoikpe ikny iknasik. Iwatahi kytsa bo motsasoko. Ziknynaha tahi kytsa bo motsasoko. Utakta Deus zikpehata ahawata ikyzik niy.

¹⁴ Tubabatu Moises pyryhyk hyrikoso barōse nizukni. Na pyryhyk hyrikoso hwi humo typu niy. Kytsa simy-itsapyrētsa pyryhyk hyrikoso bo iktsa nikaranahaze nizororokonaha. Atawahi utakta Deus zikpehata kytsa wata ikyzik iwaze kytsa iharapatawyhyta humo pikyriknaha. ¹⁵ Kytsa kaharere bo hȳy mykaranaha zeka kahumo sispirikporētsa maha. Kytsa kahumo mospirikponaha zeka Deus tuk tahawahi mynapykyryknaha. Kahumo sispirikporētsa Deus tuk tahawahi mynapyrykyknaha h̄y ¹⁶ Yh̄y, Deus mybarawy ezektsa humo tsimypokzitsiarēta. Nawatsa humo tsimypokzitsiarēta babata. Iwatahi tatse zipaha. Estuba zuba itse babata. Asaktsa kahumo mospirikponaha zeka Deus tuk mynapykyryknaha, ituk tahawahi mozurukunaha. Deus tuk mynapykyryknaha ba zikykbazonaha. ¹⁷ Deus tatse izipehaze myhumo iakyri byita. Ba kaeze ēryk zikahasapynaha. Iwatahi uta mozumuze kazo bo pahaoktyhyryk niy iwaze mybarawy ezektsa humo batu iakyri.

¹⁸ Aty Deus tse babata humo ispirikpo zeka Deus bo mymyoktyhyryk. Deus ihumo ba ziktaokani. Aty kaharere bo hȳy ahabyi zeka atahi Deus bo ba zikmyoktyhyryk Deus ihumo tsiakyriukrēta. ¹⁹ Deus tatse zuba zipaha. Sizubarētsa sisopyksapybyitsa tu nikaranaha nisiwatawyky. Wasani mykara nisiwatawyky. Atahi okoroze

ky wa. Myzubatsa ihumo batu siakparawy. Sisopyksapybyitsa nikaranaha iwatsahi ihumo batu siakparawy. Asahi miwa ha nizihikiknaha. Iwatsahi batu ihumo sispirikpo.

²⁰ Sizubarëtsa sisopyksapybyitsa tu nikaranaha ana humo hi kaharere bo batu yhȳ zikaha. Sisikpybyrëtsa ustsatsa kytsa humo. Asahi kytsa papatu nikaranaha, asaktsa sibo iktsa mykaranaha zeka sisikpybyrëtsa. Miwa Ezektsa watsa ustsatsa ba ziksinynaha. Iwa humo hi sisikpybyrëtsa.

²¹ Ustsatsa kytsa kaharere bo hȳ mykaranaha simysapyrëtsa, kahumo sispirikporëtsa iwatsahi tisapyrëna ty mykaranaha. Ihumo wasani mykaranaha ana humo hi kytsa sihyrinymyrëtsa. Iwororoha Ezektsa watsa ustsatsa mysynynaha batu sisikpyby — niy. Iwa Sesus Nikodemus tuk nipamykysoko.

Sesus Suão ahatsa.

²² Kyze Sesus tuk zinymyrykynahatsa ituk Sudeja bo niukurunaha. Anaeze niapykyrykspyk naha kytsa nisiharasusuku. ²³ Suão Batista niwatahi myzubaha nisiharasusuku. Eno eze. Eno Sarĩ pauk baze niy. Pihik tsizubarëna eze hi nisiharasusuku. ²⁴ Suão ihurukuhubyzetu myzubaha nisiharasusuku. Aiba tohi zuba kytsa sakyriukanikitsa hurukwy bo nitsahuruknaha.

²⁵ Suão Batista tuk zinymyrykynahatsa Sudeu zipehkanaha. Asahi:

— Aty sa wasanita nikaranaha Suão nisiharasusukuze ja nikaranaha. Sesus nisiharasusukuze ja. Aty sa wasani — nikaranaha. ²⁶ Iwatsahi Suão pe niaha:

— O myhyrinymyrtsa! Botua ikia amakta taba buburu tsiky. Mytuk maku nipykyrykspyk. Botua isoho ty mybo tsiktsasoko, Sesus my. Atahi myzubaha nisiharasusuku. Sizubarëtsa iapik mokurunaha. Ikia hapik ba ziktururuknaha — niaha.

²⁷ Iwaze Suão ispe niy:

— Ana humo hi kakurêta my. Deus zuba tazikwy ty myzubaha bo nyny my. Asaktsa Deus humo Sesus harere piwabytotokonaha asa bo hi izikwy ty sibo nyny my — niy.
²⁸ Botua ahabo iktsasoko.

— Utakta Kiristu byita atakta Deus zipehata my. Taharaze zuba zikpeha — niy. Iwaze isoho motsasoko.

²⁹ — Maku tasukzata tsakurêta my. Itukta kino niwathi ihumo tsakurêta. Tasukzata mokozeze itukta ihumo tsakurêta. Utakta itukta wata my. Myzubaha Sesus tuk mokurunaha, ana bo hi mokozeze kakurêta. Isukzata tukta wata my. ³⁰ Sesus zinymyrykynahatsitsa sizubarêtsa. Katuk zinymyrykynahatsa batu sizuba. Wasani my iwatahi kakurêta — my. Iwa Suão zinymyrykynahatsa pe niy.

Atahi bijoikpe iknykta inasik tsimysapyrêta.

³¹ Atahi bijoikpe iknykta tsimysapyrêta my. Ata zuba tispirikporêta. Mybarawy ezektsa batu. Aparakbahatsa tsikaeni zuba sihyrinymyryrêtsa maha. Mybarawy soho eziky ty zuba mopamykysokonaha. ³² Atakta bijoikpe iknykta ihyrinymyrênikita hỹ. Ata kino nikoze naha zuba motsasoko. Ziwaby naha zuba motsasoko. Batu sizuba iharere bo hyỹ mykaranaha. ³³ Kytsa iharere bo hyỹ mykaranahaze asahi — Deus tsimysapyrêta wasape mykara — mykaranaha ³⁴⁻³⁵ Deus tihi:

— Utakta katse Sesus pipehaka. Ihumo kamy-pokzitsiarêta. Kahyrikoso ituk tawahi mynapykyryk. Kahyrikoso hi izikwy kazikwy hi atsatu my. Ata kino wasaniha zuba natsasoko. Kahyrikoso humo zikwy tsizubarêna — niy.

³⁶ Iwaze aty Deus tse harere bo hyỹ mykara, atahi meky watu mozik, atahi tawahi Deus tuk mynapykyryk. Aty Deus tse harere bo yhỹ ahabyi zeka, atahi Deus tuk ba zikykyryk. Deus ihumo takyri, iharere bo yhỹ

ahahabyizeka iwatahi ihumo Deus takyri. Atahi Deus tuk batu tawahi mynapykyk niy, sinini ykarawy bo myzipaha.

4

Sesus Samarija ezektatsa tuk nipamykysoko.

¹ Kyze Sesus niukuru Sudeja bo Pariseutsa pokso ni-parak. Tapara kytsa Pariseutsa pe niaha:

— O kytsa Sesus hapik sizubarëtsa. Atahi kytsa sizubarëtsa nisiharasusuku. Suão Batista tuk zinymyry-nahatsa batu sizuba maha — mybarapetu nikaranaha.

² Sesus kytsa batu isty harasusu. Zinymyrykynahatsa zuba kytsa nisiharasusuku naha. ³ Anahi Sesus ziwabyze Sudeja ikny ni-parak. Karireja bo ziksizo. Zinymyrykyna-hatsa ituk niukurunaha.

⁴ — Samarija bo koiknyktsa kytsa! — Sesus niy.

Yhÿ nikaranaha.

⁵ Niahatsahi Sikare myzubaha bo zumunaha. Tubabatu taparakta Sako nihyrikosokdaze tahudikhudikwy Sose bo nyny niy itse ziakse. Sose nihyrikosokdaze niwatihi it-sekokatsa tahudikhudikwy ziaksenaha. Sikare myzubaha baze tu nihyrikosokdata Sako hudikhudikwy niy. ⁶⁻⁸ Iwaze Sesus pihik zokowy bo izumu. Tapara Sako tykoke nizukn-inaha. Tokbaha niyzikikze Sesus iakubyrizumu tahi pihik zokowy baze nidyhyky. Zinymyrykynahatsa myzubaha bo niaha. Tahadisahawy bo nitururuknaha.

Iwaze wytyk Samarija ezektatsa nabo izumu. Pihik zotsata ni-paraktatsa Sesus zihobyk iwaze ipe niy:

— O kaboktsa pihik ty uta piku — niy.

⁹ — Batu ikiakta Sudeja ezekta hÿ. Ikza Samarija ezektatsa. Iwaze amo sa “Kabo pihik ty maraktyktsa” tsimykara — niy. Sudeutsaktsa ba Samarija ezektsa opowysuk eze ka ba zikunaha iwatatsahi hÿbyi nikara.

¹⁰ Sesus:

— O amy tisapyrëna zuba Deus abo nyny my hÿ. Ana humo hi ja tsahyrinymyrëtatsa “Kaboktsa pihik ty” botu ape icy — niy. Amy tsa ty hÿ zeka iwatahi Sesus niy. — Ikia batu kabo nyny tsimy. Tsikny zeka ikia kino “kabo ky pihik ty” tsimyze. Yhÿ my. Utakta Deus pihik baba ty abo nyny my. Ana tsipikuze mekywa tu tsimozik. Tsimyhyrikosokdaze tsinahyrikipoze, Deus baze awahi tsimynapykyryk — Sesus niy.

¹¹ Niytatsahi:

— O ikia sa batu apihikzowyky pihik zowy tsiokitsihizezerëna batu izowyky. Hawa sa pihik ty marak tsimy — niy. ¹² — Tubabatu mydiri nihyrikosokdata Sako tykoke ziuku. Iwatahi pihik atsaeze ky zikzikuku. Ihyrytsa niwatihi pihik zikzikukunaha. Siraratsa kino niwatihi pihik zikzikukunaha. Niytahi pihik hoke itsekokatsa ziaksenaha. Mybo nizapikso. Sako harere kytsa ziwabyziunaha. Maku abazubata niy, pihik zikuku. Hawa skaraba ikia hi ja abazubata — niy.

¹³ Niytahi Sesus ipe niy:

— Aty na pihik piku zeka tsiarupukrëtazo. ¹⁴ Uta pihik ty abo nyny maha tsipiku zeka ba iarapuruk zikzumuzo. Pihik mekywaha ty abo nyny my. Hawa pihik pupuputsa watsa pihik batu zepyk pihik ty abo nyny my zeka awahi tsimynapykyk iwatatsahi ba iarapuruk zikzumuzo. Ba zik-tsehezo pupuputsa watsa iwaze mekywa tu tsimyzuruku. Tsimyhyrikosokdaze tsimynahyrikipo iwaze awahi Deus tuk tsimynapykyryk — niy.

¹⁵ Ana ziwaby tatsahi:

— Ana pihik ty kabo nynyty ky niy. Iwaze ba karapuruk ziyk. Ana pihik ty kabo nyny tsimyzeka pihik ba zikzizozo — niy.

¹⁶ Niytahi:

— Abarikta kabo tyzioktyhyktsa! — niy.

¹⁷ — Batu ba. Ikza ba kabarikta ka — niy.

— Ikia wasape tsiky niy. Tsiktsasoze “Ikza batu kabarikta ka” wasape tsiky. ¹⁸ Ikia kytsa katsyhyrytsa watsa tu tsiksiakse. Abakta abariktabyitatu aktaba hã niy. Deus okzeka batu amysapy iwaze kape tsikyze:

“Ikza batu kabarikta ka” wasape tsiky — niy.

¹⁹ Iwaze ipe niy:

— Ikia Deus sohokotsa babata tsimy. ²⁰ Katsa tsimypamykysokonaha anaeze hara bete Deus pe “O ikia tsamysapyrêta” tsimykaranaha. Iwa mydiritsa nihyrikosokdanahatsa nimyhyrinymyrykynaha. Ikiahatsa Sudeutsa tsimypamykysokonaha, nabo Serusarêhe eze zuba Deus pe. “O ikia tsamysapyrêta” tsimykaranaha. Aty sa wasani mykara — niy. Iwa atatsa Sesus pe niy.

²¹ Niytahi:

— Aibani hara bete Deus bo batu tyso “O Deus myzo ikia zuba tsamysapyrêta” tsimaha. Serusarêhe eze Deus bo batu tyso.

“O Deus myzo ikia zuba tsamysapyrêta” tsimaha — niy.

²² — Ikiahatsa Samarija ezektsa tsimaha. Deus soho humo ahahyrinymyry byitsa tu ikiahatsa tihi:

“O Deus ikia tsamysapyrêta” tsimykaranaha. Ikiahatsa batu ihumo ahaspirikpo. Katsaktsa Sudeutsa tu. Ihumo myspirikporêtsa. Deus Sudeutsa nisinyky. Deus bo mymoktyhykta niyzik. ²³ Kyze abaka ikiahatsa Deus tyryktsa tsimoziknaha. Iharere bo hyÿ tsimykaranaha. Amy motsasoko anaty hi tsimykaranaha. Wasani tsimaha. Iwaze Deus ahahumo tsakurêta. Iwa tsimyzurukunaha zeka tsakurêta — Sesus niy. ²⁴ — Deus inurybyita ihyrikoso zuba my. Batu zinynaha. Kytsa Deus humo sakurêtsa maha zeka wasani mozurukunaha. Hawa wasani zuba motsasokonaha. “O Deus ikia zuba tsamysapyrêta mykaranaha” — niy.

²⁵ Kyze atatsa ipe niy:

— Deus myzipehata mywata mybarawy bo mynasik. Kiristu mozumuze ihumo myspirikporëtsa tsimoziknaha, atahi Deus bo mymyoktyhyryk niy. Ana humo hi kahyrinymyrëtsa — niy.

²⁶ — Uta hiba Deus zikpehata. Utakta abo mopamykysoko Deus zikpehata my — niy.

²⁷ Iwaze babatu zinymyrykynahatsa sidisahawy tuk zik-sikizonaha. Sesus atatsa tuk iktsa niahaze paikpa mytsaty nikaranaha. Batu tyso niaha — O Sesus amo sa ituk tsikpamykysoko. Hawa sa ituk tsiky kara — iwa batu tyso nikaranaha.

²⁸ Niytatsahi taopowysuk zerekik atsoko myzubaha bo niy. ²⁹ Myzubaha ezektsa pe niy:

— Pany. Maku bo ky niy. Atahi pihik zowy baze nidyhyky. Hawa ha ty ziknakara naha ty kabo nitsasoko. Kiristu Deus zipehata ja iky. Pany ibo ky — niy.

³⁰ Yhÿ nikaranaha. Iwatsahi myzubaha ezektsa Sesus bo zumukunaha.

³¹ Iwaze batu sibo zukbyize zinymyrykynahatsa hi:

— O myhyrinymyrytsa amy ty hauktykta — nikaranaha.

³² — O batu ba. Uta kino meky watu kadisahawy. Ahanyhybara — niy.

³³ Zinymyrykynahatsa asa zuba nipamykysokonaha:

— Aty kok idisahawy ibo zibykare nikaranaha. Mypap-
atu kok idisahawy ty ibo nyny niy — nikaranaha.

³⁴ Sesus ispe niy:

— Pikdisaha zeka kakurëta my — niy. — Atsawatu kazo harere bo yhÿ my zeka kakurëta babata mykara. Kazo zikpehatawy iharere humo yhÿ ikykaraze kakurëta. Iharere nihawatu my zeka kakurëta mykara kasoroktawa mokuru. ³⁵ Ikiyahatsa hi: “Napetok napetok nawaze byzoje morahaze kyze arostsá moakuknahaze. Mydisahawytá

mokymynahaze arosta tahazyzyknaha!” tsimaha. Iwa tsimytsasokonaha. Utakta ahape my: “O batu. Abatu nikymy”. Atsawatu mytsaty tsimykaranaha “O kytsa batu sizuba Sesus humo sispirikporêtsa maha” tsimaha. Ahape my. Iktsa tsimahaktsa! my. Kytsa asahi kaharere bo hyÿ mykaranaha kahumo sispirikporêtsa sibo iktsa tsimahaktsa! Abatu kahumo sispirikporêtsa maha. Ba byri hu tsimaha. Arosta moakuknahaze tsa watsa abatu kytsa kaharere bo hyÿ mykaranaha kahumo sispirikporêtsa maha — niy.

³⁶ — Maku siriktsa nisiparikik niy. Mektatu arosta nisizyzykyk niy. Kytsa petoktsa arosta humo sakurêtsa. Atsawatu maku kasoho motsasoko, mektatu kasoho humo mysihyrinymyry iwatsahi kytsa kahumo sispirikporêtsa, ana humo hi kytsa petoktsahatsa sakurêtsa. Iwatsahi kytsa kahumo sispirikporêtsa sakurêtsa hÿ. Asahi nahyrizikponahaze katuk tahawahi mynapykyryknaha ana humo hi sakurêtsa hÿ — Sesus niy.

³⁷ — Estuba maku atazuba mysiparik iwaze maku mektatu mysizozek mykaranaha. Wasani maha. ³⁸ Atsawatu estuba maku hi kasoho kino motsasoko mekta tu kytsa kahumo mysihyrinymyryknaha. Iwatsahi kytsa sizubarêtsa kahumo sispirikporêtsa. Kaharere tsimytsasokonaha zeka ana humo hi kytsa kaharere bo hyÿ mykaranaha. Kahumo sispirikporêtsa zeka mekywatsatu moziknaha. Utsa kytsa botu kasoho nitsasokonaha iwatsahi siharere humo kaharere bo hyÿ mykaranaha iwaze sispirikporêtsa moziknaha iwatsahi ahakurêtsa tsimaha — niy.

³⁹ Kyze Sikare ezektsa Sesus bo zumukunaha. Ihumo sispirikporêtsa. Atatsa harere ziwabynahaze Sesus harere bo hyÿ mykaranaha iwatsahi ihumo sispirikporêtsa moziknaha. Atatsa nitsasokoze:

— Hawa ha ty ziknakara naha ty kabo nitsasoko — atatsa harere ziwabynahaze. Iwatsahi Sesus humo sispirikporëtsa hỹ. ⁴⁰ Iwaze Samarija ezektsa zumukunahaze ipe niaha:

— Pany mywahoro bo paku tyny — nikaranaha. Yhỹ niy. Anaeze situk petok zurure.

⁴¹ Mektsatu ihumo sispirikporëtsa. Sibo nitsasokoze myzuba ihumo sispirikporëtsa. ⁴² Asakino atatsa pe niaha:

— Tapara katsaktsa Sesus bo hyỹ tsimaha ihumo myspirikporëtsa aharere humo tsikykaranaha. Abaka katsa ihumo myspirikporëtsa iharere humo. Atahi mybarawy ezektsa mysioktyhykta — nikaranaha. Iwa atatsa bo nipamykysokonaha.

Sesus taparakta tse zizororowy.

⁴³ Kyze petok zuruze Sesus Karireja bo ziksizo. Samarija ekzekta niparak Karireja bo niukuru. ⁴⁴ Tapara Sesus ziknatsasoko — O Deus sohokotsa tahudikhudikwy ezektsa okzeka iharere bo batu waby zikaha. Utsa kytsa iharere bo piwabyziukunaha, tahudikhudikwy ezektsa batu — Sesus niy:

⁴⁵ Kyze Sesus bo zumuze Karireja ezektsa Sesus humo sakurëtsa nikaranaha. Asahi Serusarëhe amyikaha bo niaha. Anaeze Sesus bo nikozonaha. Deus hyrikoso ituk mynapykyryk zinyanaha. Deus zikwy ituk zinyanaha. Iwatsahi sibo zumukuze sakurëtsa nikaranaha.

⁴⁶ Iwaze Kanaã bo ziksizo. Pihik duabohotsa tsik nizukni nahaeze, Kanaã Karireja eze tu niy. Kyze taparakta Kaparanaũ myzubaha ezekta Kanaã eze tu niy. Atahi:

— Katse tsimyitsapyrëta. Asiba zumuzata atahi Kaparanaũ eze nihoeke, asiba nira — niy. ⁴⁷ Iwaze kytsa taparakta pe niaha:

— Sesus izumu Sudeja iknykta. Karireja bo. Mybo izumu — niaha. Iwaze taparakta Sesus bo zumuze ipe niy:

— O Sesus tupakta kawahoro bo tsimy, katse moraka. Pany katse tyzizororowykta! — niy. ⁴⁸ Sesus ipe niy:

— Kytsa kahumo batu sispirikpo. Tapara Deus zikwy humo piwatawyky. Anabo hi iktsa mykaranahaze iwatsahi kaharere bo hyÿ maha iwaze kahumo sispirikporëtsa — Sesus niy.

⁴⁹ — O pany Sesus! Aidytykta, katse irabyitu — niy.

⁵⁰ — Tsiksizokta! Awahoro bo atse botu nizororo. Tsakurëta niyzik — Sesus niy.

Maku Sesus harere bo hyÿ nikara ihumo tispirikporëta nikara. Iwatahi tawahoro ziksikizo. ⁵¹ Atazuba tawahoro bo ziksikirize ske pukteze tu itsumuëhÿtsitsa zihobyknaha. Ipe niaha:

— Atse nizororo. Iwatahi tsakurëta — nikara.

⁵² — Katse sa nizororo haramwe haneze ja — niy.

— O jatu tokbaha eze atsoko jokboha niyzik. Abaka iakzobyita mopykyryk baba zizororo niy — niaha.

⁵³ Jatu kino haramwe tokbahaze Sesus tihi:

— Atse botu nizororo — niy. Iwa Sesus kape niy. Anabo hi mytsaty nikara. Iwatahi Sesus humo tispirikporëta niy. Iwahoro ezektsa kino niwatihi Sesus humo sispirikporëtsa niyziknaha.

⁵⁴ Iwahatu Sesus Deus zikwy ziwatawyky. Sizubarëtsa bo Deus zikwy ziwatawykyzo niy. Karireja ezektsa bo Deus zikwy ziwatawy. Sudeja ekze niparakze Deus zikwy petok ziwatawy niy.

5

Sesus ityryk niakbabata zizororowy.

¹ Iwaze Sesus Serusarëhe bo niukuru. Sudeutsa myikaha bo Serusarëhe bo zumuku. ²⁻³ Serusarëhe eze zarape waha eze niy. Zarape Betesda inarokoha

Sudeu harere niy. Betesda zarape waha eze Serusarêhe hokbowytsa baze niy. Hokbowy hozipyrykzatsa ty inapupukunaha inarokota zumubahani. Iwa katsyhyry watsa iwatsa hokbowytsa iwa niaha. Anaeze kytsa sizubarêtsa ziknakpykyryknaha. Simyitsapyrêtsa niaha. Sihyryzikubyitsa, siekbyritsa, sityryktsa niakbatsa, pãozikahabyitsa iwatsa anaeze ziknapykyryknaha. Sizubarêtsa ziknasisperyknaha. ⁴ Bjoikpe iknykta Deus tsumuêhîtsa pihik wastuhu ziknasikik. Pihik zikziksik pepepewyky. Pihik zikzitsikpepepewykyze kytsa pihik bo ziknautsotsokoknaha. Aty tapara ziknahazukukze zikzizorowoy ky.

⁵ Anaeze hi Sesus zumu. Maku bo iktsa niy. Atahi tubabatu tsimyitsapyrêta sinini ziknakara niy. Tirîta oito anos niytyk tseheze sinini ziknakara. ⁶ Sesus ibo iktsa niy. Tubabatu ziknahoekek ana humo hi tsihyrinymyrêta. Iwaze ibo iktsa niyze ipe niy:

— Ikia skaraba hawa tsimy tsimyzororo tsihikik sa — niy.

⁷ — Yhÿ niy. Myzororo ikykarazetu — niy. — Batu aty tohi katukta ziky. Batu aty tohi zikmokty pihik bo niy. Uta zuba zeka batu pihik bo ziksi. Iwatahi mektsatu katy haraze mykaranaha hÿ pihik bo. Utakta batu. Mektsatu zuba nazororoko naha — niy.

⁸ Iwaze Sesus ipe niy:

— O kyikytkta! Awanu ty kokpuhyktykta. Tsiksikta — niy.

⁹ Atsoko itarikto. Tawanu ty kokpuhyryk niy. Niparak niy. Tsakurêta nikara hÿ. Nawazuruze Sudeutsa byrywy zumuze hÿ nikara. ¹⁰ Iwatsahi Sudeutsa izororowyhyta pe niaha:

— Aba katsa Sudeutsa tsimymybyrykynaha niaha. Ikia tarabaja tsimykara. Wasanibara tsimy. Ikia awanu

tsipisik, iwatahi tarabaja tsimykara — niaha. Myhyrinymyrywy tihi:

— Mybyrywy pumuze batu tarabaja zikaha — niy.

¹¹ Iwaze izororowyhyta ispe niy:

— Zikzororowyta tihi kape niy: “Awanu ty kokpuhyryktykta tsiksikta” — niy.

¹² Niahatsahi ipe niaha:

— Aty skaraba ape. “Awanu ty kokpuhyktykta tsiksikta!” niy — niaha.

¹³ — Batu kanyhy. Inaro batu kawabyhy — niy. Kytsa batu ity nyzo. Kytsa sizubarëtsa anaeze niy. Iwatahi Sesus niparak. Iwatahi maku naro batu iwabyhy.

¹⁴ Kyze Sesus izororowyhyta. Deus wahoro zubata eze zihobyk. Ipe niy:

— Abaka ikia tsikzororo hỹ awatu ty. Tsimynamysapybyi zeka sinini tsimykara — niy.

¹⁵ Iwaze izororowyhyta Sudeutsa bo ziksizo ispe niy:

— Maku Sesus inaro atahi zikzororowy — niy.

¹⁶ Iwatsahi Sudeutsa Sesus nizokyrykynaha. Sesus maku zizororowy zuruze tahabyrykynaha ana humo hi tahakyrikinaha. Iwatsahi Sesus zimyjakaranaha.

¹⁷ Sesus ispe niy:

— Kazo tarabaja mynakara, batu pyk ziky. Uta kino niwatihi tarabaja mynakara — niy.

¹⁸ Iwaze Sudeutsa taparaktsa zibeze tsihikiknaha. Tapara maku zizororowy. Sudeutsa byrykywy eze tuze maku zizororowy. Bykyze nitsaso Deus kazo isopyk niy. Nitsasokoze Deus kazo my, tazikwy Deus zikwy atsatu my nikara. Iwatsahi ihumo tahakyrikinaha.

Aty sa Deus tse ipehawy.

¹⁹ Iwaze Sesus taparaktsa pe nitsasokozo:

— Hawa motsasoko wasi my. Deus tse babata my. Atazuba batu. Atazuba batu mykara. Hawa Deus mykara naha ty zuba mykara. Hawa Deus motsasoko naha atsatu motsaso. Kazo tsizubarêna mykara atsatu mykara pisopykzuku — niy.

²⁰ — Iwathu Deus kahumo tsimypokzitsiarêta. Tatse humo tsimypokzitsiarêta. Iwatahi hawa mykaraze tatse bo piwatawyky. Utakta ihumo myzisopykzuku. Nawa kasoho mytsaty mykara. Jaba maku ityryk niakbabata izororowy anabo hi iktsa tsikaha. Abahi kazo tsizubarêna kabo piwatawyky. Kabo piwatawyky zeka pahawatawyky. Ikiahatsa hi: “O tisapyrêna tsimaha.” Tsimypybynaha — niy.

²¹ — Kyze Deus siakbatsa mynasihyrikpobawy. Uta kino niwatihi. Kahumo itsihitsa mysihyrikpowyzo. Deus tse humo mynasihyrikpoba. ²² Deus mybarawy ezektsa bo batu tyso “O ikia wasani tsimykara. Usta pe batu amysapy tsimykara” my. Batu. Uta zuba mybarawy ezektsa pe: “Ikia wasani” mykara. Usta pe: “Ikia batu amysapy” mykara — iwa Deus harere kape niy.

— Ikia zuba mybarawy ezektsa soho tsipiwatawyky. Aty ja imysapybyikita tsimytsasoko. Aty tsimysapyrêta tsimytsasoko — niy. ²³ — Iwatsahi sizubarêtsa kasoho humo maha “O ikia Deus tse babata. Aharere tsipiwabynaha. Tsimyharerewabyrêta tsimy” maha. Asa kino niwatihi Deus harere piwabykynaha. Kaharere bo yhÿ ahabyi zeka kytsa okzeka Deus harere bo niwatihi batu yhÿ maha. Iharere kino batu ziwabykynaha. Atahi zikpehahik iharere siwabyhybyitsa hi batu ma zikaha — niy.

²⁴ — Amy sa motsasoko wasani my. Aty kaharere bo hyÿ mykara zeka meky watu mozik. Tawahi ispituzo Deus tuk mynapykyryk. Atahi zikpehakata humo tispirikporêta.

Iwatahi tawahi ispitu mynapykyryk. Deus batu tyso ipe. “O ikia batu amysapy. Sinini ykarawy bo tsimy” my. Iwa batu tyso, batu sinini ykarawy bo ba zipaha.²⁵ Amy wasani motsasoko. Utakta Deus tse. Abaka sizubarëtsa simysapybyitsa mykaranaha. Asahi kaharere piwabyziukunaha siakbatsa watsa maha. Abahi kaharere bo hyĩ maha zeka meky watu moziknaha. Kahumo sispitu tahawahi Deus tuk mynapykyryknaha.²⁶ Deus zuba mynasyhyrizikpo. Kazo kape tynasyhyrizikpo iwatahi uta kino niwatihi siakbatsa mynasyhyrizikpo.²⁷ Utakta kytsa wata Deus zikpehata. Deus humo kytsa pe my: “Ikia Deus okzeka wasani” mykara. Utsa kytsa pe: “Ikia batu amysapy” mykara. Deus harere humo iwa motsasoko.

²⁸ Batu paikpa mytsaty tsimykaranaha. Bykyze siakbatsa kaksoho piwabynaha. Kaksoho piwabynahaze tahaytyk ekze myzipunaha.²⁹ Asaktsa wasani ziknakanaha. Nahyryzikpobanahaze tahawahi Deus tuk mynapykyryknaha. Iwaze asaktsa batu simysapy ziknakanaha nahyryzikponaha kino niwatihi. Simysapybyitsa ziknakanaha mybara botu tahasapynaha. Tahawahi sinini mynakanaha. Deus bara botu zitahasapynaha Deus pokso tahawahi mynapykyryknaha. Batu siaku maha — niy.

Aty sa Sesus zipaha.

³⁰ — Motsasoko nahaka kaharere bara tu my.

Tapara kazo harere piwaby iwaze motsaso. Tapara kazo mykara bykyze atsatu mykara iwa mozihikik. Botu zikpehata kabo nitsasoko anahi motsasoko. Iwatahi kytsa pe my: “Ikiahatsa ahamysapyrëtsa.” Utsa kytsa pe: “Iki-ahatsa batu ahamysapy” mykara. Iwa motsasoze wasani mykara — niy.

³¹ — Utatu kasoho motsaso zeka batu sapy. Iharere batu wasani tsinakaranaha. ³² Iwa batu tyso. Usta kasoho motsasoko. Kazo kasoho motsasokoze iharere kino tisapyrëna hỹ iharere humo wasani mykara.

³³ Tubabatu ahatuktsa Suão Batista bo tsipehakanaha. Ata kino kasoho nitsasoko. Hawa ha nitsasoko wasape niy. ³⁴ Iwa Suão Batista kasoho ahabo nitsasoko. Utakta pahaoktyhyryk my, iwa Suão Batista kasoho nitsasoko. Iharere batu kasoho tsihikik ahabo zuba kasoho nitsasoko — Sesus niy.

³⁵ — Rika inapokze amypubyri mozik. Iwaze parakbaha mokozonehaha. Haneze miwa bo mokozonehaha. Suão Batista rika wata nikara. Deus harere nitsasoko. Iwaze Deus okzeka wasani ahahyrinymyrëtsa. Anahi Suão harere humo ahahyrinymyrëtsa.

³⁶ Hawa ha Suão nitsasoko tisapyrëna nikara. Hawa ha uta motsasozuiku tisapyrëna hỹ. Uta Deus zikpehata kytsa wata piwatawyky. Iwahatu kytsa kape maha:

“O azo mybo zapeha. Deus zikwy tsipiwatawyky” mykaranaha. ³⁷ Kazo zikpeha kino kasoho motsasoko. Ikiahatsa iharere batu ahawabyhy. Iwaze ihumo batu ahaspirikpo — niy.

³⁸ — Kazo mybarawy ezektsa bo zikpeha. Iharere bo tsikaeni zuba yhỹ tsimykaranaha. Kahumo batu ahaspirikpo tsihik iwatsahi iharere bo tsikaeni zuba yhỹ tsimykaranaha — niy. ³⁹ — Deus harere botu ziwatahanaha anaty hi tsipinymyryknaha. Ana humo ja Deus tuk mywahi tsinapykyryknaha ba zikaha. Deus kasoho motsasoko. ⁴⁰ Tsinahyrizikponahaze Deus tuk ahawahi tsimynapykyryknaha. Kahumo ahaspirikporëtsa. Iwa Deus papeu humo nitsasoko. Ikiahatsa kino kahumo batu ahaspirikpo iwatsahi tsinahyrizikponahaze Deus tuk ba

ahawahi tsipahasapynaha. Ikiahatsa kaharere bo batu yhÿ tsimaha.

⁴¹ Kytsa kasoho zuba motsasokonaha. Kasoho motsasokonaha zeka. “O atakta tsimysapyrêta my” maha. Mybarapetu sisopyk. Asahi kahumo tsikaeni zuba siakparawy “O atakta tsimysapyrêta maha” zeka mybarapetu mykaranaha. ⁴² Ikiahatsa Deus humo batu ahapokzitsi ana humo hi kahyrinymyrêta — niy. ⁴³ — Uta aparakbahatsa bo kazo harere humo my. Zikpeha iharere bo hyÿ ikykara. Ikiahatsa kahumo batu ahaspirikpo. Usta mozumu zeka ipehabyitatu taharere humo zuba mozumu, ikiahatsa iharere bo yhÿ tsimykaranaha.

⁴⁴ Deusta atababata zuba my. Batu ustaka. Ikiahatsa Deus ahape my: “O ahamysapyrêtsa tsimaha” anahi batu ahatsihik. Kytsa ahasoho motsasokonahaze “O ahamysapyrêtsa.” Anahi zuba ahakparawy. Iwatsahi kaharere bo batu yhÿ tsimykaranaha kahumo batu ahaspirikpo — niy.

⁴⁵ — Utakta kazo bo myze ikiahatsa soho batu tyso. “O batu simysapy maha” my. Ikiahatsa Moises nihyrikosokdata harere humo tsimyzurukunaha iwaze “O katsa wasani tsinakaranaha” tsimaha. Batu ba. ⁴⁶ Moises nihyrikosokdata kasoho ziwatahaka. Iwaha hi ikiahatsa iharere bo hyÿ tsinakaranaha zeka kaharere bo niwatihi hyÿ tsimynakaranaha. ⁴⁷ Iharere ziwatahaka naha bo yhÿ ahabyi zeka kaharere bo kino niwatihi ba hÿ tsimaha — niy.

Iwa Sesus Sudeutsa taparaktsa bo nitsasoko.

6

*Sesus sizubar*êtsa nisidisahawyky.

¹ Kyze Sesus pihik amakta taba zitsikza. Pihikzotsabyri Karireja inarokota niy. Usa inaro Tiberias niy. ² Kytsa

sizubarëtsa iapik niukurunaha. — O Sesus simyit-sapyrëtsa nisizororowyky. Ata bo hi iktsa tsimaha — nikananaha. Iwatsahi iapik niukurunaha.

³ Iwaze Sesus hara bo nido. Zinymyrykynahatsa tuk nidyhydyhykynaha. ⁴ Paskoa zumukunahatsa hi Sudeutsa myikaha niy. Paskoa inarokoha myikaha bo pororo ziknakaranaha. Hawa Deus taparaktsa nisitsumuëhikĩ anahumo mytsaty ziknakaranaha. ⁵ Iwaze Sesus aparakbaha inazuzuknahaze sibo iktsa nikara. Ëryktsa tu izumukunaha niy. Iwaze Sesus Piripi pe niy:

— Haneziky ty sa mydisahawy sizubarëtsa bo nataskyryk. Haneziky ty sa atsikara nataskyryk — niy.

⁶ Sesus ta zuba mytsaty nikara.

— Utakta mysidisahawy. Hawa Piripi mytsaty mykara ana humo hi pinymyryky. Tozeka ja kahumo tispirikporëta nikara iwatahi Piripi pe iky. “Haneziky ty sa mydisahawy nataskyryk” — niy.

⁷ Iwaze Piripi Sesus pe niy:

— Batu kahyrinymyry. Myokyrysaro byizeka ihuak bara ty ba zioknaha. Pibytutuhukutu mytyktseheze tarabaja my zeka batu atsikara ba zioknaha. Tarabajaziu mykara zeka ba zikpyk atsikara tsikaeni zuba aparakbaha bo nyny my — niy.

⁸ Iwaze Ædere zinymyrykyta Simaõ Peduru tsy tihi niy:

⁹ — O ta zito jabasta mybo izumu. Atahi mytshyry wa zuba atsikara, piknutsa petoktsa zuba aha niy. Myzubarëtsa mydisahawy panytu — niy.

¹⁰ Sesus ispe niy:

— Ikihatsa kytsa pe tsimaha “Tyk bo dyhy dyhy tahaktsa tsimaha” — niy. Nabo towahaditsa tisapyrëna. Kytsa

sizubarêtsa tadyhydyhynaha, Siko miutsa kytsa nidyyhydyhykynaha. Wytukyryk sihyrytsa ahatsa niwatihi nidyyhydyhykynaha. ¹¹Iwaze Sesus atsikara ty okok niyze Deus pe niy:

— Ikia humo ka mykurêtsa — niy. Iwaze atsikara ty zinymyrykynahatsa bo nyny niy. Nyny nikaraze tsizubarêna niyzikzik. Ibiakyrybarawa niukuru. Kytsa sizubarêtsa bo nyny nynyzo nikaranaha. Piknutsa kino niwatihi kytsa bo nyny nikaraze sibiakyhybyitsa wa niukurunaha. Nyny nikaraze tsizubarêtsa niyzikiknaha. Iwaze nyny nynyzo niy kytsa sizubarêtsa bo niy. Kyze kytsa tihi:

— O mysorokrêtsa tsikahasorokbyrynaha — niaha. ¹²Tahadisahabanahaze Sesus tuk zinymyrykynahatsa pe niy:

— Itsatsakyha ty jerehe peryk bo tsipupunahaktsa! Tsipupunaha zeka wasani my — niy.

¹³Iwaze itsatsakyhy ty arehe ty peryk bo zipupukunaha. Dose mytsyhyry tsawa peryktsa mysipyk naha wa Sesus atsikara ziubara piknutsa tsizubarêtsa nisiubara aha.

¹⁴Iwaze aparakbaha izikwy bo iktsa niahaze asa zuba nipamykysokonaha:

— Aty skaraba Sesus. Atahi kok tubabatu tsisperykynaha. Atahi Deus sohokotsa babata — nikaranaha.

¹⁵Iwatsahi Sesus zioqty tsihikiknaha. Ipe maha:

— Ikia mypehatsa tsimozik — maha. Sesus hawa mytsaty nikaranaha tsihyrinymyrêta. Iwatahi atazuba niparak. Hara bo nido niy.

Sesus pihik tsiksukpe buruk niukuru.

¹⁶Kyze zunubaze zinymyrykynahatsa pihikzotsabyri bo nisiknaha. ¹⁷Niahatsahi tsaraha sihezõni taeze

kokokorohyk niaha. Kaparanaũ bo pihikzotsabyri zik-tsikzakanahaze, miwa buruk tu asa zuba niukurunaha. Sesus batu sibo zuk niy. ¹⁸ Ziturikinahatsa tu atsoko zopoktsa inabybyknaha. Pihik zopoktsa humo atsoko iheridawy waha. ¹⁹ Turi turi turi nikaranaha. Nokponi turi nikaranaha. Siko kirometero ziturikinahaze. Kyze atsoko Sesus bo iksa niaha. Atahi sibo izumuku. Pihik tsiksukpe buruk inaukuru. Harazuk ahabyita inaukuru. Sibo izumubahanikize sipybyrëtsa nikaranaha.

— Aty skaraba — nikaranaha.

²⁰ Kyze Sesus ispe niy:

— Ahapyby byihuktsa — niy. Uta hiba Sesus ispe niy.

²¹ Iwatsahi Sesus pokso batu sipyby. Ipe niaha:

— Pany! Tsaraha bokta! — niaha. Atsoko tsaraha amykta taba niukurunaha bybyby niaha.

Kytsa sizubarëtsa Sesus ziberikinaha.

²² Iwaze kytsa sizubarëtsa asa kino pihik amykta taba nitarenaha Sesus ziberikinaha. Asa zuba nizapykyknaha Sesus sa hana bo. Jatuka tsaraha estuba zuba hÿ niaha. Zinymyryknahatsa tsaraha eze kokokorohyk niaha. Asa zuba koikny niukurunaha. Sesus situk batu ityny niy.

²³ Nipamykysokonahaze usts tsarahatsa bybyby niaha. Tsarahatsa Tiberias iknyktsa. Haneze Sesus kytsa nisidisahawyky naha bazebabatu tsarahatsa bybyby niaha.

²⁴ Iwaze Sesus bo batu zuk ituk zinymyryknahatsa kino batu niaha tsarahatsa tsihitsa kytsa pe niy:

— Sesus sa hana bo zinymyryknahatsa kino hana bo sa — niy.

— Pihikzotsabyri botu zitsikzanaha — niaha.

— Yhÿ. Tupakta! Katsa kino siapik tatsikza — niaha. Tsarahatsa eze kokokorohyk niaha. Turi turi turi. Kaparanaũ bo bybyby niaha. Sesus ziberikinaha iwatsahi pihikzotsabyri zitsikzanaha.

Sesus atsikara hyrity wa.

²⁵ Myzubaha iziberikinaha. Iwaze zihobyknahaze ipe niaha:

— O mypehatsa hawa eze sa tsikzumu. Katsa tsik-
aberikiknaha hỹ — nikaranaha.

²⁶ — Hawa motsasoko wasani my — Sesus niy.

— Ikiahatsa atsikara tsioknahatsawy tsimozikberiki-
naha. Ana iwatawy naha humo batu ahahyrinymyry —
niy. ²⁷ — Ahadisahawy bo zuba mytsaty tsinakaranaha
hỹ. Ahasorokrẽtsa tsikaha. Usa mydisahawy humo meky
watu tsimoziknaha. Ana ty kino hauk tsimaha zeka Deus
tyryktsa tsimoziknaha. Tsimyhyrikosokdanaha zeka Deus
myzahahyrikpowyzo iwaze ituk tsimynapykyryknaha.
Ahawahi Deus tuk tsinapykyryknaha. Utakta inasikta
ahawata ikyzik Deus hi kazo. Atahi:

“Kaharere bo hyỹ tsimykara. Iwatahi tadisahawy kino
kytsa bo nyny tsimykara” niy. Ikiahatsa kino niwatihi
Deus harere bo hyỹ tahaktsa — Sesus niy.

²⁸ Iwaze Sudeutsa ipe niaha:

— Hawa skaraba katsa Deus harere bo hyỹ
tsimykananaha hawa skaraba Deus mozihikik — niaha.

²⁹⁻³¹ Deus hi:

— Atahi ahabo ipehata humo tyspirikponahaktsa! —
niy. — Utakta Deus zikpehata. Kahumo tsimyspirikpon-
aha zeka Deus harere bo hyỹ tsimaha — Sesus niy. Kytsa
Sesus pe niaha:

— Taparaktsa myzotsa jerukbara eze atsikara waha ty
tahadisahanaha. Deus harere papeu humo ziwatahaka
“Moises bo nipamykysokoze atsikara waha kytsa bo inat-
suku. Atsikara waha bijoikpe ikny kytsa nisidisahawyky-
naha” — iwa Moises Deus zikwy sibo ziwatawyky.

— Ikia ja. Azikwy ty sa mybo tsiyawatawy tsimykarana. Iwaze zuba ahumo myspirikporêtsa tsimoziknaha — tsimykarana.

³² — Hawa utakta motsaso wasani my. Moises atsikara ty zuba kytsa bo nyny nikara. Ana atsikara morapa hwiwy zubaha niy. Kazo hi atsikara babata kytsa bo nyny mykara. Ana atsikara baba humo kytsa meky watu moziknaha. Deus tyryktsa moziknaha atsikara baba humo — niy. ³³ — Deus atsikara ty mybo nyny my bijoikpe iknyky. Utakta atsikara waha, uta hi bijoikpe iknykta. Uta kino kytsa kahumo meky watu moziknaha niy. Mynahyryzikponaha kahumo tahawahi Deus tuk mynapykyryknaha — niy.

³⁴ Kytsa ipe niaha:

— Anaty mybo nyny tykta! Ana hi mydisahawy mozik. Mydisahawy ty mybo nyny tynakara — nikarana.

³⁵ Sesus niy:

— Uta hiba atsikara baba niy. Deus myzubaha bo nyny mykara. Ikiahatsa kaharere bo hyĩ tsimykarana. Kahumo tsimyspirikponaha zeka ahakurêtsa tsimoziknaha iarapa byitawata tsakurêta. Ikiahatsa kahumo tsimyspirikponaha zeka ahapabyitsa watsa tsimoziknaha. Ahakurêtsa tsimykarana.

³⁶ Ikiahatsa kaharere bo batu yhyĩ tsimaha. Utakta kazikwy iwatawyky anabo hi tsinynaha. Iwa humo kabo batu yhyĩ zikaha. ³⁷ Aparakbaha kahumo mysispirikpoko ana hi kazo mozihikik. Iwatsahi kahumo sispirikporêtsa mykarana. Aty skaraba kahumo tispirikporêta atahi batu tyso “O ikia kahumo batu spirikpo, iwahi ba ziktsaso” — niy.

³⁸ — Utakta bijoikpe ikny iknasikze Deus harere bo zuba hyĩ mynakara. Hawa sa mozihikik naha humo batu yhyĩ iky iwa humo batu zuk. Atahi zikpeha iwatahi iharere

bo zuba hyĩ mykara. ³⁹ Hawa sa Deus mozihikik. Kytsa asahi kahumo mospirikponaha mysipokzitsiki. Iwatsahi kahumo sispirikporëtsa ba ziksiere. Mybarawy mopykze kahumo sispirikporëtsa mynahyryzikponahaze Deus tuk tahawahi mynapykyknaha.

⁴⁰ Yhĩ kazo harere bo mykara. Aty skaraba katse harere bo hyĩ mykaranaha asahi ituk tahawahi mynapykyryknaha. Mybarawy mopykze kahumo ituk mynahyryzikponaha. Ana kino Deus harere bo my hĩ — Sesus niy.

⁴¹ Kyze Sudeutsa asa zuba isoho zisapybyrikinaha. Nitasokoze:

— Uta hiba atsikara waha, uta hiba bijoikpe iknykta nikara — ana humo hi zisapybyrikinaha.

⁴² — Iwatsahi nikaranaha hawa skaraba. O atahi sa Sesus zuba. Sose tse sa nikaranaha. Ije niwatihi tsiny-naha. Hawaha ta sa “Utakta bijoikpe iknykta” nikara. Atahi mybarapetu nikara — nikaranaha. Iwa asa zuba zisapybyrikinaha.

⁴³ Iwaze Sesus ispe niy:

— Awatutahaktsa ahamysapybyrihuktsa! — niy.

⁴⁴ Kazo zikwy humo zuba kytsa kahumo sispirikporëtsa. Ata kino zikpeha iwaze kytsa kahumo mysispirikpoko. Mybarawy mopykze asahi mynasihyryzikpo iwa Deus tuk tahawahi mynapykyryknaha.

⁴⁵ Tubabatu Deus sohokotsa iharere papeu humo ziwatahakanaha:

— Aparakbaha Deus mysihyrynymyryky — niy. Iharere hi kasoho my. Kytsa kahumo mospirikponaha zeka ana kino Deus kazo ihyrynymyrywy. Ana humo hi mysihyrynymyryky. ⁴⁶ Batu aty tohi Deus ityny my. Uta zuba iny atahi zikpeha.

⁴⁷ Motsasoko wasani my. Aty skaraba kahumo tispirik-porêta atahi mynahyrizikpoze Deus tuk tawahi my-napykyryk niy. ⁴⁸ Sesus tihi:

— Utakta atsikara baba my. Kahumo kytsa meky watu mozurukunaha. Deus tyryktsa moziknaha. Kahumo simysapyrêtsa moziknaha.

⁴⁹ Taparaktsa ahazotsa niakbakanahatsa jeruk bara eze atsikara waha ziokoknaha. Iwatsa tu niakbakanaha. ⁵⁰ Aba atsikara baba soho ahabo motsasoko. Ana ty tsimymydisahanaha zeka ba zikumuzanaha ana hi bijoikpe iknykyry. Deus tuk mywahi tsimynapykyryknaha — niy.

⁵¹ Utakta hi bijoikpe iknykta my. Mybarawy ezektsa bo iknasik. Myzubaha mekywatsatu ziyziknaha iky. Kytsa kahumo sispirikporêtsa mohyrikosokdanahaze Deus tuk tahawahi mynapykyryknaha. Atsikara ty sibo nyny my ana hi katsani. Katsani ty mybarawy ezektsa bo nyny my. Iwatsahi mynahyrizikponaha asahi Deus tuk tahawahi mynapykyryknaha.

⁵² Iwaze Sudeutsa asa zuba nipamykysokonaha.

— Hawa skaraba Sesus tatsani ty mybo nyny my. Hawa skaraba inury taboro — nikaranaha.

⁵³ Sesus ispe niy:

— Hawa motsasoko wasani mykara. Utakta Deus zikpe-hata ahawata ikyzik. Ikiahatsa katsani ty hauk ahabyizeka batu Deus tyryktsa zikyziknaha. Batu meky watu zikyziknaha. Ikiahatsa kaspu ty tsõ ahahabyizeka batu Deus tyryktsa zikyziknaha. Batu meky watu zikyziknaha.

⁵⁴ Aty katsani pihauk zeka Deus tyryk mozik. Meky-watu mozuruku. Aty kaspu piku zeka Deus tyryk mozik. Mekywatu mozuruku. Tsimysapyrêta mozik. Mybarawy mopykze mynahyrizikpo. ⁵⁵ Iwatahi katsani mydisahawy baba my. Kaspu mypowy baba my. ⁵⁶ Aty katsani ty

tadisaha zeka atahi katuk mynapykyryk. Aty kaspu piku zeka atahi katuk mynapykyryk. Kahyrikoso zikwy situk mozuruku. Uta kino situk niwatihi mozuruku — niy.

⁵⁷ — Kazo humo myspitu tsinakaranaha. Uta zikpehata kazo humo kaspitu. Kazo mozikyrizikpozo my. Atsatu kytsa asahi katsani ty tahadisahakanahaze nasihyryzikpo — Sesus niy.

⁵⁸ — Utahi atsikara baba bijoikpe iknykta inasik niy. Tubabatu taparaktsa niakbakanahatsa atsikara waha ty ziknatahadisahakanaha. Atsikara waha bijoikpe ikny inatsukunaha. Aparakbaha atsikara tisapyrëna ty tahadisahakanaha asahi niakbabaiknaha. Utakta atsikara wata. Uta bijoikpe iknykta iknasik. Kytsa katsani ty tahadisahakanaha zeka Deus tuk tahawahi mynapykyryknaha — niy.

⁵⁹ Iwa Sesus Sudeutsa zinymyrykynahatsa wahoro eze nisihyrynymyryky. Kaparanaũ eze nikara.

Hawa katsa Deus tuk mywahi tsimynapykyknaha.

⁶⁰ Kyze kytsa Sesus tuktsa iharere ziwabykynahaze betsakze nikaranaha. Asa tihi:

— O iharere batu mykparawy. Iharere tsihokdahařëna hỹ. Batu aty tohi yhỹ my — nikaranaha.

⁶¹ Upyk harere ahabyitsa tu iwatatu Sesus tsihyrynymyrëta nikara. Imyspirikpowy soho humo taokanikinaha. Iwaze ispe niy:

— Kaharere tsihokdahařëna niy. Kaharere batu ahakparawy iwatsahi kaharere bo batu ma zikaha — niy.

⁶² — Utakta iknasikta ahawata ikyzik. Kahumo batu ahaspirikpo iwatahi kaharere tsihokdahařëna. Utakta bijoikpe bo kazo bo piksizoze anabo hi iktsa tsimaha ja kaharere bo yhỹ tsimaha.

⁶³ Deus hyrikoso humo aparakbaha meky watu moziknaha. Aparakbaha ihumo Deus tuk siwahi mynapykyryknaha. Kytsa zuba zeka batu Deus tuk mynapykyknaha. Batu zikaha. Iwa zeka kaharere bo hyÿ tsimaha zeka Deus hyrikoso ahatuk my. Iwaze ikiahatsa Deus tuk ahawahi tsimynapykyknaha.

⁶⁴ Wastuhu kaharere bo ba hÿ zikaha ana humo hi kahyrinymyrëta — niy. Iharere iakparawy byitsa soho humo botu zinymyry. Estuba sisukyrytsitsa bo zioctyhyrykta humo kino tsihyrinymyrëta. Zinymyrykynahatsa nisinaropykykze tsihyrinymyrëta.

⁶⁵ Iwatahi ahape iky.

— Tapara kazo yhÿ my iwaze kytsa kahumo sispirikporëtsa. Asa zuba kazo harere bo hyÿ mahaze asahi kahumo sispirikporëtsa moziknaha — niy.

⁶⁶ Iwa Sesus tuktsa sizubarëtsa iharere bo batu yhÿ niaha. Batu iapik pãozo. ⁶⁷ Kyze Sesus tuk zinymyrykynahatsa dose tsa pe niy:

— Ikiahatsa ja. Ikiahatsa kino sa tsipikarikiknaha — niy.

⁶⁸ Iwaze Simaõ Peduru ipe niy:

— Mypehatsa aty hapik sa tsimaha. Ikia humo mekywa tu tsimoziknaha. Hawa tsimyhyrikosokdanahaze Deus tuk mywahi tsimynapykyknaha anahi ikia zuba tsikmyhyrinymyryky. ⁶⁹ Iwatsahi aharere humo myspirikporëtsa. Ikia zuba Deus zahapehata tsimaha. Tsamysapyrëta — niy. Iwa Simaõ Peduru niy.

⁷⁰ Iwaze Sesus ispe niy:

— Utakta dose mytsyhyrytsa hawa zinymyrykynahatsa ikiwatawyhik. Estuba ahatukta Satanas mozik — niy.

⁷¹ Sesus Sudas soho nitsasoko. Sudas Simaõ Iskariotses tse niy. Atahi Sesus sukyrytsitsa bo pioktyhyryk niy.

7

Sesus tatukytsa tuk.

¹ Kyze Sesus Karireja bo niukuru. Sudeja bo ka batu pão. Sudeutsa taparaktsa zibeze tsihikiknaha. Iwatahi Sudeja bo batu pão. Karireja eze zuba niapykyryk. ² Tapara Sudeutsa myikaha bo pororo ziknakaranaha. Taparaktsa jerukbara eze tahaparik zizikinaha naha bo hi mytsaty ziknakaranaha. Iwaze amyikaha bytykara isiparik bo niapykyryknaha. ³ Iwaze Sesus tukytsa ipe niaha:

— Sudeja bo ikiakta tsiksikta. Anabo tsimyzeka hawa tsimykara atuktsa iktsa maha. Azikwy bo iktsa maha. ⁴ Tsipany tsihikik zeka ba okpitsĩkĩ ziky. Atahi izikwy ty sizubarẽtsa bo mysiwatawyky. Iwatahi Sudeja boktsa — niaha.

⁵ Itukytsa kino ihumo sispirikpobyitsa nikaranaha iwa ipe nikaranaha.

⁶ Sesus ispe niy:

— Uta aba amyikaha bo ba zikumu. Ikiahatsaktsa myikaha bo zeka wasani my tsimykaranaha. ⁷ Aparakbaha asahi Deus harere bo batu yhỹ zikaha kahumo tahakyrikinaha. Ikiahatsa humo ka batu siakyri. Uta kahumo zuba sakyrirẽtsa nikaranaha. Utakta ispe my: “Ikiahatsa ahamysapybyitsa tsikykaranaha” my iwatsahi kaharere humo tahakyrikinaha. ⁸ Ikiahatsaktsa simyikaha boktsa! Utakta ba zikparak. Abaka ba zikumu. Bykyze zuba my — niy. Iwa Sesus tatukytsa pe niy.

⁹ Iwaze itukytsa simyikaha bo niukurunaha. Sesus Karireja eze nitare.

Sesus simyikaha bo.

¹⁰ Kyze Sesus niwatihi simyikaha bo niy. Kytsa bo batu tyso. Ity sohabyita tu simyikaha bo niukuru. Kytsa batu sihyrinymyry. Sipapatu niparak. ¹¹⁻¹³ Sudeutsa

taparaktsa simyikaha bo niukurunaha. Asahi myikaha eze Sesus ziberikinaha. Asahi:

— Sesus sa hana bo — nikaranaha. Aparakbaha isoho nitsasokonahaze Sudeutsa taparaktsa batu siwaby tsihik. Iwatsahi akbyibatu zuba nipamykysokonaha. Asaktsa:

— O tahi tsimysapyrêta — nikaranaha. Utsa kytsa:

— O batu. Batu imysapy. Atahi kytsa bo nisispihikbataka — mybarapetu nikaranaha. Iwa Sesus soho nitsasokonaha.

¹⁴ Iwaze Sesus zumu. Deus wahoro zubata bo nitsuk. Anaeze iziakbata kytsa nisihyrinymyryky. Simyikaha asiba nepykze nisihyrinymyryky. ¹⁵ Taparaktsa Sudeutsa iharere batu siakparawy. Asa kino:

— Hawa hâta skaraba Deus papeu humo zinymyryba. Nimyhyrinymyrykynahatsitsa batu tyhyrinymyry iwatatu tsihyrinymyrêta. Batu wasani my — nikaranaha.

¹⁶ Iwaze Sesus ispe niy:

— Amy ty pahahyrinymyryky kaharere bara zikpehata harere zuba pinymyryky. Iharere zuba sizubarêtsa mysihyrinymyryky — Sesus niy. ¹⁷ Ikiyahatsa hi:

— O amy ty nisihyrinymyryky iharere zuba ja — tsimykaranaha. Utakta ahape my:

— Aty sa Deus harere piwaby tsihikik anahi kaharere baba hi pihyrinymyryky. Atahi kaharere Deus kabo zinyny niy ana humo hi tsihyrinymyrêta. ¹⁸ Wastuhu kytsa tahaharere ty zuba nisihyrinymyrykynaha. Utsa kytsa batu. Deus harere humo zuba nisihyrinymyrykynaha. Asahi tahaharere ty zuba nisihyrinymyrykynaha. — Ziwabynahatsa sisoho:

— O siharere wasani my, myhyrizikwanitsa moziknaha — nikaranaha. Iwa kytsa sisoho motsasokonahaze anahi mozihikiknaha. Kytsa Deus harere ty zuba nisihyrinymyrykynaha. Aparakbaha hi:

— O Deus harere tisapyrëna — nikaranaha. Ana soho humo hi sakurëtsa nikaranaha. Anahi Deus harere soho piwaby tsihikiknaha. Asa zuba wasani mykaranaha. Batu mybarapetu mykaranaha.

¹⁹ — Tubabatu Moises nihyrikosokdata ahadiritsa bo Deus harere ty nisihyrinymyryky. Batu aty tohi iharere bo hyÿ ziknakara. Amy humo sa ikiahatsa tsipikbeze tsihikiknaha — niy. Aparakbaha Deus wahoro zubata eze tu Sesus harere ziwabykynaha.

²⁰ — O ikia paikpa mytsaty tsimykara. Hyrikoso isapybara atuk my. Aty sa pabezetsihikik — nikaranaha. Iwa kytsa sisukmotsa nikaranaha. Serusarëhe eze ktsa sihyrinymyrëtsa. Sudeutsa taparaktsa Sesus pibeze tsihikiknaha anahi sihyrinymyrëtsa.

²¹ — Sudeutsa byrywy eze kazikwy ty pahawatawyky. Kazikwy humo nipybybaiknaha. Kazikwy bo iksa tsimykaranahaze, “O batu amysapy my. Atahi byrywy eze tarabaja niy” tsimykaranaha — Sesus niy.

²² Tubabatu Moises Deus harere ziwatahaka — Ahahyrytsa makuskyrytsa tysipiakzyzyknaha. Siwatahawy mozik atahi Deus tyryk niyzik ziwatawy. Ikiahatsa ahabykyhytsa tabyrywy eze tsinasipiakzyzykyknaha. ²³ Tabyrywy ahaskyrywytsa tysipiakzyzykyknaha Moises harere humo. Iharere bo yhyÿ tsimyzihihikiknaha iwatsahi tysipiakzyzykyknaha.

Uta maku izororo baba mybyrywy eze ana humo hi ja tsikahakyrikinaha. Amo humo ja tahakyrikinaha — niy. — O atahi mybyrywy eze tarabaja my. Maku zizororowyze tarabaja nikara. Batu amysapy tsimy — tsikykaranaha.

²⁴ Sizubarëtsa tsimytsasokonaha:

— Atahi batu wasani my mybarapetu tsimykaranaha niy. Hawa tohi mykara batu tyso “O atahi batu imysapy my”. Awatutaha — Sesus niy.

Sesus hi Deus zipehata.

²⁵ Serusarêhe eze wastuhu kytsa nipamykysokonaha:

— Atahi sa pibeze tsihikiknaha — nikaranaha.

²⁶ — Atahi kytsa okze motsasoko. Batu aty tohi ity sohometu. Tozeka ja taparaktsa Sesus humo sispirikporêtsa. Tozeka ja Sesus Deus zipehata ana humo hi yhy mykaranaha — nikaranaha. ²⁷ Iwa wastuhu Serusarêhe ezektsa nikaranaha. — Deus zipehata mozumuze batu aty tohi hana iknykta ja zikaha. Katsa zuba ihumo myhyrinymyrêtsa iwatahi batu Deus zipehata my — nikaranaha.

²⁸ Iwaze Sesus sizubarêtsa Deus wahoro zubata isturupeze nisihyrinymyryky. Opykani haty nisihyrinymyryky:

— Ikiahatsa batu ahanyhỹ. Ikiahatsa hana ikny ta ja izumu ba tsimykaranaha. Deus kazo zikpehatawy ikzumu hỹ. Ba ahabyizeka ba zik zumu. Atahi wasani mykara. Ikiahatsa batu ahahyrinyhy. ²⁹ Uta zuba iny. Ibage iknapykyry tatu my. Atahi mybarawy bo zikpehatawy — Sesus niy.

³⁰ Iwaze kytsa nizokbatsi tsihikiknaha. Sisukyrytsitsa bo itsipa humo tsioktyhyknaha nikaranaha, batu nabaze ity paik ahabyitsa. Deus — Batu yhy. Katse Sesus ba zioktynaha — niy. Iwatsahi itsipa humo batu ity oktyhyryk. ³¹ Kytsa sizubarêtsa ziwabynahaze iharere bo yhy nikaranaha ihumo sispirikporêtsa. Ziwabynahatsa hi:

— Deus zipehata zikwy tsipinyaha. Iwatsahi Deus zipehata my mytsaty tsimykaranaha — niaha.

Deus wahoro zubata perytsitsa Sesus pioktykyzynaha.

³² Iwaze Pariseutsa parakbaha Sesus nizikerykynaha. Kytsa sizubarêtsa Sesus soho nitsasokonahaze iwatsahi ziokttyhyryk tsihikiknaha. Pariseutsa parakbaha, Deus wahoro zubata eze ziknapamykysokonahatsa taparaktsa

iwatsa asahi Deus wahoro perytsitsa nisipehakanaha. Sesus itsipa humo tyzioktyhyknaha nisipehakanaha.

³³ Iwaze Sesus niy myzubaha bo:

— Utakta ahabaze jokbohatu mopykyrykspyk. Aiba zuba kapehatsa bo piksizo. ³⁴ Iwaze tsipikberinaha ba zik zikahanaha. Kazo bo piksizoze ba kapiktu zikaha — niy.

³⁵ Sudeutsa asa zuba nipamykysokonaha:

— Hana bo skaraba mykara katsa ba zik zikahanaha. Tozeka ja ustsya kytsa bo my. Bipyritsa bo ja mykara. Sudeutsa nanabyitaba mynapykyryk Kerekatsitsa baze mynapykyryk. Tozeka ja Kereka ezektsa mysihyrinymyryky — nikaranaha. ³⁶ Tapara mype niy:

— Tsipikberikinaha bazik zikaha naha. Piksizoze ba kapiktu zikaha niy. Iharere myhumo tsihokdaharēna — nikaranaha.

Deus hyrikoso myhumo pupuputsa hyrity wa.

³⁷ Kyze Sesus sizubarētsa bo nipamykysokozo. Opykani haty nipamykysoko. Simyikaha nepyksenohokoze nisihyrinymyrykyzo. Nawa zuruze ispe niy:

— Aty tsiarapukrēta zeka pihik piku. Aty meky watu mozik tsihikik zeka kabo tyzumukta. Iwaze tsipikuze hi kahumo tspirikporēta tsimysapyrēta mozik — Sesus niy. ³⁸ — Pihik waha ituk mynapykyryk. Pupuputsa wa mykara. Asahi kaharere bo hyŷ mykaranaha kahumo sispirikporētsa. Hawa kytsa pihik pikuikiknaha utakta situk mynapykyryk. Iwatsahi mekywa tu moziknaha. Simysapyrētsa. Iwa Deus harere papeu humo botu iwatahaha — Sesus niy.

³⁹ Sesus iwaze nitsasoko Deus hyrikoso soho ziwatawyky. Deus hyrikoso Sesus tuktsa tuk mynapykyryk. Deus sibo myzipeha tsihikik. Tapara Deus hyrikoso myzipeha iwaze Sesus tuktsa isoho motsasoko. Mybarawy

bo mynasik. Tapara Sesus Deus bo piksizozze iwaze hi Deus hyrikoso mybarawy bo atsoke mynasik. Tapara Sesus Deus bozo my. Bykyze Deus hyrikoso mybarawy bo myzipeha niy.

*Kytsa sizubar*êtsa metutu nikaranaha.

⁴⁰ Kytsa sizubarêtsa asa zuba Sesus soho humo nipykykokonaha. Mektsatu nitsasokonaha. Wastuhu kytsa nikaranaha:

— Atakta Deus sohokotsa babata, atahi taperyky hỹ — nikaranaha.

⁴¹ Utsa nikaranaha:

— Atakta Deus zipehata Kiristu my — nikaranaha. Utsa:

— O batu, Deus zipehata Karireja ezekta ja nikaranaha.

⁴² Deus harere papeu humo Sesus soho botu iwatahaha nikaranaha. Ziwatahaka:

“Deus zipehata Dawi tsekoka my Berêhe eze mopuruk. Sudeja eze my.” Iwa Deus harere niy — nikaranaha.

⁴³ Iwaze kytsa isoho humo niharapepehakanaha. Meky-watu siharere nikaranaha. ⁴⁴ Iwaze Deus wahoro perytsitsa Sesus zioқты tsihikiknaha. Asahi batu itsipa humo ity okty.

Sudeutsa taparaksita Sesus humo batu sispirikpo.

⁴⁵ Kyze Deus wahoro perytsitsa. Pariseutsa bo ziksizonaha. Zumukunahaze nisipehakanahatsitsa ispe niaha:

— Amo sa Sesus ty batu tyoktyhyryk — niaha.

⁴⁶ Deus wahoro perytsitsa hi:

— O batu aty tohi iharere wata my. Iharere tisapyrêna hỹ. Iwatsahi itsipa humo batu tyoktyhyryk — nikaranaha.

⁴⁷ Pariseutsa tihi:

— Ikiahatsa kino niwatihi. Iharere humo ja zahaspirikpoko — niaha. ⁴⁸ Sadusitsa aparakbaha taparaksita ihumo batu sispirikpo. Batu estuba zikino

ihumo batu ispirikpo. Pariseutsa niwatihi ihumo batu sispirikpo. ⁴⁹ Kytsa sizubarëtsa Moises harere humo batu sihyrinomyry. Asa zuba ihumo sispirikporëtsa. Deus ispe niy:

— Ikiahatsa batu ahamysapy tsimaha. Sinini ykarawy bo pahapeha my — Pariseutsa niaha.

⁵⁰ Maku Nikodemus ituktsa niapykyryk. Tapara atahi unata Sesus bo nikozone. ⁵¹ Atahi tatuktsa pe niy:

— Katsaktsa Sesus harere batu mywabyhy. Iharere ty waby ahahabyizeka ba ibete hÿ zikaha. Batu ziktsasonaha: “Atakta batu imysapy my. Iwatahi sinini ykarawy bo Deus pipeha” niy. Iwa tubabatu nihyrikosokdata Moises mydiritsa nisihyrinomyry — niy.

⁵²⁻⁵³ — O ikia niwatihi hazi nikaranaha. Ikia kino ja Karireja ezekta nikaranaha. Iwa tsimytsasokoze Deus papeu humo ihyrinomyrybyita wata — nikaranaha. Taparaktsa hi:

— Deus sohokotsa batu Karireja ikny ta my. Deus papeu humo tsinyziukukta tsimy. Iwatahi atakta Sesus batu Deus sohokotsa my — nikaranaha. Kyze tahawahoro bo ziksibanaha.

8

Wytyk sizubatsa oke.

¹ Sesus Oriwerejatsa hara bo niukuru. ² Miwa botu Deus wahoro zubata bozo niy. Kytsa sizubarëtsa Deus wahoro bo niaha. Sesus ziwabykynaha iwatsahi izumukunaha. Kytsa sizubarëtsa izumunahaze isitazahaeze nidyhyky. Iwaze nisihyrinomyryky.

³ Iwaze Deus harere watahatsitsa Pariseutsa niwatihi iwatsa Sesus bo zumunaha. Wytyk ibo ziockyhyryknaha. Atatsa ipyitsakatatsa tu sizubarëtsa ziknasihewabykyryk. Pariseutsa nizokparakanahaze sibo iktsa niaha. Iwatsahi

wytyk zioқтыhyryknaha. Kytsa sizubarëtsa tazahaeze atatsa Sesus bo zioқтыhyryknaha. Niritohoko.

⁴ Iwaze Sesus pe niaha:

— O myhyrinymyrykytsa atatsa wytyk usta ibarikta byita tu zipyrirykyknahaze sibo iktsa tsikaha. Iwatsahi atatsa abo tsikzioқтыhyryknaha. ⁵ Tubabatu nihyrikosok-data Moises myzotsa bo nitsasoko. Papeu humo ziwatahaka. “Wytyk usta maku zikzipyrirykyk zeka atatsa ty ka bohitaha. Haraharetsa ty tsibezenaha” iwa Moises botu myzotsa nisihyrinymyry. Ikia ja, Hawa sa tsimy — nikaranaha.

⁶ Ana hi nitsasokonahaze — Tahaharere tsyhyryzehe nikaranaha iwatsahi nizapykykynaha — mytsaty ahaby-itsa nikaranaha. Asa zuba nipamykysokonaha:

— O iharere meky watu my. Amy ty Moises botu ziwatahaka batu yhÿ my iwaze batu imysapy my — iwa mytsaty nikaranaha.

Iwaze Sesus okmymy hātatu wytyk bo tatsyhyry tyty tapauk baze ziwatahaka. Atatsa bo ka batu iktsa niy. ⁷ Hawa sa tsimy ipe nikaranaha. Kyze niziktsutsuhuku tatu kyik niy sibo iktsa niy. Ispe niy:

— Ikiyahatsa baze aty imysapyrëta zeka atahi harahare tapara mopapyk — niy. ⁸ Iwaze wytyk bo okmymyzo niy tatsyhyry ty ziwatahakazo.

⁹ Kytsa Sesus harere ziwabynahaze sisikpybyrëtsa nikaranaha. Iwatahi taparakta maku puke niy. Iwaze estuba estuba zuba zipokonaha. Ziharawyta iypykybyita puke niy. Sizubarëtsa puke puke niaha. Iharere humo sisikpybyrëtsa iwatsahi zipobaiknaha. Atatsa zuba Sesus tuk nitare, niriktohoko. ¹⁰ Sesus kyikzo atatsa bo iktsaziu niy. Ipe niy:

— O wytyk kytsa sa hana bo. Asahi ape “Ikia batu amysapy” nikaranaha. Asahi haraharetsa ty zabezekyzykynaha. Kytsa sa hana bo — niy.

¹¹ — O mypehatsa zipobaiknaha. Aba batu aty tohi kabo “Ikia batu amysapy” mykaranaha — niy. Sesus ipe niy:

— Uta kino niwatihi. Abo batu tyso “Ikia batu amysapy my” iwa abo batu tyso. Tsiksiktsa abaka awatu tynakara! — Sesus niy.

Sesus harere humo kytsa meky watu moziknaha.

¹² Kyze Sesus kytsa sizubarëtsa, Deus wahoro zubata eze nisihyrinymyrykyzo. Ispe niy:

— Deus harere ty pahahyrinymyryky Deus harere bo hyÿ tsimykaranaha zeka wasani tsimoziknaha. Asahi kahumo mospirikponaha zeka imysapybara pimoewynaha Deus mysiokzo. Asa kino kahumo tisapyrëna mynakaranaha, meky watu moziknaha hÿ — nikara. Iwahatyhi ispe niy.

¹³ Kyze Pariseutsa tihi:

— O ikia asoho zuba tsimytsasoko. Asoho tsimytsasoko zeka batu amysapy tsipimyiki — mybarapetu nikaranaha.

¹⁴ Sesus ispe niy:

— Utakta wasani mykara. Kasoho motsasoko zeka wasani my. Ikiatsa hana ikny tsikzumunaha humo batu ahahyrinymyry. Hana bo tsimykurunaha humo batu ahahyrinymyry. Utakta kahyrinymyrëta. Hana ikny ikzumuku naha humo kahyrinymyrëta. Hana bo moparak naha humo kahyrinymyrëta. Iwatahi wasani mykara — niy.

¹⁵ — Kytsa harere ty tsiwabyziu zeka ikiaatsa tihi: “O tahi batu wasani” tsimykaranaha. Iharere tsihokdharëna humo iwa tsimykaranaha. Utakta batu ka moso. Iwata humo hi batu tyso kytsa harere zuba. ¹⁶ Motsaso zeka ikahatsa batu ahamysapy kaharere ahasoho ty

wasani mykara. Atakta zikpeha atahi astsatu motsasoko. Uta zuba byita tu mykara. Kazo zikpeha katsaktsa harapetok tsimykarana¹⁷ Moises taparaka ziwatahakaze. Kytsa petoktsa atsatu motsasonahaze siharere piwabynahatsa siharere soho: “O wasani mykarana” maha.¹⁸ Uta hi kasoho motsasoko. Kazo kino niwatihi. Atahi zikpeha kasoho motsasoko. Kasoho tsimytsasokonaha. Iwa atsatu petoktsa kasoho motsasokonaha — niy.

¹⁹ Kyze ipe niaha:

— Haneze skaraba azo — niaha.

— Uta batu ahanyhy tsimykarana. Kazo kino niwatihi batu ahanyhỹ. Tsipliknynaha zeka kazo kino niwatihi tsipinynaha. Iwaze katsa tsimymynynaha — niy.

²⁰ Anaharere humo kytsa sizubarẽtsa bo nitsasoko. Sesus Deus wahoro zubata eze kytsa sizubarẽtsa okyrysaro suk baze nisihyrinymyryky. Sisukyrytsitsa itsipa humo batu ity oktyhyryk. Deus sibo batu yhỹ niy iwatsahi Sesus tsipa humo batu ity oktyhyryk.

Aty skaraba Sesus.

²¹ Sesus ispe niyzo:

— Uta piksi. Ikiahatsa tsipikberinaha zeka ba zikzikanaha. Uta pahatsumuẽhĩ tsihikik. Ba zikzikanaha. Tsimyhyrikosokdanahaze Deus ahasapybyitsa tsimykarana ba ziksiokzohik. Ikiahatsa ba kapik pão tsimaha.

²² Sudeutsa asa zuba nipamykysokonaha:

— Ata mybo nitsasoko “hana bo sa piksi batu iapik pão zikaha” nikara. Tozeka ja atatu tabeze. Tabeze zeka katsa batu iapik pão zikaha — nikarana. Iwa asazubatsa tu nikarana.

²³ Sesus nikarazo:

— Ikiahatsaktsa mybarawy ezektsa. Utakta Deus iknykta ikzumu. Hawa kytsa mytsaty mykarana

ikiahatsa niwatihi atsatu mytsaty tsimykaranaha. Utakta batu. Kazo mytsaty mykara naha ty zuba mytsaty mykara kazo wata my. ²⁴ Botu ahabo iktsasoko. Tsimyhyrikosokdanahaze Deus ahamysapybyi ty tsikykaranaha ba zahaokzo. Kahumo ahaspirikpo ahabyizeka tsimyhyrikosokdanaha katuk batu tsimynapykyryknaha. Utakta Deus zikpehata. Kawahi mynapykyryk. Kaharere bo yh̃ ahabyi zeka iwaze tsimyhyrikosokdanahaze ahamysapybyi ty tsikykaranaha ba zahaokzohik — niy.

²⁵ — Aty skaraba ikia — niaha. — Uta botu ahabo iktsaso — Sesus niy. ²⁶ — Ahabo puëtsik motsaso tsihikik. “Aharere hi batu wasani tsimaha” anahi motsaso tsihikik. Atahi zikpeha iharere zuba motsasoko. Iharere wasani my. Batu mybarapetu ziky. Anaty hi zikyrinymyryky atsatu kytsa sizubarëtsa bo motsaso — niy.

²⁷ Nitsasokoze zikpehata tazo soho nitsasoko. Sudeutsa ana humo hi batu siwabyziuhu. Iharere sihumo tsihokdharëna my.

²⁸ Utakta kytsa wata Deus zikpehatawy. — Iharapatawyhyta humo tsibezenhaktsa! — tsimykaranaha. Iwa tsipikbezenaha. Bykyze tsipikbezenahaze ikiahatsa tihi:

— O ataktsa wasape mykara tawahi mynapykyryk tsimykaranaha. O atakta Deus zipehata tsimykaranaha. Atahi tazo harere zuba aparakbaha nisihrinymyryky — tsimykaranaha. — Hawa tazo nitsasoko yh̃ niy. Taharere ty ka batu tyso. Tazo harere zuba nitsasoko anahi nisihrinymyryky — tsimykaranaha.

²⁹ Tahy zikpeha katuk mynapykyk. Iharere bo hỹ kasopyk — atahi kapokzitsikitsa. Ba zikare — niy.

³⁰ Iwatsahi kytsa sizubarëtsa iharere bo hỹ nikaranaha ihumo sispirikporëtsa nikaranaha. Asahi ziwabykynahatsa ihumo sispirikporëtsa nikaranaha.

Kytsa hawa sakurêtsa moziknaha.

³¹ Iwaze Sesus Sudeutsa pe niyzo ihumo sispirikporêtsa asa bo hi nitsasoko ispe niy:

— Kaharere bo hyÿ tsimykaranaha zeka katyryktsa tsi-moziknaha. Katuk zinymyrykynahatsa babatsa tsi-moziknaha. ³² Amy ty wasani tsipinymyrykynaha, iwatsahi meky watu tsi-moziknaha. Taparaka ahapokzitsiukbyitsa tu ahamysapybyitu tsikykaranaha. Abaka mahani ahapehatsa myzahapokzitsiki iwatsahi ahapunihikrêtsa tsi-moziknaha — niy.

³³ — O batu aty tohi mypehatsa humo mymypokzitsiubyitsa. Katsaktsa nihyrikosokdata Abarão tsekokatsa tsimaha. Amy humo sa mybo tsimy. “Kytsa mypehatsa humo mymypokzitsiubyitsa” tsimykara. Batu — nikaranaha.

³⁴ Sesus ispe:

— Kaharere wasani my. Wabyziutaha! Hawa batu mysapy tsimykaranaha. Ahasopyksapybyitsa tsimykaranaha zeka iwatsahi ahapokzitsiukbyitsa tsikyzyknaha. Ahapehatsa Satanas mozik. Iharere bo ma tsikykaranaha iwatsahi ahasopyksapybyitsa tsimykaranaha. Ba hawa tohi zikaha. Iwatsahi ahahumo ahapokzi byitsa niy.

³⁵ Mypehatsa kytsa nasipokzitsizo. Asahi sipokzitsiuk byitsa itukytsa nymyhyrybyita mykaranaha. Bipyritsa zuba. Tatse batu, atahi mymypokzitsiki. Mypehatsa tse humo mymypokzitsiki.

³⁶ Utakta Deus tse my. Iwatahi kahumo tsi-myspirikpokonahaze Deus tyryktsa tsi-moziknaha. Iharere bo zuba hyÿ tsimykaranaha. Tapara Satanas ahapehatsa tserikiknaha, iharere bo ka batu yhyÿ tsi-maha iwatsahi ahasopyksapybyity tsikykaranaha tsi-moewynaha — tsimykaranaha. — Uta ahapehatsa mozik kahumo ahapunihikrêtsa tsi-moziknaha.

³⁷ Ikiahatsa nihyrikosokdata Abarão tsekokatsa tsimaha ana humo hi kahyrinymyrëta. Kaharere bo batu yhỹ tsimykarana. Amo sa tsikbeze tsihikiknaha. Iwatsa tu Abarão tsekokatsa tu tsikbeze tsihikiknaha. ³⁸ Kazo zikwatawyky atsatu motsasoko. Ikiahatsaktsa Satanas tyryktsa tsikyzyknaha. Atahi ahazo my. Hawa mykara atsatu tsimykarana — Sesus niy.

³⁹⁻⁴⁰ Kytza tihi:

— O batu, katsaktsa Abarão tsekokatsa. Nihyrikosokdata Abarão mydiri mysopyk — niaha. Sesus ispe niyzo:

— Deus harere kabo nitsasoko. Iharere humo zuba zahahyrinymyryky. Ikiahatsa tsikbezekyzykynaha kaharere humo batu ahakparawy niy. Deus harere baba batu ahakparawy. Nihyrikosokdata Abarão Deus harere bo hỹ ziknakara. Ikiahatsa Abarão tsekokatsa tsimaha zeka iwata Deus harere bo hỹ tsimaha. Ikiahatsa Satanas wata tsikyzyknaha. ⁴¹ Hawa nikara atsatu tsimykarana — niy.

— O katsa batu Satanas watsa tsimaha Deus zuba myzo. Iharere bo zuba hỹ tsimykarana — mybarapetu niaha.

⁴² Sesus:

— Deus zikpeha. Uta mybarawy bo iknasik — niy. Deus ahazo my zeka ikiahatsa tihi:

— O zipehata tsimysapyrëta tsimykarana — niy.

⁴³ — Kaharere bo batu yhỹ tsimykarana. Kaharere bo batu ma zikaha. Iwatsahi batu wabyziu zikaha aha humo kaharere tsihokdaharëna my niy. ⁴⁴ Ikiahatsaktsa Satanas hyrytsa tsikyzyknaha. Hawa mykara ikahatsa kino niwatihi tsimykarana. Tahy imysapybyita mynakara. Ikiahatsa ahasopyksapybyitsa tsinakarana. Hawa mykara yhỹ ahasopyk. Ataharere humo hi kytsa naharapebakaanaha. Deus bjoikpe mybarawy nizuknize ata harere humo hi nahapebakaanaha. Aba kino niwatihi

kytsa nasiakzokotu. Deus harere babata bo batu yhỹ mykara. Batu wasani ziky tsimyspihikbatarēta. Pispihikbatakaze hawa mozihikik atsatu mykara. Kytsa mymyspihikbatakanahaze ihyrytsa moziknaha — Sesus niy.

⁴⁵ — Uta wasani motsasoko. Iwatsahi ikiahatsa kahumo batu ahaspirikpo — nikara. ⁴⁶ Ba amy tohi ziksonaha:

— O ikia tsimymysapybyriki — my. — Kaharere wasani ziky iwatsa tu kaharere bo batu yhỹ zikaha tsimykaranaha. ⁴⁷ Deus tyryktsa iharere bo hyỹ mykaranaha. Ikiahatsaktsa Deus tuktsabyitsa tsimaha. Iwatsahi Deus harere bo batu yhỹ tsimynakaranaha — nikara. Iwa Sesus taparaktsa bo nitsasoko.

Sesus iwaze Abarão.

⁴⁸ Sudeutsa Sesus pe niaha:

— O ikia hyrikoso sapybara humo tsimytsasoko. Batu amysapy tsimy. Paikpa mytsaty tsimykara. Samar-ija ezektsa wata batu amysapy tsimy — mybarapetu nikaranaha.

⁴⁹ Sesus tihi:

— Aharere batu wasani my. Hyrikoso sapybara humo batu tyso. “Kazo zuba wasani mykara”. Ikiahatsa tsiziksohometukunaha. ⁵⁰ Batu katyso “Utakta wasani my.” Deus zuba moziksapywyky “Atakta wasani” mykara. Kytsa kasoho humo piksohometukunahaze Deus tihi: “O aharere batu ahamysapy tsimykaranaha” — niy.

⁵¹ — O kaharere tsiwabytoktonahaktsa. Aty kaharere bo hyỹ mykara zeka atakta kazo tuk tawahi mynapykyryk — niy.

⁵² Iwatsahi Sudeutsa ipe niaha:

— Abaka tanymyryky hỹ. Ikiahi hyrikoso sapybara humo tsimypamykysoko. Tubabatu taparakta Abarão nihyrikosokda. Deus sohokotsa kino niwatihi nihyrikosokdanaha. Niakbabanaha. Ikia hi motsasoko “Aty kaharere

bo hyĩ mykara Deus tuk tawahi mynapykyryk. Siakbatsa ba zikakpykyknaha kaharere humo hyĩ my” tsimy — nikaranaha.⁵³ — Tubabatu Abarão mydiri nihyrikosokda. Abarão atatuze nitsasokoze kytsa iharere ziwabyziukunaha. Tubabatu siakbatsa Deus sohokotsitsa nihyrikosokdanaha. Asahi nitsasokonahaze kytsa siharere ziwabyziukunaha. Ikia ja. Tozeka ja tsimytsasokoze kytsa aharere piwabyziukunaha. Aty skaraba tsimy — nikaranaha.

⁵⁴ Sesus ispe niy:

— Utakta kasoho tu motsasoikik zeka “O uta zuba wasani hi mykara” Anahi mykara zeka batu aty tohi kaharere piwabytoktokoro. Kazo kasoho humo moziksapywyky. “O wasani hĩ mykara” — my. Ikiahatsa kazo soho tsimykaranaha zeka — O atakta mypehatsa my tsimykaranaha. Iwa kazo soho tsimykaranaha — niy.

⁵⁵ — Ikiahatsa hi batu Deus ahanyhy tsimykaranaha. Utazuba iny. Motsasoko zeka “batu kanyhy my” mybarapetu mykara. Ikiahatsa watsa mozik. Utakta iny. Iharere bo hyĩ mykara hĩ — Sesus niy. ⁵⁶ — Ahadiri Abarão kasoho humo tsihyrinymyrëta. Mybarawy bo mynasik ana humo hi tsihyrinymyrëta ziknakara. Iwatahi kahumo tsakurëta — niy.

⁵⁷ — O ikiakta batu atsaikba. Sikuëta anos ahabyitatu. Iwatahi ikiakta Abarão batu anyhy. Tubabatu nira iwatahi batu anyhy. Tsimymspihikbataka — niaha.

⁵⁸ Sesus ispe my:

— Kaharere tsiwabytoktonahaktsa. Taparakta Abarão purukbyitu utakta nawa tatu — niy.

⁵⁹ Iwaze kytsa haraharetsa ty nasibyknaha. Iwaze zibeze tsihikiknaha. Sesus sipokso taokpitsĩ. Kytsa sizubarëtsa papatu izoihik. Batu ity nyzo. Iwaze Deus wahoro zubata isturupeze inawakik.

9

Sesus ihyrizikubyritya zizororowy.

¹ Maku ihyrizikubyritya zizororowy. Kyze Sesus niukuruze zinymyrykynahatsa tuk maku ihyrizikubyritya bo iktsa niy. Atahi koikny bakta tu ihyrizikubyritya nipuruk.

² Zinymyrykynahatsa tihi:

— O mypehakatsa amo sa maku ihyrizikubyritya nipuruk niaha. Tozeka ja imysapybara humo nihyrizikubyritya. Tozeka ja izotsa simysopyksapybyitsa nikaranaha ana humo hi ja nihyrizikubyritya — niaha.

³ Sesus:

— O batu izotsa simysopyksapybyitsa nikaranaha ana humo hi nihyrizikubyritya. Abaka Deus zikwy piwatawy. Iwatahi ihyrizikubyritya nipurukze my. Deus zikwy humo piwatawyky niy. ⁴ Deus zikpehaka. Abaka Deus pokzi tarabajaziu mynakara. Bykyze Deus pokzi tarabaja mykara batu zik. ⁵ Uta mybarawy eze tuze aparakbaha mysihyrinymyryky. Deus harere bo hyỹ mynakara hawa wasani my mozuruku anaty hi mysihyrinymyryky — niy.

⁶ Kyze Sesus tasaytsik ty wytyk bo hezok niy. Tсахõrõ ty tysukni iwaze ihyrizikubyritya hyriziktsa bo tsahõrõ ty pepetohi niy. ⁷ Ipe niy:

— Zarape Siroã inarokoha bo tyzakpikykyta tsimy — niy.

Siroã Sudeja harere zipehata motsaso. Iwaze ihyrizikubyritya zarape bo niparak. Taty hopik hopiky niy. Atsoko nikozi. Nizororobaba. ⁸ Iwaze kytsa iotutsa pauksitsa asa zuba nipamykysokonaha:

— Tohi sa ske eze ziknadyhykyta. Batu ty ba iktsa ziky. Kytsa ziknasiakzaikik “O kabo ja kabo ja” ziknakara. “Kadisahawy ty kabo nyny tsimy” nikara.

⁹ Ata hi sa — Iotutsa pauksitsa nikaranaha. Ata hiba nikaranaha. Wastuhu nikaranaha:

— O batu. Maku ihyritywata hi zuba — niaha. Iwa asa zuba nipamykysokonaha. Iwaze tapara ihyrizikubyrita sibo taso:

— Uta hiba kahyrizikubyrita niy. Tapara ske eze ziknadyhyky. Okyrysaro kadisahawy humo niwatihi kytsa bo ziknazapyikik. Uta tihi ba — niy.

¹⁰ — Hawata skaraba abaka ikia iktsa asopyk — niaha.

¹¹ — Sesus inarokota kabo izumu. Atahi tsahõrõ ty sukni kahyriziktsa bo tsikaeni zuba tsyk niy. Kape “Siroã zarape bo hopikty!” — niy. Yhỹ iky. Siroã zarape bo ikparak. Ikokpikze atsoko iktsa iky.

¹² — Haneze sa Sesus — niaha.

— Yhỹ ja. Batu kanyhy — niy.

Pariseutsa ihyrizikubyrita pe: — Hawa skaraba abaka iktsa tsimykara — nikaranaha.

¹³ Iwaze iotutsa pauktsitsa tapara ihyrizikubyrita Pariseutsa bo zioқтыhyryknaha. ¹⁴ Sesus Sudeutsa byrykywy eze ihyrizikubyrita zizororowy. Tsahõrõ sukni ty ihyriziktsa bo pepe niyze tabrykywy eze zizororowy.

¹⁵ Iwaze Pariseutsa niwatihi ipe niaha:

— Hawa ta skaraba abaka iktsa asopyk — niaha.

— Atahi tsahõrõ sukni ty kahyriziktsa bo tsikaeniha zuba pepe niy. Uta kino hopik hopikby ikytahi atsoko iktsa iky — niy.

¹⁶ Pariseutsa nikaranaha:

— Atakta zizororowy mybyrykywy eze tarabaja nikara. Aty niwa myzeka Deus iknybyita tarabaja humo — wastuhu nikaranaha. Utsa tihi:

— O batu. Hawa skaraba maku imysapybyita nikara Deus zikwy ty ziwatawy — nikaranaha. Iwaze Sesus zisohometukunaha. ¹⁷ Iwaze ipezo niaha:

— Ikia tsikyara. Ahyrizikubyri humo zazororowyhik hawa isoho mytsaty tsimy — nikaranaha:

— O atahi Deus sohokotsa my hỹ — niy.

¹⁸ Pariseutsa iharere humo batu sispirikpo niaha. Iharere bo batu yhỹ niaha. Iwatsahi kytsa izotsa nasioktyhyryknaha. ¹⁹ Zumunahaze ispe niaha:

— Hawa skaraba ahatse hi sa. Atahi sa ihyrizikubyritya nipuruk. Ihyrizikubyritya niy zeka hawa hãta skaraba abaka iktsa mykara — nikaranaha.

²⁰ — O atakta katse my izo niy. Nipurukze ihyrizikubyritya hỹ niy. ²¹ Abaka iktsa mykara batu kanyhy izo niy. Aty sa zizororowy batu kanyhy. Katse botu taypyk iwatsahi ituk typamykysonaha. Hawa iktsa mykara anahi ituk typamykysonaha — izo niy.

²² Iwa izo Pariseutsa pokso nitsasoko. Tapara Pariseutsa tihi:

— Aty skaraba Sesus Deus zipehata my zeka atahi Sudeutsa wahoro bo ba ziktsukzo — nikaranaha. ²³ Iwatahi izo nitsasoko:

— Katse botu taypyk. Hawa abaka iktsa mykara anatyhi ipe tsimaha — nikaranaha. Sudeutsa pokso sipybyrẽtsa nikaranaha.

²⁴ Kyze Pariseutsa tapara ihyrizikubyritya zioқтыhyrykzonaha. Sibozumuze ipe niaha:

— Katsakta Deus okze tu tsimaha. Aharere wasania ty mybo tytsaso. Atahi zazororowyta batu imysapy my ana humo hi myhyrinymyrẽtsa — mybarapetu nikaranaha.

²⁵ — Atahi zikzororowyta imysapybara ty mynakara zeka batu isoho kawabyhy. Uta taparaka kahyryzikubyritya abaka iktsa mykara hỹ. Ana humo hi zuba kahyrynymyrẽta — niy.

²⁶ Ipezo niaha:

— Hawa sa niy. Hawa skaraba ahyryziktsa nisizororowy — niaha.

²⁷ — Botu iktsaso. Kaharere humo batu ahaspirikpo. Hawa skaraba kaharere tsipiwaby tshikikzonaha niy.

Tozeka ja ikiahatsa kino niwatihi ituktsa tsimoziknaha — niy. Iwa zizororota Pariseutsa pe niy.

²⁸ — Batu ba — nikaranaha. Sisakparëtsa nikaranaha. Zizororowyta humo tahakyrikinaha:

— Ikia hi itukta tsimy. Katsa Moises harere bo zuba hyÿ tsimykaranaha. Katsa Moises tuktsa tsimaha. ²⁹ Moises Deus harere nitsasoko ana humo hi myhyrinymyrëtsa hÿ. Azororowyta ja. Aty harere sa motsasoko. Hana iknykta sa izumu batu myhyrinymyry — niaha.

³⁰ Zizororowyta niy:

— Paze. Atahi zikzororowy. Uta kahyrizikubyritytu zikzororowy. Ikiahatsa hi isoho humo batu ahahyrinymyry. Hana ikny sa izumu batu ahahyrinymyry niy. ³¹ Katsa myhyrinymyrëtsa. Kytsa simysapybyitsa mykaranaha iwaze Deus bo mopamykysokonahaze batu siwabyhy nikara. Ba ziksitsumuëhĩ. Asaktsa Deus harere bo hyÿ mykaranaha asahi Deus bo mopamykysokonahaze piwabyziuku. Mysitsumuëhĩkĩ. ³² Batu aty tohi ihyrizikubyrity ty “tyzororowy” iwahaty batu tyso. Batu zik nikaranaha. Abaka atahi kahyriziktsa nisizororowy abaka iktsa kasopyk. ³³ Deus harere bo hyÿ habyi zeka kahyriziktsa bazik sizororowy. Deus humo ipeha ahabyizeka kahyriziktsa ba zik isizororowy hÿ — niy.

³⁴ Kytsa ihumo tahakyrikinaha. Asahi:

— Ikia amysapybyi ty tsimykara. Tsikpurukze ahyrizikubyrity amysapybara humo mybarapetu nikaranaha. Ikia tsimyhyrinymyry tsihikik nikaranaha. Nabo pãoty. Sudeutsa wahoro bo ba ziksukzo — niaha. Tahakyrikinaha zizororowyta humo niaha.

Hawa kytsa Sesus humo sispirikpobyitsa ihyrizikubyrity watsa maha.

³⁵ Kyze Sesus isoho ziwabyze. Kytsa nizukeheknaha Deus wahoro bo ba ziktsuk niaha ana hi ziwaby. Iwaze zihobykze ipe niy:

— Ikia Deus zipehata kytsa wata niyzik ihumo aspirikporêta sa — niy.

³⁶ — Aty sa Deus zipehata mywata niyzik. Ikia kabo tsiwiwatawy zeka ihumo kaspirikporêta hỹ my — niy.

³⁷ — Aba ibo tsimykozoko. Atakino abo mopamykysoko atsatu Deus zipehata ahawata ikyzik — niy.

³⁸ Iwaze zizororowyta taekaratsa humo puruk puruk niy.

— O kapehatsa abaka ahumo kaspirikporêta my — niy. Aba motsasoko — Ikia zuba tsamysapyrêta. Ikia zuba wasani tsimykara — niy.

³⁹ Sesus tihi:

— Mybarawy bo iknasik. Iwaze kahumo kytsa meky watu moziknaha. Asahi katuktsa moziknaha. Deus sisoho “O simysapyrêta maha” my. Utsa batu. Kahumo batu sispirikpo. Iwaze asahi Deus tihi: “O batu simysapy mykaranaha” my. Wastuhu Deus harere soho “katsa batu myhyrinomyry. Iharere tsinomyry tsihikiknaha”. Asahi katuktsa moziknaha. Utsa tihi “O katsaktsa Deus harere botu tsinomyrybanaha” mytsaty ahabyitsa nikaranaha. Asahi kahumo batu sispirikpo — Sesus niy.

⁴⁰ Pariseutsa iharere ziwabykynahaze ipe niaha:

— Katsaktsa Deus harere humo myhyrinomyrêta. Iwa tsimytsasokonahaze tahaspihikbatakanaha ja — nikaranaha.

⁴¹ Sesus ispe niy:

— Tsimytsasokonaha zeka: “O Deus harere batu myhyrinomyry, katsa iharere bo tsinomyry tsihikiknaha” Iwa tsimytsasokonaha zeka Deus okzeka ahamysapyrêta

tsimoziknaha hỹ. Ikiahatsa hi: “O Deus harere myhyrinymyrẽtsa.” Iwatsahi Deus okzeka batu ahamysapy tsimaha — niy. Iwa Sesus Pariseutsa bo nitsasoko.

10

Kytsa hozipyrykzatsa watsa soho nitsasoko.

¹ Sesus nisihyrinymyryky. Hozipyrykzatsa soho humo nisiwatawyky. Kytsa hozipyrykzatsa hyrity watsa nisiwatawyky. Iwa nisihyrinymyryky:

— O kytsa wabyziutaha! — niy. Aty hozipyrykzatsa okarawy hokbowybyita buruk tu mytsuk zeka isoho humo:

— O atakta titsyhyryboarẽta. Atahi hozipyrykzatsa mysibykyryk iwatahi inatsuk hokbowybyita buruk tu — tsimykaranaha.

² — Atahi hozipyrykzatsa okarawy hokbowy buruk tu paku my tahi sitsihitsa babata my — tsimykaranaha.

³ — Hozipyrykzatsa tsihitsa mozumuze hokbowy bazekta. Atahi hokbowy ty zoksapare myraratsa bo mytsuk. Hozipyrykzatsa tsihitsa iaksoho piwabynahaze sakurẽtsa moziknaha iwaze mysinaropykze estuba estuba zuba zipokonaha. Tahanaro piwabykynahaze ape bo mosisakpare. ⁴ Hozipyrykzatsa sizubarẽtsa ape bo pipokonahaze sitsihitsa siharaze mynaukuru. Hozipyrykzatsa iapik ziknaukurunaha. Iaksoho humo zinymyrynahatsa hi mykaranaha.

⁵ Sitsihitsabyitsa tu zeka batu iapik zikaha. Iaksoho humo batu sihyrinymyry iwatsahi iapik batu zikaha. Tahatsihitsabyita yksoho piwabykynaha zeka paikpa mynatururukunaha. Sipybyrẽtsa moziknaha — Sesus niy.

⁶ Kytsa Sesus harere hozipyrykzatsa soho humo batu sihyrinymyry. Amy piwatawy naha humo tsihokdaharẽna.

Sesus hokbowy wata my.

⁷ Iwaze Sesus ispe niyzo:

— O kytsa wabyziutaha! Hozipyrykzatsa siokarawy eze tu zeka batu aty tohi ziksiba. Batu aty tohi ziksiakse. Anaeze batu aty tohi ba ziksiboro. Uta katuktsa mysiperyky. Katuktsa hozipyrykzatsa watsa uta hi mysipokzitsiki niy. ⁸ Hozipyrykzatsa tahatsihitsa byitsa yksoho humo batu sihyrinymyry. Katuktsa niwatihi. Asaktsa zispihikbatakanahatsitsa humo batu sispirikpo. Tapara kaharaze izumukunahatsa wasanibara ty nisihyrinymyrykynaha. Iwatsahi batu siwabyziuhu.

⁹ Utakta hokbowy wata my iburuk mynapupunaha. Zoksapare mahaze tahadisahawy bo mynakaranaha bykyze mynapupuzonaha. Siokarawy eze batu aty tohi ba ziksiba. Asaktsa kahumo sispirikporëtsa mysipokzitsiki.

¹⁰ Sitsyhyryboanikitsa mozumunahaze hozipyrykzatsa humo tahatsyhyryboanaha mysiba tsihikiknaha. Utakta meky watu my. Izkumuze aparakbaha kahumo sispirikporëtsa simysapyrëtsa moziknaha. Sakurëtsa moziknaha katuk mynapykyryknaha.

Sesus hozipyrykzatsa tsihitsa wata my.

¹¹ Katuktsa mysipokzitsiki hÿ. Hozipyryktsa tsihitsa wata my. Uta katuktsa sapyzeken mohyrikosokda. ¹² Aty hozipyrykzatsa tsihitsa tsumuëhÿtsa atahi okyrysaro soho humo zuba tarabaja mykara. Batu itsihitsa babata byita tu. Sitsumuëhÿtsa zuba. Parini mozumuze tsipybyrëta ipokso moparakik. Hozipyryktsa myserekek. Iwaze parini mozumuze hozipyrykzatsa paikpa motururukuknaha. Nanabyitaba motururukuknaha. Parini hozipyrykzatsa mysiboro mykara tahi iwatsahi ipokso sipybyrëtsa mykaranaha. ¹³ Tsumuëhÿtsa niparakik.

Okyrysaro humo tarabaja mykara. Iwaze hozipyrykzatsa batu sipokzitsinymyhy.

¹⁴⁻¹⁵ Utakta hozipyrykzatsa tsihitsa wata my. Kamypokzitsiukrêta. Kazo humo kahyrinymyrêta kazo kahumo tsihyrinymyrêta. Nawatu katuktsa kahumo sihyrinymyrêtsa. Utakta katuktsa iksinyba. Katuktsa pokzi mohyrikosokda. Estuba katukta pibeze zeka sisapyzekeny mohyrikosokda — niy.

¹⁶ — Nanabyitaba ustsasizubarêtsa my. Usa okarawy eze mopykyryknaha. Asahi Deus bo mysioktyhyryk kaharere bo hyỹ mykaranaha. Sizubarêtsa kaharere bo hyỹ mykaranaha. Utakta sizubarêtsa kazo bo mysioktyhyryk hỹ.

¹⁷ Katuktsa pokzi mohyrikosokda. Mohyrikosokda bykyze mynahyryzikpo. Iwaze kazo kahumo tsimypokzitsiarêta. Katuktsa pokzi mohyrikosokda kazo kahumo tsimypokzitsiarêta. ¹⁸ Utakta mohyrikosokda ahabyi zeka ba zikbezenaha. Tubabatu kazo tihi:

“Tsimyhyrykosokda zeka tsinahyryzikpo”. Iwatahi tsimyhyrykosokda tsihikik yhỹ tsimy. Bykyze tsimynahyryzikpo tsihikikze yhỹ tsimy kazo niy. Iwa — Sesus niy.

¹⁹ Sudeutsa iharere soho niharapepehakanaha.

²⁰ Wastuhu:

— O atakta hyrikoso sapybara ituk napykyryk. Iwatahi paikpa mytsaty nikara. Amy sa tsiyawabykynaha — nikaranaha.

²¹ Ustsasizubarêtsa tihi:

— O batu. Maku hyrikoso sapybara ituk mopykyryk zeka ba ziksaso. Maku hyrikoso sapybara ituk mynapykyryk zeka ihyryzikubyritya bazizororowy batu zik — nikaranaha.

Sudeutsa Sesus harere bo batu yhỹ ahabyitsa nikaranaha.

²² Kyze Sudeutsa Sesus bo niaha. Serusarêhe ezek-tsa myikaha niaha. Pororo ziknakaranaha, nawa Deus wahoro zubata nizukninahaze mytsaty ziknakaranaha. Hyritsikze imyikaha bo pororo ziknakaranaha. ²³ Sesus Deus wahoro zubata zikarazik buruk paikpa nikaranaha. Tubabatu ispehatsa Soromao sapy zinaroko. ²⁴ Anaeze Sudeutsa Sesus pauk baze niriktotohokonahaze ipe niaha:

— Ikia hisa Deus zipehata ja Kiristu. Hawaze sa mybo asoho tsiwatawyky. Ikia Deus zipehata tsimyzeka mybo tytsaso — niaha.

²⁵ Sesus hi:

— Botu kasoho iktsaso. Ikiahatsa kaharere humo batu ahaspirikpo. Hawa mykara Deus zikwy humo iwaze utakta Deus zikpehata mykara ana hi piwatawyky. ²⁶ Ikiahatsa kaharere humo batu ahaspirikpo. ²⁷ Katuktsa kaharere bo hyÿ mykaranaha. Asahi hozipyrykzatsa watsa mykaranaha. Hawa hozipyrykzatsa tsihitsa hapik moku-runaha. Katuktsa niwatihi kaharere bo hyÿ mykaranaha. Kaksoho piwabynahaze sispirikporêtsa. Uta kino mysiny. Katuktsa mynamopykyryknaha niy.

²⁸ Kahumo simysapyrêtsa moziknaha. Batu aty tohi zik-siakse. Batu estuba kino ba ziaksenaha. Tahawahi katuk mozurukunaha hÿ, mohyrikosokdanahaze Deus sihumo tsimypokzitsiukrêta ituk tahawahi mynapykyryknaha ²⁹ Kazo atahi zikpehahik iwatsahi sizubarêtsa kahumo sispirikporêtsa. Kazokta abazuba zikwy. Ba aty tohi iekze ziksiokty. Ba aty tohi katuktsa ziksiokty — niy. ³⁰ — Kazikwy kazo zikwy kino atsatu my — Sesus niy.

³¹ Iwa Sesus niyze Sudeutsa haraharetsa ty inasikyknaha iwatsahi ity zibezezykynaha.

³² Sesus ispe niy:

— Uta kazo zikwy humo tisapyrëna ty mykara. Amo sa haraharetsa ty tsipikbeze tshikiknaha. Hawa sa ikykara — niy.

³³ Sudeutsa:

— Amy ty isapyha ty tsimyzeke ba zabezenaha. Hawa Deus zikwy tsipiwatawy anahumo hi ba zabezenaha. Aharere batu imysapy mytsaty tsimykaranaha. Ikiakta maku zubata. Maku tuze “Kazikwy kazo zikwy kino atsatu” tsimy. Iwatsahi haraharetsa ty tsipabeze tshikiknaha — niaha.

³⁴⁻³⁵ Sesus:

— Amy ty Moises ziwatahaka wasani niy. Deus harere ziwatahakaze wasani niy. Botu ziwatahaka Deus harere papeu humo “Ikiahatsa deutsa watsa tsimaha” botu ziwatahaka. Iwa kytsa bo asahi sinarohotsa. ³⁶ Deus hi zikpeha. Aparakbaha Deus bo mysioktyhyryk my. Utahi mymyoktyhyrykta. Amy skaraba tsimaha: “O iharere ty Deus okzeke batu imysapy my.” Mytsasokoze “Utakta Deus tse my”. O iharere ty batu imysapy mybarapetu tsimykaranaha — niy.

³⁷ — Utakta Deus zikwy humo watawy abyizeka kahumo batu ahaspirikpo wasani tsimykaranaha. Utakta Deus zikwy piwatawyky iwatsahi batu ahamysapy tsimykaranaha. ³⁸ Kaharere humo ahaspirikpo ahabyizeka hawa mykara anahumo hi ahaspirikporëtsa. Tsimyspirikponaha zeka ikiahatsa:

“O Sesus zikwy izo zikwy kino atsatu my” tsimaha — niy.

³⁹ Iwatsahi Sudeutsa itsipa humo asiba ziooktyhyrykzonaha. Batu zik hawa tohi zikaha Sesus niwakik.

⁴⁰ Iwaze Sesus buburu Sorodão inarokoha koikny zit-sikzazo. Anaeze tapara Suão Batista sizubarëtsa nisiharasuku. Anabo hi Sesus niukuru. ⁴¹ Sizubarëtsa ibo zumunaha. Asahi nipamykysokonaha:

— O Suão Batista Deus zikwy ty batu mybo tywatawy. Amo ata maku soho botu nitsasoko wasani nikara — nikaranaha. ⁴² Iwaze kytsa sizubarêtsa iharere bo hyÿ nikaranaha. Asahi amykta taba buburu Sorodão ezeksa ihumo sispirikporêtsa niaha.

11

Rasaru nihyrikosokda naha soho.

¹ Kyze Rasaru tsimyitsapyrêta. Sinini nikara. Tatukykyryk tuk Betaniya eze hudik ziknakaranaha. Maria inarokotatsa, ustatsa Marata inarokotatsa iwaza.

² Maria katsa Rasarutsy hi iokmorênikia tsipokzitsarêna Sesus zipyryharasusuku. Taharadi ty zipyrywiki. Maria atatsa tihi. ³ Iwaze wytykyryk maku Sesus bo zipegahiknaha. Sesus bo zumuze ipe niy:

— O ikia aharereziuwu tsimyitsapyrêta — niy.

⁴ Ana ziwabyze Sesus ipe niy:

— Botu kahyrinymyrêta. Rasaru tsimyitsapyrêta hiba. Mohyrikosokdaze niakbanahatsa tuk ba zikapykyryk. Deus zikwy humo mynahyrikizikpo. Kytsa isoho mot-sasokonaha. Rasaru “Deus tse zikwy humo inahyrikizikpo” mykaranaha — niy.

⁵ Sesus Marata Maria Rasaru iwatsa humo tsimypokzitsiarêta ziknakara. ⁶ Sihumo tsimypokzitsiarêta tasapy eze inapykyryk iwaze petok zuruze ibo niukuru. ⁷ Kyze zinymyrykynahatsa pe niy:

— Tupaktsa kytsa! Sudeja boktsa — niy.

⁸ — O mypehatsa Sudeutsa zabeze tsihikiknaha. Botua haraharetsa ty zabeze tsihikiknaha. Iwatatu sa tsipiksiki-rizo — niaha.

⁹⁻¹⁰ — Yhÿ niy. Abaka Deus tarabaja mynakara. Okoroze kytsa haramwe humo amypubyri iktsa mykaranaha. Maku unata pitabakaze mynaraha. Batu iktsa zikaha.

Maku okoroze pitabakaze wasani my. Haramwe humo ske buruk iktsa my. Aty Deus tsyhyryze tarabaja my zeka maku okoroze pitabakaze tawata. Bykyze batu zik maku unata pitabakaze tawata. Tupaktsa! Kytsa ba zikbezenaha Deus batu yhy mykara. Iwatsahi bazik bezenaha. Tapara Deus hyriziktsokzawy pepykba. Abaka ba zikbezenaha Deus kabete batu hy ziky. Aibani zuba pikbezenaha — niy.

¹¹ Zinymyrykynahatsa pezo niy:

— Myharereziuwu Rasaru purubaka. Abahi mozipopo — niy.

¹² — O purubaka zeka mozororozo hy — nikaranaha.

¹³ Rasaru botu nihyrikosokda ana humo hi Sesus tsihyrinymyrêta. Iwatatu — “Rasaru purubaka” niy iwatsahi Rasaru purubaka tu ja — mytsaty nikaranaha.

¹⁴ Iwaze Sesus mypubara ty nitsasoko. Ispe niy:

— Rasaru nihyrikosokda — niy. ¹⁵ Iwatatu ibo batu pão. — Aba Deus zikwy pahawatawyky. Kazikwy humo iktsa tsimahaze kahumo ahaspirikporêtsa tsimoziknaha. Iwatahi kakurêta. Nihyrikosokdata boktsa kytsa! Tupaktsa — niy.

¹⁶ — O katsa ituk tsimykurunahaktsa kytsa! Sesus pibezenaha zeka katsa niwatihi ituktu tsimyyhyrikosokdanaha — Tome niy. Tome beketsa petok inarohota nikara. Iwaze Sesus tuk zinymyrykynahatsa nihyrikosokdata bo zumukunaha.

Sesus niakbanahatsa nasihyrizikpo.

¹⁷⁻¹⁸ Betanija bo zumunaha. Betanija Serusarêhe bazebabatu. Harakykbyi kirometero zuba. Nihyrikosokdata sapy bo zumunaha. Kytsa:

— O Rasaru nihyrikosokda. Harakykbyihi zuruze Rasaru harahare oke eze ziytyknaha — nikaranaha.

¹⁹ Marata itsy Maria niwatihi Rasaru pokzi nipuziukunaha. Sudeutsa kytsa situk Rasaru pokzi nipuziukunaha.

²⁰ Iwaze Marata Sesus sukmo soho ziwabyze atatsa ibo niukuru. Sesus zihobyk. Maria wahoro eze tu niapykyryk.

²¹ Marata Sesus zihobykze ipe niy:

— O ikia mytuk tu zeka kaokaha ba zikumuza. ²² Amy Deus bo tsimyzapykyky atsatu abo nyny my. Ikia Deus bo tsimypamykysoko zeka kaokaha soho amy tsimyzapykyky anahi abo nyny my — niy.

²³ — Aokaha mynahyryzikpo — niy.

²⁴ — Yhỹ niy. Atahi mynahyryzikpo ana humo hi kahyrinymyrẽtatsa. Deus myzo siakbatsa sizubarẽtsa nasihyryzikpoze kaokaha kino niwatihi mynahyryzikpo — niy.

²⁵ Sesus:

— Uta hiba siakbatsa hyryzikpokotsa. Kahumo nahyryzikponaha. Kytsa kahumo sispirikporẽtsa asahi mohyrykosokdanahaze nahyryzikponaha asahi Deus tuk tahawahi mynapykyknaha. ²⁶ Asahi kahumo sispirikporẽtsa tuze niakbanahatsa tuk ba zikykykyknaha. Asahi Deus tuk mynapykyryknaha. Kaharere bo sa hyỹ tsimy — niy.

²⁷ — Yhỹ niy. Ikia hi Deus zapehata mywata tsikyzyk. Ikia hi Deus tse babata. Tahi tsiperykynaha — niy.

Sesus kytsa pokzi nipu.

²⁸ Iwaze Marata nitsasobaze tatsy bo ziksizo. Tatsy bo nisakzihihi tu. Ustsaktsa batu siwabyhy:

— O katsy mypehatsa izumu ikia zasapykyky. Ske puk teze tu — niy.

²⁹ Iwaze Maria ziwabyze Sesus bo niparak. Aidy kyikykyk niy. ³⁰ Izumubahaneze pyk niy. Marata zihobyk anaeze ibo zumu. ³¹ Sudeutsa atatsa hapik niukurunaha. Asahi Rasaru pokzi nipuziukunaha. Atatsa bo iktsa niahaze:

— O iytyk bo ja moparakak — mytsaty ahabyitsa nikaranaha. Iwatsahi iapik niukurunaha.

³² Atatsa Sesus bo zumu. Ibo iktsa niyze taekaratsa humo puruk puruk niy:

— O mypehatsa ikia mytuk zeka kaokaha ba zikumuza — niy.

³³ Maria taokaha pokzi nipuziuku atatsa bo Sesus iktsa niy. Sudeutsa kino ituk nipuziukunaha. Sizubarêtsa nipupuziukunaha. Sisukatsihikrêtsa. Sesus sihumo tsimypokzitsiarêta. Iwatahi sihumo tisukatsihikrêta niyzik.

³⁴ — Iytyk sa hana eze — niy.

— O mypehatsa panykta anaeze — niaha.

³⁵ Sesus sipokzi nipu.

³⁶ Iwatsahi Sudeutsa ihyritsik bo iktsa niahaze:

— O Rasaru humo tsimypokzitsiarêta — nikaranaha.

³⁷ Utsa kytsa:

— Tapara ihyrizikubyritya zizororowy. Tozeka ja Rasaru ty iwa my tawata hỹ — nikaranaha. Asa zuba nipamykysokonaha.

Sesus Rasaru zihyrizikpowy.

³⁸ Iwaze Sesus ihumo tsimypokzitsiarêta iytyk bo zumu. Tisukatsihikrêta nikara anaeze harahare hok eze niapykyryk. Sesus Mata Maria Sudeutsa kytsa sizubarêtsa iwatsa iytyk bo zumukunaha. ³⁹ Sesus ispe niy:

— Harahare tsišpetunahaktsa! — niy.

— Mypehatsa ba hawa tohi zikaha! Abaka inury mobibibaka harakykbyihi zuruze anaeze nitsahok. Tsihõhõrêta — Marata niy.

⁴⁰ — Uta zuba botu iktsaso ikia kahumo aspirikporêtatsa zeka Deus zikwy piwatawyky. Ana humo hi ma tsimy — Sesus niy.

⁴¹ Iwaze kytsa harahare zipetuhiknaha. Sesus Deus bo nipamykysoko:

— O kazo kaharere tsiwabyikik. Iwatahi “Ikia tsamys-
apyrëta” mykara. ⁴² Kaharere tsiwabyikik. Anahi
kahyrinymyrëta. Kytsa kapauk bazektsa okze abo
mopamykysoko. Iwatsahi kahumo sispirikporëtsa mozik-
naha. Ikia hi tsikpeha ana humo hi sihyrinymyrëtsa —
niy.

⁴³ Sesus tazo bo nipamykysobaze opykani huahua niy:

— Rasaru pany puketyny — niy. ⁴⁴ Rasaru nihyrikosok-
data tu atsoko izoihik. Panu ty takwarawytuk tu zizoi.
Sesus ispe niy:

— Iakwarawy tsipararanahaktsa iwaze pitaba! — niy.

*Sudeutsa taparaktsa: — Hawa sa Sesus tabeze —
nikaranaha.*

⁴⁵ Iwaze mektsaktsa Sudeutsa Maria bo inakozorenaha
Sesus humo sispirikporëtsa moziknaha. Asahi Rasaru
inahyrizikpo naha zinyanaha Sesus humo sispirikporëtsa.
⁴⁶ Utsa kytsa ihumo batu sispirikpo. Asahi Pariseutsa bo
nitsasokonaha. Ispe niaha:

— O Sesus nihyrikosokdata Rasaru zihyrizikpowy —
niaha. Iwa Pariseutsa bo nikaranaha.

⁴⁷ Iwaze Pariseutsa, taparaktsa ziknapamykysokona-
hatsa iwatsa izumubanaha. Asa zuba Sesus soho ty
nipamykysokonaha:

— Hawa sa Sesus ty tsimaha. Atakta tazikwy myzubaha
bo ziwatawyky. Hawa sa Sesus ty tsimaha ⁴⁸ Ata tazikwy
piwatawyikik zeka kytsa sizubarëtsa ihumo sispirik-
porëtsa moziknaha. Situktsa moziknaha. Sesus ispehatsa
mozik zeka Homa taparakta Sesa sodadutsa mymyokty-
hyryk mysipeha Deus wahoro zubata pipaparabanaha.
Mytyryktsa mokbabanaha. Myhyrytsa nihyrikosokdata
Moises harere ty ba ziksihyrinymyrynaha — iwa asa zuba
nipamykysokonaha.

⁴⁹ Iwaze taparakta ziknapamykysokota Kajapas inarokota ispe niy:

— Ikiatsa batu ahahyrinymyry niy. ⁵⁰ Sesus tsipibezenaha zeka Homa sodadutsa mytyryktsa ba ziksibanaha. Iwatsahi katsa Sesus tsipibezenaha zeka wasani my. Kaharere ahahumo tshokdaharēna iwa zeka Homa sodadutsa mytyryktsa ba ziksibanaha — Kajapas niy.

⁵¹ Deus tapara tihi:

— Sesus kytsa sapyzky mohyrikosokda — niy. Ana hi Kajapas batu hyrinymyry. Nitsasokoze:

— Katsa Sesus tsipibezenaha zeka wasani my — niy. Deus harere soho batu ihyrinymyry. Ihyrinymyrybyita tu Deus harere bo yhỹ niy. Hawa mytsaty nikara batu tyso. Sesus Sudeutsa tyryktsa sapyzky mohyrikosokda Deus botu nitsasoko. ⁵² Utsa kytsa bipyritsa sapyzky kino niwatihi mohyrikosokda. Iwatsahi sizubarētsa Deus tyryktsa sakurētsa moziknaha. Iharere bo hyỹ mykaranaha. Iwatahi Sesus mohyrikosokda Deus niy.

⁵³ Iwa zeka Sudeutsa taparaktsa asa zuba nipamykysokonaha:

— Hawa sa Sesus tabeze — nikaranaha. ⁵⁴ Iwatahi Sesus Sudeutsa pokso mekybotu niparak. Eparã bo niy. Eparã jerukbara bo tasapy. Anaeze Sesus tuk zinymyrykynahatsa tuk niapykyryk.

⁵⁵ Sudeutsa kytsa sizubarētsa Serusarēhe bo niukurunaha. Sudeutsa myikaha bo Serusarēhe bo pororo ziknakaranaha. Paskoa mokymyze anaeze Deus taparaktsa nisitsumuēhikĩ ana bo mytsaty ziknakaranaha. Sizubarētsa Serusarēhe bo niukurunaha. Tapara simyikaha kymybyitu tahasopyk tyty nikaranaha.

— Katsa meky watu tsimoziknaha zeka Deus okzeka wasani tsimaha — nisisopykyknaha.

⁵⁶⁻⁵⁷ Iwaze sizubarëtsa Sesus ziperykynaha. Asahi Deus wahoro zubata sturupe eze ziberikinaha. Asahi:

— Mymyikaha bo ja mozumu — nikaranaha. Asa zuba ziperykynahaze nipamykysokonaha. Pariseutsa, taparaktsa Deus wahoro zubata eze ziknapamykysokonahatsa iwatsa aparakbaha nisipehaka. — Aty Sesus piny zeka mybo tytsaso! — niaha. Iwa nitsasokonaha Sesus tsipa humo ziocky tsihikiknaha hÿ.

12

Sesus Betanija eze.

¹ Kyze Sesus Rasaru bo zumu. Atahi zihyrizikpowyta ibo zumu. Rasaru Betanija ezeakta niy. Tapara Sudeutsa myikaha Paskoa inarokoha zumubahanize. Iwaze hi zuba simyikaha nakymy. Iwaze Sesus tuk zinymyrykynahatsa tuk Rasaru bo zumunaha. ² Anaeze Marata sidisahawy humo bu nikara. Rasaru zinymyrykynahatsa tuk tadisahanaha. ³ Maria jokmorënikia zebyykyk niy. Jokmorënikia ty tsasuk tisapyrëna eze narado inarokoha ipokzitsanikia. Atatsa jokmorënikia tsizubarëna ty zibyykyryk niy. Iwatatsahi Sesus zipyrytsa harasusuku. Iwaze atatsa taharadi tyty zipyrywiki niy. Iwahoro tsiokmorëna niypykyryk. Atatsa Sesus humo tsimypokzitsiarëtsa iwatatsahi Sesus zipyrytsa harasusuku. Iwa Maria nikara.

⁴ Sudas Iskariotses Sesus tuk zinymyrykyta tisakparëta mozik. Atakta Sesus humo tsiharerewabymybarëta, sisukyrytsitsa bo myzioktyhyrykta. Atahi zibetsakak ipe nikara:

⁵ — Amy skaraba jokmorënikia ty batu ity huak. Tsipihuak zeka okyrysaro tsizubarëna tsimaha. Iwaze okyrysaro sinamybyitsa bo nyny tsimaha zeka wasani my — niy.

⁶ Sudas Iskariotses zinymyrykynahatsa okyryrsaro suk zikziperyky. Utsa papatu okyryrsaro zikziakseke. Tasyhyryze hi okyryrsaro ziakseke utsa papatu ziknakara. Nitsasokoze — Amy skaraba jokmorēnikia ty batu ity huak — okyryrsaro humo niy. Ata kino okyryrsaro ziakse tsihikik. Imypokzitsiukbyita tu okyryrsaro ziakse tsihikik. Batu sinamybyitsa bo nyny ziky.

⁷ — O awatu betsak betsak byity! — Sesus niy. — Atatsa hi jokmorēnikia ty zipyryktsa harasusuku. Atatsa hi kaokzeka tsimysapyrētatsa jokmorēnikia ty pikarasusuku my niy. ⁸ Sinamybyitsa bo nyny tsimykaranaha zeka wasani my. Utakta ahatuk batu mopykyryk kabo ka ba nyny zikaha. Jokboha kyritoktok ahatuk mopykyryk. Aba kabo ty nyny tsimaha zeka wasani my — niy.

Sudeutsa taparaktsa kino niwatihi nikaranaha: — O Rasaru niwatihi tabezekta! — nikaranaha.

⁹⁻¹⁸ Kyze Sudeutsa sizubarētsa Sesus bo zumunaha. Sesus Betanija eze niapykyrykspyk. Ana ziwabynahaze Sesus Rasaru ahatsa bo niukurunaha sibo inakozorenaha. Atahi Sesus zihyryzikpozota bo inakozorenaha. Sudeutsa sizubarētsa taparaktsa Deus wahoro eze ziknapamykysokonahatsa ihumo batu sispirikpo. Rasaru inahyryzikpoze kytsa Sesus humo sispirikporētsa. Iwaze taparaktsa Deus wahoro eze ziknapamykysokonahatsa nitsasokonaha:

— O Rasaru niwatihi tabezehikta kytsa — nikaranaha. Kyze aparakbaha Sesus bo iktsa nikaranaha. Sesus Rasaru zihyryzikpozote ziwabykynaha. Hawa ipe niy:

— Rasaru pany — niy. Iwaze Rasaru harahare ioke ikny zoihik.

Iwaze Sesus Serusarēhe bo niukuruze pikuza bete tadyhyhyk. Tubabatu Deus harere papeu humo tubabatu

ziwatahaka atsatu Sesus nikara. Iwatahi pikuza bete tadyhyhyk. Deus harere papeu humo tihi:

— O Serusarêhe ezektsa ahasukatsihik byihuja! — niy. —

Ahapehatsa mozumuze pikuza bete tadyhy — niy.

Iwa tubabatu Deus harere papeu humo ziwatahaka. Iwatahi Sesus pikuza bete tadyhyky. Iwa Serusarêhe bo niy.

Sesus Serusarêhe bo zumuku.

Kyze kytsa sizubarêtsa Serusarêhe bo niukurunaha tahamyikaha bo asahi Sesus bo niaha. Ziwabykynahaze:

— O Sesus mozumuku — nikaranaha. Iwaze ibo niukurunaha.

— O Sesus tazikwy ty mybo tsipiwatawyky — nikaranaha. Tazikwy ziwatawykyze Rasaru zihyryzikpowy niy. Anahi ziwabykynaha. Iwatsahi Sesus haraze niukurunaha. Iwaze tsarakzapatsa nasibykyknaha ske buruk nisipaparanaha. Sizubarêtsa nikaranaha. Sesus ispehatsa wata humo.

— Sesus Deus tuk niapykyryk. Mywata niyzik. Deus tukta katsa mybo inasik.

Atakta mypehakatsa my, katsa Isareu tsekokatsa ikia hi mypehakatsa.

Atakta Deus ihumo mymysapywyky hỹ. “O mykurêtsa” — nikaranaha.

Sesus Serusarêhe bo niy. Pikuza bete tadyhyhyk iwa Serusarêhe bo zumuku. Hawa tubabatu Deus harere papeu humo ziwatahaka atsatu Serusarêhe bo zumu. Wasani niy. Sesus Serusarêhe bo niyze hawa tubabatu ziwatahaka. Ana humo hi zinymyrykynahatsa batu sihyrinymyry tsihokdaharêna. Anaharere batu siwabyhy. Aiba zuba mytsaty nikaranaha. Sesus bijoikpe bo nidoze tahapetu sisopyk:

— O Sesus Serusarêhe bo zumuze Deus papeu humo botu ziwatahaka tawata hawa tubabatu ziwatahaka atsatu niyze Serusarêhe bo zumu — iwa Sesus soho bo mytsaty nikaranaha. ¹⁹ Kyze Pariseutsa asa zuba nipamykysokonaha:

— Kytsa sizubarêtsa ihumo sispirikporêtsa nikaranaha. Kytsa myharere bo batu yhÿ zikaha. Katsa tsimyt-sasokonaha zeka “ihumo batu ahaspirikpo” kytsa “ihumo sispirikporêtsa” — nikaranaha. Asa zuba Pariseutsa nipamykysokonaha.

Kerokotsa Sesus bo mynakozore tsihikiknaha.

²⁰ Kyze Kerokotsa Sesus bo mokozorenaha. Asahi ustsá tyryktsa meky ezektsa tu niaha. Asahi Serusarêhe myikaha bo niukurunaha. Sudeutsa tuk Deus bo nipamykysokonaha:

— O ikia zuba tsamysapyrêta. Deus zuba atahi tsipuni-hikrêta bjoikpe eze my tsimaha — nikaranaha. ²¹ Piripi bo nikaranaha. Atahi Betesaida ezekta. Betesaida Karireja eze ky. Ata bo hi niukurunaha. Ipe niaha:

— O Sesus bo tsimynakozore tsihikiknaha — nikaranaha.

²² Iwaze Piripi Ædere pe niy atahi Peduru tsy ipe niy:

— O Kerekotsa Sesus bo mynakozore tsihikiknaha — niy. Kyze Piripi Ædere ahatsa Sesus pe niaha. Asahi:

— O Kerekotsa abo mynakozore tsihikiknaha — mykaranaha. Iwa Sesus bo nitsasokonaha. ²³ Sesus ispe niy:

— Utakta iknasikta maku babata ahawata ikyzik. Aibani mohyrikosokda. Mohyrikosokdaze kytsa piksohonaha! Atakta tsimysapyrêta tsizikwyrêta my — mykaranaha.

²⁴ — Wabytoktotaha niy. Katsaktsa tapara riktsa tsimysipariknaha. Tsimysipariknahaze wytyk bo pokpok tsimykaranaha. Estubaze zuba wytyk eze my, ata hi

taypykze riktsa tsiriktsazubarêta mozik. Hawa riktsa mysiubara iwata tabezewy ziwatawyky. (Iwa nitsasokoze tabezewy soho ziwatawyky.) Tapara mohyrikosokda bykyze mynahyrikiziko my. Iwaze kytsa sizubarêtsa kahumo sispirikporêtsa. Rik soho iktsasokoze hawa rik mysiubara iwa tabezewy soho ziwatawyky — niy.

²⁵ — Aty Deus harere bo yhỹ ahabyizeka mohyrikosokdaze Deus tuk ba zikapykyk. Aty Deus harere bo hyỹ mykara zeka mohyrikosokdaze tawahi Deus tuk mynapykyryk. ²⁶ Aty katukta mozik zeka kaharere bo hyỹ mykara. Kaharere bo zuba hyỹ mykara, katuk tawahi mynapykyryk. Kazo ihumo mykara: O atakta tsimysapyrêta mykara — niy.

Sesus tabezewy soho nitsasoko.

²⁷ Sesus tihi:

— Abaka paikpa mytsaty mykara. Hawa ha ty ja Deus bo mopamykysoko “O kazo kabezetsihikbyita mykara” my. Iwa Deus bo batu tyso. Utakta mybarawy eze sinini mykara naha humo tsimyzihikik zeka yhỹ my. Iwa ibo mopamykysoko — my. ²⁸ Kyze Deus bo mopamykysozo:

— O kazo kytsa bo tysisapywyky. Iwatsahi asoho motsasokonaha “O Deus tsamysapyrêta. Azikwyrênikita tu tsimypokzitsiukrêta” nikaranaha — iwa asoho motsasokonaha. Iwa babatu iaksoho bijoikpe ikny iwaby. Deus tihi:

— Botu kasoho ziwatawyky. Aparakbaha botu kahumo piksohokonaha “O Deus tsamysapyrêta, azikwyrênikita tu tsimypokzitsiukrêta”. Iki hi myhyrikizikwanikita kasoho piwatawykyzo. Kytsa sizubarêtsa kasoho tihi: “O Deus tsamysapyrêta, azikwyrênikita tu tsimypokzitsiukrêta” mykaranaha — Deus niy.

²⁹ Kytsa sizubarêtsa Sesus baze niriktotohokonaha iaksoho ziwabynahaze. Wastuhu kytsa nikaranaha.

— O nitotokoro — nikaranaha. Utsa kytsa batu.

— Bijoikpe iknyktsa Deus tsumuẽhĩtsa ibo nitsaso — nikaranaha. ³⁰ Kyze Sesus ispe niy:

— Iaksoho tsiwabynahaze bijoikpe ikny ahatsyhyryze niy. Batu kahumo ka. Ikiahatsa bohi Deus harere tsiwabykynaha — niy. ³¹ Abadisihi Deus kahumo sispirikpobyitsa bo motsaso ispe my:

— O ikiahatsa batu ahamysapy tsimykaranaha. Sesus humo tsimyspirikpobyrikinaha zeka batu ahamysapy tsimykaranaha. Ahapehatsa Sesus humo mypunihikbyinaha. Batu aty tohi ityryk zikyzyk. Sesus zuba ipunihikanikita my — niy.

³² — Sizubarẽtsa kahumo batu siakparawy. Iwatsahi pikbezenaha. Iharapatawyhyta humo pikyriknaha iwa mohyrikosokda. Iharapatawyhyta pitseknahaze pikbezenaha. Iwa mohyrikosokdaze kytsa nanabyitaba kahumo sispirikporẽtsa moziknaha — nikara.

³³ Sesus tasokoze niy iwaze iharapatawyhyta humo pihyriziknaha. Hawa mohyrikosokda mysihyrinymyryky niy.

³⁴ Sizubarẽtsa ipe niaha:

— Tubabatu Deus harere papeu humo Kiristu soho ziwatahaka. Tubabatu nihyrikosokdata Moises ziwatahaka. Kiristu, Deus zipehata ba zihyrikosokda. Tawahi mynapykyryk — niy. — Ikia “Utakta iknasikta maku babata ahawata ikyzyk” tsimy. Atahi inasikta maku babata mywata mohyrikosokda bykyze mynahyryzikpo tsimy. Atakta ja Deus zipehata niwatihi atsatu sa — nikaranaha.

³⁵ Sesus ispe niy:

— Utakta Deus harere myzubaha bo mysihyrinymyryky. Aba mysihyrinymyryky. Aibani mohyrikosokda iwatsahi kahumo ahaspirikporẽtsa tsimoziknaha. Abaka kahumo ahaspirikporẽtsa zeka

wasani my. Kahumo ahaspirikpo ahabyizeka sinini ykarawy bo tsimaha. Kytsa unata eze batu pão maha. Hana bo mykaranaha miwa humo batu sihyrinomyry. Iwa kytsa kahumo batu sispirikpo miwa ezekeza watsa mykaranaha. Asahi sinini ykarawy tahasapy humo hi batu sihyrinomyry. Kytsa miwa haburuk tu mokurunahatsa watsa.

³⁶ Utakta ahatukze kahumo ahaspirikporëtsaktsa! Iwaze katyryktsa tsimoziknaha. Ahamysapyrëtsa tsimoziknaha. Mekywatu tsimoziknaha. Kytsa iwororoha buruk pitabakanahaze ana bo hi pinynaha ikiahatsa siwatsa tsimoziknaha — niy. Iwaze nitsasobaze niparak. Kytsa sizubarëtsa papatu niparak.

Sudeutsa Sesus humo batu sispirikpo.

³⁷ Kyze Sesus zikwy myzubaha bo ziwatawyky. Asahi ihumo batu sispirikpo. Iwaze iwatawy bo iktsa nikaranahaze ihumo batu sispirikpo. ³⁸ — Tubabatu Deus sohotsa Isaijas botu ziwatahaka:

“O mypehakatsa aharere ty kytsa sizubarëtsa bo ikt-sasoko. Kytsa aharere humo batu sispirikpo.

Ikia azikwy soho humo batu sihyrinomyry.

Ikia azikwy soho sihumo tsihokdaharëna” niy.

Iwa nihyrikosokdata Isaijas kasoho ziwatahaka. Iwaha humo hi kytsa batu kahumo sispirikpo mahaze Isaijas harere wasani my nikaranaha. Isaijas papeu humo ziwatahaka — niy. Asa watsa nikaranaha.

³⁹ Sudeutsa Sesus humo batu sispirikpo. Hawa Isaijas tubabatu ziwatahaka nikaranaha. Isaijas nihyrikosokdata:

⁴⁰ — Deus hawa kytsa mytsaty mykaranaha tsihyrinomyrëta ihumo paikpa mytsaty mykaranaha. Deus zikwy humo batu sispirikpo.

Izikwy bo iktsa nikaranahaze batu ihumo sispirikpo.
 Deus harere ziwabynahaze batu ihumo sispirikpo.
 Ihumo sispirikpobyritsa tu simysapybyitsa
 nikaranaha Deus batu mysiokzo.

Simysapybyritsa situk niapykyknaha.

Batu ihumo sispirikpo iwatsahi simysapybyitsa
 nikaranaha Deus ba zisiokzo — niy.

Iwa tubabatu Deus sohokotsa Isaijas ziwatahaka.

⁴¹ Tubabatu ziwatahaka iwatsa tu Sesus harere ty kytsa
 batu siwabyhy, ana humo hi tsihyrinymyrëta. Iwatahi
 ziwatahakaze Sesus soho ziwatahaka. Aibani zuba aparak-
 baha ana humo hi sihyrinymyrëtsa.

⁴² Sudeutsa taparaktsa sizubarëtsa ihumo sispirik-
 porëtsa. Batu tyso:

— Katsaktsa Sesus humo myspirikporëtsa tsimozik-
 naha. Ana ty hi batu tyso. Pariseutsa pokso sipy-
 byrëtsa ba ziktsasonaha. Sudeutsa wahoro tozeka ja kytsa
 ispe nabo pãotaha. Iwaze ba ziknapupunaha ana pokso
 sipybyrëtsa iwatsahi batu tyso “Sesus humo myspirik-
 porëtsa” — mykaranaha. ⁴³ Pariseutsa harere bo myt-
 satyziu nikaranaha. Kytsa harere humo zuba sakurëtsa.
 Deus humo ka batu. Deus harere humo tsikaeni zuba
 sihyrinymyrëtsa nikaranaha.

Sesus harere tsimysapyrëna baba. Izumuze kytsa Deus
 bo nasioktyhyryk humo iwatahi izumu.

⁴⁴ Sesus sizubarëtsa opykani nisihuahua:

— Kytsa kahumo mynakaranaha zeka kahumo sispirik-
 porëtsa. Ata humo zikpehaka sispirikporëtsa niwatihi —
 niy. ⁴⁵ — Aty pikny zeka kazo kino piny. “O atakta Deus
 tse” my zeka Deus zikpehaka niwatihi yhÿ my — Sesus niy.

⁴⁶ — Uta mybarawy bo ikzumu. Deus harere ty
 pahahyrynymyry iwatahi ikzumu. Kytsa kahumo
 sispirikporëtsa iwatsahi simysapyrëtsa moziknaha.

Kytsa iwororo ha buruk pitabakanahatsa watsa pinynaha siwatsa moziknaha. Hawa wasani mykaranaha sihyrinymyrëtsa, meky watu moziknaha. Simysapyrëtsa hi.

⁴⁷ Aty kaharere piwabykyze iwaze batu yhy my. Uta kino batu tyso: “O ikia Deus okzeka batu amysapy tsimy” iwa batu tyso. Utakta mybarawy bo ikzumu kytsa sizubarëtsa bo my. Sizubarëtsa simysapybyitsa nikananaha kahumo meky watu moziknaha zeka Deus bo mysioktyhyk. Iwatahi ikzumu.

⁴⁸ Asaktsa kahumo batu sispirikpo. Kaharere bo batu yhy mykaranaha. Usta ispe: “Ikiahatsa Deus okzeka batu ahamysapy tsimykaranaha” my. Deus aparakbaha mynasihyritzikpoze ispe my: “Ikiahatsa Deus okzeka batu ahamysapy tsimykaranaha”. Utakta ahasoho ty batu tyso. Usta iwa motsasoko. Kytsa kaharere bo batu yhy mykaranaha zeka iwa ispe my.

⁴⁹ Hawa motsasoko kazo harere my. Iharere hi ahabo motsasokoro. Hawa pahahyrinymyryky iharere zuba mykara. Usta harere ty ka batu tyso. Kazo harere zuba motsasoko. ⁵⁰ Iharere bo hyhy tsimaha zeka meky watu tsimoziknaha. Ahamysapyrëtsa tsimoziknaha. Tsimyhyrikosokdanahaze Deus tuk ahawahi tsimynapykyryknaha. Ana humo hi kahyrinymyrëta. Iwatahi iharere zuba motsasoko — Sesus niy.

13

Sesus tuk zinymyrykynahatsa nisipyrypikik.

¹ Byriri Paskoa maha taeze myikaha nakymy. Sesus zinymyrykynahatsa tuk tadisahaka. Sesus sihumo tsimypokzitsiarëta. Abahi mohyrikosokda naha humo tsihyrinymyrëta. Tazo bo piksizo ana humo hi tsihyrinymyrëta. Iwatahi tahadisahakanahaze hawa sihumo

tsimypokzitsiarêta mysiwatawyky. Sihumo tsimypokzit-siarêta nikara.

² Zinymyrynahatsa tuk tadisahaka. Sudas Iskariotses Sesus sukyrytsitsa bo pioktyhyryk. Sesus soho sukyrytsitsa bo motsasoko. Sudas Iskariotses Simotse my. Hyrikoso sapybara pehakatsa Satanas humo Sudas Iskariotses Sesus isukyrytsitsa bo pioktyhyryk isopyksapybyita nikara. ³ Sesus ana humo hi tsihyrinymyrêta nikara. Atahi:

— O Deus tazikwy ty kabo nynyty niy. Deus kazo zikpeha. Aba Deus bo piksizo — niy. Ana humo kino Sesus tsihyrinymyrêta.

⁴ Kyik niyze takpyzazawy ty zukata niy. Iwaze takwiwy ty okok niy. Tazikuoik humo hañ niy. ⁵ Iwaze pihik ty mypewy bo zisusuku niy. Maraksu maraksu nikara. Zinymyrykynahatsa nisipyrytsapikik. Tapara zipyrypikik iwaze zipyrywiki. Usta bo zipyrypikik iwaze zipyrywiki. Siwatu nisipyrytsapikik. ⁶ Iwaze Simaõ Peduru bo zumuze. Peduru:

— O hawa sa tsimy tsipikpyrytsapik sa — niy.

⁷ — Yhỹ my. Aba nawa humo papyrytsapikik batu ahyrinymyry. Aibani zuba tsipinymyry amy humo papyrytsapik iwatahi aibani zuba tsipinymyry — Sesus niy.

⁸ — O batu ba niy. Ikiakta ba zikpyrytsapik — Peduru niy. Sesus ipe niy:

— Aty pyrytsapik ahabyizeka batu katuktsa tsimy — niy.

⁹ — Tsiplikpyrytsapik zuba taziwazy. Katsyhyrypetsa tuk tu iwaze kaharek tuk tu tsimy hỹ — niy.

¹⁰ — Tsinamurukunahaze batu ahakpiaktsĩ. Tsa-habarazarêtsa. Deus ahasopyksapybyitsa tu tsikykarana-haze pahaokzohik iokzeka nimuruku tawata tsimozik-naha. Deus botu ahamysapybara ty tsikykarannahaze

iwatatu pahaokzo iwatahi inamuruhuknahatsa watsa tsi-moziknaha. Estuba zuba ahatuk imysopyksapybyita tu nikara ba ziookzo. Imysopyksapybyita tu nikara tsiakt-siarêta wata niy.

¹¹ Estuba sisukyrytsitsa bo moparak isopyksapybyita mykara ana humo hi tsihyrinymyrêta iwatahi “Estuba ahatuk imysopyksapybyita tu mykara ba ziookzo” — niy.

¹² Nisipyrytsapikbaze takpyzazawy ty korobykzo niy. Hwibihi mydisahakawy bo zinymyrynahatsa tuk tady-hyzo niy. Ispe niy:

— Ahapyrytsa pikbaze ahahumo ka sa tsihokdarêna niy.

¹³ Ikiahatsa kape tsimykaranaha:

“Mypehakatsa myhyrinymyrykytsa” tsimykaranaha. Wasani tsimykaranaha. Ahapehakatsa. Ahahyrinymyrytsa my. ¹⁴ Iwaze pahatsumuêhîkî iwatsahi ikiahatsa kino niwatihi ustsá kytsa tysitsumuêhînahaktsa! ¹⁵ Ikiahatsa kawatu tynakaranahaktsa! Ahapyrytsa pikiknaha wa. Ikiahatsa ustsá tysitsumuêhînahaktsa! Utakta batu tyso:

“O uta sipehakatsa my. Iwatahi batu isty tsumuêhî.” Utakta ahatsumuêhîkî. Ikiahatsa kawatu ahamytsumuêhîhuktsa! Tyharape tsumuêhînahaktsa tsimykaranaha. ¹⁶ Kaharere tsiwabyziukunahaktsa! Sitsumuêhîtsa pehatsa wa sukni ahabyita my. Zipehata tohi zipehaka harapewa sukni ahabyita my — niy.

¹⁷ — Abaka ahahyrinymyrêtsa tsimaha. Kaharere bo tsimykaranaha zeka ahakurêtsa tsi-moziknaha hÿ.

¹⁸ Ikiahatsa bo motsasoko. Asahi nisiwatawyhik. Estuba ahatuk kasukyrytsitsa bo pikoktyhyryk. Imyspihikbatanikita iwatsahi pikbezenaha ana humo hi kahyrinymyrêta. Hawa ha ty Deus papeu humo tubabatu ziwatahaka atsatu my:

“Estuba maku katukta isopyksapybyita mykara. Atakta kadisahawy ty katuk hauk my ata hi isopyksapybyita my” niy. ¹⁹ Byri puëtsik kytsa pikbezenaha ana kino ahabo motsasoko. Iwaze pikbezenahaze kaharere humo tsimyspirikponaha.

²⁰ Kaharere tsiwabyziunahaktsa! Atakta pipehahik ihumo tsikspirikpokoze kahumo tsaspirikporëta hÿ. Atahi kahumo tsikspirikpoze atakta zikpehahik niwatihi ihumo tispirikporëta hÿ — niy.

Sesus ispe niyzo: — Estuba maku ahatukta kasukyrytsitsa bo pikoktyhyryk — niy.

²¹ Iwa nitsasoze tisukatsihikrëta niy. Zinymyrykynahatsa pe mypubaraty niyzik.

— Tsiwabyziukunahaktsa! Estuba maku ahatukta kasukyrytsitsa bo pikoktyhyryk. Imyspihikbatanikita — iwa sizubarëtsa bo nitsasoko.

²² Iwaze ziwabynaha tsahi paikpa mytsaty nikaranaha. Asa zuba nipamykysokonaha:

— O aty skaraba. Aty sisukyrytsitsa bo sa pioktyhyryk — nikaranaha. ²³ Zinymyrykyta hi Sesus ihumo tsimypokzitsiarëta. Atakta ibaze tu nidyhyky. ²⁴ Iwaze Simaõ Peduru tatsyhyrype ty pawyk niy, zinymyrykyta pe niy.

— “Aty skaraba asukyrytsitsa bo paoktyhyryk” iwa Sesus pe tsimy — niy.

²⁵ Iwaze zinymyrykyta hi Sesus bo okmymy niy. Akbyibatu ipe niy:

— Aty skaraba asukyrytsitsa bo paoktyhyryk — niy. Sesus:

²⁶ — Estuba katuk tamihi ty tumy bo sok my tahi kasukyrytsitsa bo pikoktyhyryk atsatu tsakyhy ty ibo nyny mÿ — niy.

Iwaze atsikara ty okok niy. Zitsakze tumy bo sok niy. Iwaze atsikara tsakyhy ty Sudas Iskariotses bo nyny niy.

²⁷⁻²⁹ Sudas atsikara tsakyhy zioke Sesus ekze niparak. Satanas harere bo hyã niy. Iwatahi hyrikoso sapybara ituk mynapykyryknaha. Sesus ipe niy:

— Aidytykta! Hawa tsimyzeka aidytykta — niy.

Sudas zinymyrykynahatsa okyrysaro zikziperykyta. Iwaze wastuhu kytsa mytsaty ahabyitsa nikaranaha.

— O mydisahawy bo ja — nikaranaha. Utsa kytsa:

— O sinamybyikitsa bo okyrysaro ty nyny my. Ana humo hi Sesus ipe niy: “Aidytykta”. — mytsaty ahabyitsa nikaranaha.

Batu aty tohi Sesus harere bo siwabyhy. Sihyrinymyrybyitsa tu Sudas niparak. Amy humo nitsaso — Aidytykta! Hawa tsimyzeka aidytykta — niy. Anahi nitsasoze zinymyrykynahatsa batu sihyrinymyry. Iharere sihumo tsihokdahaãna.

³⁰ Sudas atsikara tsakyhy zioke eze zoïhik. Zunubaze niparak.

Kaharere ezytyk ahape: — Tyharape pokzitsinahaktsa kytsa! — niy.

³¹ Iwaze Sudas niparakze Sesus ispe niy:

— Utakta ikzumuta maku babata ahawata ikyzik. Abahi mohyrikosokda. Aba kazo piwatawyky “Ikia azikwyrënikita tu tsamypokzitsiukrëta tsamysapyrëta awa suknihabyyita” mykara. Kytsa sizubarëtsa kahyrikosokzawy humo Deus bo mosakibazikiknaha. “O Deus azikwyrënikita tu tsimypokzitsiukrëta. Tsamysapyrëta” mykaranaha. ³² Mytsasokoze “O Deus azikwyrënikita tu tsimypokzitsiukrëta tsimysapyrëta”. Deus kino niwatihi kasoho motsasoko “Katse zikwyrënikita tu tsimypokzitsiukrëta tsimysapyrëta”. Abahi iwa piwatawyky — niy.

³³ — O kahyrytsa watsa bykyhyze ahatuk zikurubyita tu. Abahi tsikpikberinahaze ba zik zikahanaha. Hana bo

my ikahatsa kapik ba zik zikahanaha tsimaha. Iwa botu Sudeutsa bo iktsaso. Atsatu ahabo motsasoko — niy.

³⁴ Puëtsik pahahyrinymyryky — Nawa ahamo kamy-pokzitsiarëta ikiahatsa niwatihiktsa. Pahasapywyky zik-nakara. Ikiahatsa niwatihiktsa. Utsa bo tsisapywyky-naha tyharape pokzitsikinahaktsa! — niy. ³⁵ — Tsinaharape pokzitsikinaha zeka kytsa tihi: “O Sesus tyryktsa” mykaranaha — Sesus niy.

Sesus Peduru nizukpeheze — O batu Sesus kanyhy tsimy — niy.

³⁶ Iwaze Simaõ Peduru ipe niy:

— Hana bo sa ikia tsimykuru — niy.

— Aba hana bo my ikiakta ba kapik zikykta. Ikiakta pyktohitykta kapik tynao — niy.

³⁷ Peduru Sesus pe niyzo:

— Hawata sa uta batu apik my. Abaka ikia apik my. Hawa ikia apik batu yhỹ tsimykara. Uta kino atuk tu apokzi mohyrikosokda — niy.

³⁸ — Paze! kapokzi tsimyhyrikosokda ja niy. Kaharere bo mytsatytykta! Kokuaro ipobyize harakykbyi “Batu Sesus kanyhy” mybarapetu tsimykara — Sesus niy.

14

Sesus humo hi Deus hyrytsa tsimoziknaha, atahi myske wata.

¹ Sesus tuk zinymyrykynahatsa pe niy.

— O mytsaty mytsaty byijataha. Ahasukatsihikby-ihu ja tynakaranaha! Ikiahatsa Deus humo ahaspirikporëtsa. Kahumo kino niwatihi ahaspirikporëtsaktsa kytsa! ² Wahoro zuba kazo baze my. Ikiahatsa tsyhyryze wahoro tsizubarëna. Wahoro ahabyizeka ikiahatsa bo ba ziktsaso. Abaka ahatsyhyryze pahawanusapy. Ba ahabyizeka ahape ziky. ³ Aba piksi. Ahawanu sapy pikymy

zeka ahabo myziksizo. Pahaoktyhyryk. Iwaze katuk tsinapykyryknaha. Ahawahi katuk tsinapykyryknaha. Katuk tu tsipahasapynaha. ⁴ Ske tsinybanaha. Hana bo mokuru naha bo hi tsinymyrykynaha hỹ – niy.

⁵ Tome:

– Hana bo sa tsimy kara katsaktsa batu myhyrinymyry. Asapy sa haneze katsaktsa batu myhyrinymyry. Iwatsahi hawa sa nabo tsimykurunaha ana humo hi batu myhyrinymyry hỹ – niy.

⁶ Sesus ispe niy:

– Uta hiba ahaske wata buruk kazo sapy bo pahaoktyhyryk. Utakta Deus harere baba ty pahahyrinymyryky kahumo zuba meky watu tsimoziknaha. Ahamysapyrẽtsa kahumo tsimoziknaha. Ikiahatsa kahumo zuba Deus bo tsipomonaha. ⁷ Abaka ikiahatsa botu tsiknynaha hỹ iwatsahi kazo kino niwatihi tsinynaha. Hawa ikykara naha bo iktsa tsikykaranaha zeka anawa hi kazo mykara ahahyrinymyrẽtsa hỹ – Sesus niy.

⁸ Piripi Sesus pe niy:

– Azo ty mybo tsiwatawykta! Azo bo iktsa tsimaha zeka mykurẽtsa tsimaha – niy.

⁹ – O Piripi tubabatu ahatuk ziknapykyryk. Iwatatu sa batu katyny. Ahatuk tu ziknapykyrykta tu batu katyny niy. Aty pikny zeka ata kino niwatihi kazo ziny. Iwatahi amo humo sa tsimytsasoko. “Azo ty mybo tsiwatawykta! tsimy” – niy.

¹⁰ – Uta kazo wata anatyhi yhỹ tsimaha katsa harapewatsa tu. Batu kaharere zuba ahawabyhy. Kazo harere kino ahabo motsasoko. Hawa kazo nitsasoko naha hi motsasoko. ¹¹ Uta kazo wata. Harapewatsatu tsimaha. Kaharere bo tsikaeni zuba yhỹ tsimaha zeka iwaze kazikwy humo tsimyspirikpotohinaha – niy.

¹² — O wabyziutahaktsa kytsa. Katuktsa kahumo sispirikporëtsa kawa tu sisopyk. Uta kazo bo piksize izikwy piwatawy. Hawa kytsa bo kazikwy humo iwatawy katuktsa kino niwatihi kazikwy humo kytsa bo piwatawynaha. Kazo bo piksize iwatsahi katuktsa kazikwy tsizubarëna kytsa bo piwatawykynaha. ¹³ Kabo tsinapamykysokonaha zeka “Hawa ha ty tsimyzehikiknaha ana hi tsinazapykykynaha” tsimykaranaha. Iwaze hawa ha tsinazapykykynaha anatyhi ahabo nyny mynakara. Kytsa tihi: “O Deus amysapyrënikita” mykaranaha. Hawa ha ty tsikzapykykynaha ty ahabo nyny myze kytsa Deus soho “imysapyrënikita” — mykaranaha. ¹⁴ Ikiatsa kabo tsimypamykysokonaha zeka:

— Hawa ha tsimyzehikiknaha ty zuba tsimykaranaha. Iwaze anahi tsimyzapykykynaha atsatu ahabo nyny mynakara. Tsizubarëna ty ahabo nyny mynakara — niy.

Sesus tazo pe: — O kazo usta atsumuëhïtsa kawata katuktsa bo tyzipehahikta — niy.

¹⁵ Sesus tihi:

— Ikiatsa kahumo ahamypokzitsi zeka kaharere bo hyÿ tsinakaranaha — my. ¹⁶ Kazo pe my zeka:

— O kazo usta tsumuëhïtsa katuktsa bo myzipeha. Usta tsumuëhïtsa kawata tyzipehakta my. Iwaze ihyrikoso myzipeha. Pahahyrinomyry, tawahi ahatuk mynapykyryk. ¹⁷ Kytsa kahumo batu sispirikpo asahi iharere bo batu yhyÿ zikaha. Iharere sihumo tsihokdaharëna. Iharere humo ka batu sihyrinomyry. Ikiatsaktsa tsahyrinomyrëtsa. Iharere kino ikiatsa humo batu ihokzaha — niy.

¹⁸ — Bakta kawahi paharekta ziwazy. Ahabo myzik-sizo. ¹⁹ Aba nurübabatu kytsa kahumo sispirikpobyitsa ba ziknyzonaha. Ikiatsa iwatsa tu tsipiknyzonaha.

Ikiahatsa niwatihi tsimynahyrizikponaha. Iknahyrizikponaha humo ahamysapyrëtsa tsimoziknaha. ²⁰ Uta kazo harere bo hyÿ mynakara. Ikiahatsa kaharere bo hyÿ tsinakaranaha. Uta kino niwatihi ikiahatsa tuk yhyÿ mykara. Iwa mysopyk tsimykaranaha. Bykyze ana hi tsipinymyryknaha.

²¹ Aty kaharere bo hyÿ my zeka atahi kahumo tsimypokzitsiarëta mykara. Atahi kazo mozipokzitsiki. Uta niwatihi mozipokzitsiki. Kasoho humo pinymyryky. Kasoho humo tsihyrinymyryrëta mozik – niy.

²² Sudas Tadeu tihi:

– Hawa skaraba mybo zuba asoho tsipiwatawyky Asaktsa ahumo sispirikpo ahabyizeka asoho batu tsipiwatawy. Hawa tsimy – niy. Iwa Sudas nitsaso. Atakta batu Sudas Iskariotses. Usta Sudas Tadeu inarokota.

²³ Sesus nitsasokozo:

– Asaktsa kahumo simypokzitsirëtsa kaharere bo hyÿ mykaranaha. Kazo sihumo tsimypokzitsiukrëta, iwatahi situk mynapykyryk. Kazo situk mynapykyryk. Uta niwatihi katsa situk mywahi tsinapykyryknaha. ²⁴ Sispirikpobyitsaktsa kaharere bo batu yhyÿ zikaha. Kaharere kazo botu nitsasoko ana kino tsipiwabynaha. Kazo zikpeha iharere hi motsasoko.

²⁵ Ikiahatsa tuk tihi motsasoko. ²⁶ Kyze kazo hyrikoso ahabo pipehahik. Kaharere humo tahyrikoso ahabo myzipeha. Atahi ahatsumuëhïtsa mozik. Pahahyrynymyry. Uta ahahyrynymyryky ana humo hi batu ahaspiriktsokdahu. Kaharere ty pahaspirikpoziuku. Deus hyrikoso tsimysapyrëta hÿ.

²⁷ Kytsa kahumo batu sispirikpo paikpa mytsaty mykaranaha. Katuktsa batu sispirikpobyitsa watsa. Utakta batu paikpa mytsaty mykara. Iwatahi ikiahatsa kawata mytsaty mytsaty byitaha. Ahakurëtsa tsimaha.

Kahumo ahapyby byihu ja. Kahumo ka ahasukatsihik byihuja. Kahumo tyspirikpokonahaktsa iwatsahi tsahapunihikrëtsa tsimoziknaha — niy.

²⁸ Botu tsiwabykynaha:

— Utakta piksi. Bykyze myziksizoze ahatuk mynapykyryk. Anahi motsasokoze tsiwabykynaha. Uta kazo bo. Kaharere bo ma tahaktsa. Kazokta abazubata my. Iwatsahi ahakurëtsa tsimahaktsa kytsa! Kazo humo ahampokzitsirëtsa. Tspikpokzitsikinaha zeka ahakurëtsa tsimoziknaha. ²⁹ Aba motsasoko kyze piksi.

“Piksi zeka kahumo ahaspirikporëtsa” — mytsaty mykara. — Aba piksi hawa ahabo iktsasoko, ana humo hi ahaspirikporëtsa.

³⁰ Aba Satanas harere humo kytsa kahumo batu sispirikpo ispehatsa atahi kabo mozumu. Iwatahi ahabo tsikaeni zuba motsaso. Atahi batu kakzotsabyita. Iharere bo yhyhabyita ziknakara — niy.

³¹ — Uta kazo harere bo zuba hyÿ mynakara. Kazo humo kamypokzitsiarëta mykara. Iwatahi iharere bo zuba hyÿ mykara. Kytsa kahumo batu sispirikpo asa bo hi piwatawyky. Utakta Deus harere bo zuba hyÿ mynakara anabo hi mysiwatawyky — niy.

— Kyikyitahaktsa. Tupaktsa kytsa! — niy.

15

Sesus hi duabohotsa sa wata.

¹ Kyze Sesus:

— Uta hi duaboho taypykze mytahara tawata my. Kazo waratok tsihitsa wata my. Waratok eze duabohozatsa nisiparikik.

² Katukytsa duabohotsa sakatsa watsa maha. Asahi kazo harere bo batu zikahabyitsa sisakatsa watsa, asaktsa

ziktaharanaha ahabyizeka tahasazyzykykwynaha. Ust-saktsa siharahoktsa tsihitsa duaboho taypykze sisupesapy mysisakakare zeka iwatsahi nataharasukbabyinaha. Iwa kazo tihi mykara. Katuktsa iharere bo batu yhỹ mysisakakareke tawata. Kazo katuktsa situk mynapamykysoko iwatsahi simysapybyitsa nikaranaha pimowynaha iwa mysitsumuẽhĩkĩ. Hawa sibo mykara wasani my ana humo hi simysapyrẽtsa tohi mykaranaha hỹ.

³ Kazo ahamysapybyitsa tsikykaranaha botu zahaokzohik. Kaharere bo hyỹ tsimykaranaha zeka ahamysapybara ty botu zahaokzohik.

⁴ Kaharere bo hyỹ tynakaranahaktsa kytsa! Kaharere bo hyỹ tsimaha zeka uta ahatuk mynapykyryk. Atsa botu mytsaty tsimykaranaha. Mykurẽtsa tsimoziknaha. Duabohotsa sa ypyk ahabyizeka ba ziktaharanaha. Ikiahatsa niwatihi. Kaharere bo yhỹ ahabyi zeka kazo tuk kino niwatihi batu yhỹ tsimaha. Hawa kazo mozihikik batu ahahyrinymyry – Sesus niy.

⁵ – Uta duabohotsa sa taypyknahaze mytaharanahaze tawata. Ikiahatsa duabohotsa sa watsa tsimaha. Kaharere bo hyỹ tsimaha zeka Deus okzeka ahamysapyrẽtsa tsimaha. Uta kino niwatihi ahatuk yhỹ mykara. Katsa mykurẽtsa hi. Ikiahatsa kaharere bo batu yhỹ ahabyizeka hawa tsimaha Deus okzeka batu ahamysapy. Hawa tsimaha Deus okzeka mahani tsimaha – niy.

⁶ – Asaktsa kaharere bo yhỹ ahabyi zeka sipaparahatsa watsa. Waratok tsihitsa siharabyitsa nisizyzykyk izo bo nisiwezohik. Mynaparanahaze izo bo piwezona. Iki-ahatsa niwatihi katuk tsimynapykyryknaha ahabyizeka ahakubyitsa tsimaha – niy.

⁷ Iwatsahi kaharere bo hyỹ tynakaranahaktsa katuk tsimykaranaha, katuk tsinapykyryknaha zeka amy ty

Deus bo tsinazapykykynaha atsatu ahabo nyny my.
⁸ Ikiahatsa kazo harere bo hyĩ tsimykaranaha zeka kytsa kazo pe maha:

— O ikia tsamysapyrēta — mykaranaha. Iharere humo hyĩ tsimykaranaha zeka kytsa ahasoho motsasokonaha:

— O asahi Sesus tuktsa maha — mykaranaha.

⁹ — Uta ikiahatsa humo kamypokzitsiarēta. Kazo wata atahi kahumo tsimypokzitsiukrēta my. Ahakuhuktsa kytsa! Sesus myhumo tsimypokzitsiukrēta. Iwatsahi ahakurētsa. ¹⁰ Kazo harere bo hyĩ mynakara. Iwatahi kazo kahumo tsimypokzitsiukrēta. Iwaha bo hi mytsaty mykara zeka kakurēta hi. Ikiahatsa kino niwatihi kaharere bo hyĩ tsimykaranaha zeka ahakurētsa tsimoziknaha. Sesus katsa myhumo tsimypokzitsiukrēta. Iwaha bo hi mytsaty tsimykaranaha zeka ahakurētsa tsimoziknaha — niy.

¹¹ — Iwa motsasoko iwaze kahumo ahakurētsa tsimoziknaha. Uta kakurēta hĩ. Ikiahatsa tsikaeni zuba ahaku zeka batu myzehikik. Ikiahatsa ahakurētsa babatsa tsimoziknaha zeka iwa hi myzehikik. Kawatsa tsimaha. Kakurēta hi — Sesus niy.

¹² Ahape mykara:

— Tynaharape pokzitsikinaha! Ahakuri byihuja. Uta pahapokzitsiki ikiahatsa kawa tihi tynakaranahaktsa. ¹³ Aty tatuktsa pokzi mohyrikosokda zeka kytsa mykaranaha:

“O atakta itukta humo tsimypokzitsiarēta”. Myhyrikosokdaze iwa itukta humo tsimypokzitsiukrēta hiba — nikaranaha.

¹⁴ — Ikiahatsa kaharere bo hyĩ tsimykaranaha zeka ikiahatsa katuktsa babatsa — my. ¹⁵ Ahasoho ty batu tyso — O asahi katsumuēhĩtsitsa mykaranaha. Hawa tsihitsa mykara tatsumuēhĩtsitsa bo batu tyso. Ahahumo meky

watu kasopyk. Ikiatsa kaharereziuwytza tsimoziknaha. Nawa kazo kabo nitsasoko atsatu ahabo motsasoko. Iharere ahabo botu iktasoba.

¹⁶ Ikiatsa humo ka batu kawatawyhy “O katsakta atuktsa tsimoziknaha” tsikaha. — Iwa batu tyso. Uta hi ahawatawyhik.

— Asahi katuktsa moziknaha — icy. Iwa motsasoko.

— Utsa bo pahapehahik iwatsahi kahumo sispirikporëtsa ahaharere humo. Asahi kahumo sispirikporëtsa hi. Amy ty Deus kazo bo tsinazapykyknaha zeka kaharere humo iwatsa tu ahabo nyny my.

¹⁷ Ahatuk napykyknahaze tynaharape pokzitsikinaha — iwa mykarazo.

Kytsa Sesus humo sispirikpobyitsa hi iwatsahi Sesus tuktsa nasisukyryknaha.

¹⁸ Sesus nipamykysokozo:

— Kytsa kaharere bo yhy ahabyi zeka asahi kahumo tahakyrikinaha iwatsahi ahabo kino niwatihi batu siakparawy. Pahamyijakanaha. Pahasukyryknaha. Taparaka batu kahumo siakparawy ana bo hi mytsatziutahaktsa kytsa — niy. ¹⁹ Ikiatsa mekwatsa tu tsimoziknaha. Asahi Deus humo batu siakparawy siwatsa batu tsimykanaha. Uta hiba ahawatawyhik katyryktsa tsimoziknaha iwatsahi kytsa ahahumo batu simypokzitsiu. Iwatsahi tahakyrikinaha. Pahamyijakanaha. Pahasukyryknaha. Ikiatsa siwatsa tsimyzurukunaha zeka ahahumo siakparawy.

²⁰ Kaharere bo wabyziutaha! Ahatuk tu ka tysosobyi-jataha:

— O kapehatsa zisukyryknaha. Katsakta batu. Batu myty myija — mytsaty ahabyitsa tsimykanaha. — Kytsa kahumo batu sispirikpo zikapikiknaha. Iwatsahi aha humo kino niwatihi pahapikiknaha. Kaharere bo ma

ahabyitsa ziknakananaha ahaharere bo niwatihi batu ma zikaha — niy.

²¹ — Kapokzi ikiahatsa sinini tsimykananaha. Kytsa kaharere bo yh̃y ahabyizeka pahasukyrykynaha. Deus zipehata humo batu sispirikpo iwatsahi pahasukyrykynaha. ²² Uta sibo zuk ahabyi zeka Deus okzeka wasani mykananaha tsawatsa. Deus harere ty sibo tyso ahabyizeka Deus okzeka wasani mykananaha tsawatsa. Uta ikzumutawy. Kaharere bo batu yh̃y mykananaha iwatsahi Deus okzeka batu simysapy mykananaha — niy.

²³ — Kytsa kahumo batu siakparawy. Kahumo tahakyrikinaha kazo humo kino niwatihi tahakyrikinaha. Asahi ihumo tahakyrikinaha iwatsahi batu siakparawy. ²⁴ Kazikwy tsizubarēna bo iwatawyky. Utsa zikwy tsikaeni zuba. Utakta kazikwy tsizubarēna. Batu aty tohi zikwykyta. Kazikwy ty tyny ahabyizeka wasani mykananaha. Kazikwy zinynaha. Zinynahatsa tu kahumo batu sispirikpo. Iwatsahi Deus okzeka batu simysapy mykananaha. Batu wasani mykananaha kazo batu siakparawy. Uta kahumo kino niwatihi batu siakparawy mykananaha — niy.

²⁵ Deus papeu humo sisoho botu ziwatahaka:

— Batu istry myi. Batu aty tohi humo ykyrisukni. Iwatsa tu kahumo ziknatakyrikinaha — niy.

²⁶ Kazo bo piksizoze ipe my:

— O kazo ahyrikoso tsipehahikta. Katuktsa bo tsipeha — my.

— Iwaze ikiahatsa bo pipeha. Atahi pahatsumuēhikī. Hawa wasani atsatu pahahyrinymyryky. Kasoho ty pahahyrinymyryky. ²⁷ Ikiahatsa kino niwatihi. Kasoho humo kytsa tysihyrinymyrykynaha. Ikiahatsa katuk tapara tu tsikapkyryknaha. Iwatsahi kasoho humo kytsa ty tysihyrinymyrykynaha — niy.

16

¹ Sesus:

— Kyze iwa ahabo tsizubarëna iksasoko. Bykyze kytsa ahape mykaranaha:

“O Sesus harere bo batu yhỹ tsimaha! Ihumo niwazuba tsimahaktsa!” mykaranaha. Iwaze kaharere bo mytsaty tykaranahaktsa. Iwatahi tsizubarëna ahabo motsasoko.

² Kytsa ahamo tahakyrikinaha. Asahi ahape: “Sudeutsa wahoro bo ba zikpupuzonaha” mykaranaha. Pahaba tsihikiknaha. Pahabanahaze iwa mytsaty mykaranaha. “O Deus okzeka wasani tsimykaranaha” mybarapetu mykaranaha.

³ Zahasukyrykynahaze kazo humo batu sispirikpo. Kahumo niwatihi batu sispirikpo iwatsahi pahasukyrykynaha. ⁴ Iwatahi ahabo motsaso. Aibani kaharere bo mytsaty tsimykaranaha. Pahasukyrykynaha zeka ahatuk zuba tsimypamyksokonaha “O tapara mypehatsa iksibyize mybo botu nitsaso. Kytsa mymysukyrykynaha anahi botu nitsaso tsimaha” — niy.

Deus hyrikoso pahatsumuëhĩ.

⁵ Sesus nitsasokoze:

— Abaka zikpehata bo piksizo. Batu aty tohi kape ziky hana bo sa tsimy. Iwa batu tyso. ⁶ Piksizo zeka ana humo hi ahasukatsihikrëtsa. Iwa motsasoko ahasukatsihikrëtsa. ⁷ Hawa tisapyrëna motsasoko. Erete ahabyizeka Deus hyrikoso ba ziknasik. Ahatsumuëhĩtsa ba zikzumu. Piksi zeka ahabo myzipeha. Iwatsahi ahakurëtsaktsa kytsa. Kazo bo piksizo ana humo hi ahakurëtsa tsimoziknaha — niy. Atsatu tsinakaranaha. Iwatahi taparaka ahape ziknakara.

⁸ Myzumuze kytsa kaharere humo batu sispirikpo atahi ispe my:

— Kytsa kahumo batu sispirikpo Deus okze batu simysapy mykaranaha. Deus zuba kytsa humo nasisapywyky. Ihumo zuba simysapyrëtsa moziknaha. Kytsa simysopyksapybyitsa nikaranaha humo pisininiwyky iwa Deus hyrikoso mynasikze motsaso.

⁹ Kytsa kahumo batu sispirikpo iwatsahi Deus okze batu simysapy mykaranaha ziknaharapesapybyrikinaha. Kahumo batu sispirikpo iwatsahi simysapybyitsa mykaranaha. Kaharere bo batu yhy zikaha iwatsahi ziknaharape sapybyrikinaha batu simysapy mykaranaha.

¹⁰ Kazo bo piksizoze ba ziknywyzo. Jobo kazo bo myzo ba ziknywyzo. Deus hyrikoso kytsa pe: “Sesus tisopyksapyrëta wasani isopyk” — mykara. ¹¹ Deus botu nitsaso. Taparakta kytsa Sesus harere bo batu yhy niy Satanas inarokota sininiwy mykara. Iwatahi Deus hyrikoso kytsa pe simysapybyitsa nikaranaha asahi Deus mysininiwyky.

¹² Ahabo motsaso tshikik tsizubarëna my. Abaka ba ziktsasozo. Ahasukatsihikrëtsa iwatahi ababo ba ziktsaso.

¹³ Hawa wasani Deus hyrikoso pahahyrinymyryky. Myzumuze hawa wasani motsasoko. Taharere ka ba ziktsaso. Tapara botu ziwaby ana kino ababo motsasoko. Hawa aiba tohi mykara ana humo kino pahahyrinymyryky. ¹⁴ Pahahyrinymyryze Sesus tisopyksapyrëta wasani mykara iwa kytsa ihumo motsasokonaha. Wasaniha ty zuba ababo motsasoko.

¹⁵ Kazo mykara naha ty uta kino niwatihi mynakara. — Deus hyrikoso harere ababo motsasoko — niy.

Ahasukatsihikrëtsa tsimoziknaha. Bykyze ahakurëtsa tsimozikzonaha.

¹⁶ Sesus nitsasoko:

— Abanurybabatu piksi, kabo ba ziknynaha. Aiba zuba kabo tsipiknyzonaha — Sesus niy.

¹⁷ Zinymyrykynahatsa asa zuba nikaranaha:

— Hawa skaraba mykara. “Abanurybabatu piksi. Kyze kabo ba ziknynaha. Utakta kazo bo my niy.” Hawaha skaraba mybo nitsasoko. Iharere tsihokdaharëna. ¹⁸ Amy humo “aiba zuba tsipiknyzonaha”. Iharere myhumo tsihokdaharëna — nikaranaha.

¹⁹ Sesus amo zinymyrykynahatsa mytsaty nikaranaha ana humo kino tsihyrinymyrëta. Iwaze ispe niy:

— Ahabo motsasokoze “abanurybabatu piksi. Kabo ba ziknyzonaha. Aiba zuba kabo tsipiknyzonaha hÿ”. Ana hi ja tsimytsasokonaha — niy. ²⁰ Ikiahatsa bo motsasoz-iuku:

— Mohyrikosokdaze tsimopuziukunaha. Kytsa kahumo batu sispihik asahi batu sisukatsihik ikiahatsa zuba ahasukatsihikrëtsa tsimoziknaha. Iwaze puëtsik zuba ikiahatsa tsimysukatsihikbyrinaha. Tsahakurëtsa tsimoziknaha.

²¹ Wytyk ibykyhy natapyrize tisukatsihikrëtatsa. Itsapyri humo tisukatsihikrëtatsa. Ibykyhy mopurukze myitsapyripykze tsakurëtatsa. Iwatatsahi tabykyhy humo tsakurëtatsa iwatatsahi itsapyri humo nispirikt-sokda. ²² Ikiahatsa atatsa watsa tsimaha. Abaka ahasukatsihikrëtsa. Utakta piksiki ana humo hi ahasukatsihikrëtsa. Aiba ahabo myzumuze, ahakurëtsa tsimozikzonaha. Batu aty tohi isukatsihik. Ahawahi ahakurëtsa tsimoziknaha.

²³ Deus hyrikoso mozumuze pahahyrinymyryky. Iwat-sahi kabo batu tyso “katsa mymyhyrinymyry”. Kaharere ba zikokza my. Deus hyrikoso kaharere pahahyrinymyry. Wabyziutaha! Amy ty Deus bo tsimyzapykykynaha zeka kaharere humo, ana ty hi ahabo nyny my. Deus bo tsimyzapykykynaha zeka kaharere humo wasani my ana humo hi ahabo nyny my.

²⁴ Deus bo batu tysapykyk kaharere humo yh̃ tsimaha my. Tyzapykynahaktsa! Hawa ha ty Deus myzehikik ana hi tsimyzapykykynahaze ana ty hi ahabo nyny my. Kazo ahabo nyny my zeka ahakurëtsa tsimoziknaha. Ahakurëtsa h̃.

Sesus Satanas zikwy zipyk iwatsahi tsikahapunihiknahaktsa kytsa!

²⁵ — Taparaka kaharere tsihokdaharëna. Iktsasokoze kaharere tsihokdaharëna. Kaharere iokpitsih̃ hawa ziknaukuru. Aibani zuba kazo harere ahabo motsasoze, mahani ihokdaha. Kazo harere motsasokoze batu ihokdaha. ²⁶ Mytsasokoze iokpitsih̃ibara wa mozik. Kazo bo hawa kaharere bo yh̃ my ana hi tsimyzapykykynaha. Utakta kazo bo batu ahatsyhyryze ba zikzapyky ikiahatsa tu kazo bo tsimyzapykykynaha h̃.

²⁷ Ikiahatsa hi tsimyzapykykynaha. Kazo ahaharere piwaby h̃. Ikiahatsa humo tsimypokzitsiukrëta iwatahi pahawaby. Ikiahatsa kahumo ahampokzitsirëtsa iwatahi kazo ahahumo tsimypokzitsiukrëta my. Tsimytsasokonaha zeka “O Deus Sesus tsikzipaha tisapyrëna” tsimaha. Iwatahi ahahumo tsimypokzitsiukrëta.

²⁸ Kazo ikny ikzumu. Mybarawy bo iknasik. Mybarawy ezektsa bo ikzumu. Mohyrikosokdaze kazo bo piksizo — niy.

²⁹ Zinymyrykynahatsa ipe niaha:

— Abaka tsiwabyziukunaha. Aharere mahani ihokdaha. Abaka ipitsih̃ibara ty tsimytsasoko. ³⁰ Ikiahi tsihyrinymyrëta. Tsizubarëna humo tsahyrinymyrëta h̃. Amy bo mytsaty tsimykarannahaze anahumo hi tsahyrinymyrëta. Iwatsahi “Hawa tsimykara” batu tyso, amy ty tsinymyrykynaha ana hi mybo tsimytsasoko. Iwatsahi “Deus zipehata babata tsimy” — tsimytsasokonaha.

³¹ — Abaka ja kahumo ahaspirikporëtsa — Sesus niy.

³² — Aba nanabyitaba tsimopaparahanaha. Kasukyrytsitsa pokso paikpa mytsaty tsimykaranaha. Ahapybyrëtsa. Kytsa pahabezenaha pokso iwatsahi tsimywakbaiknaha. Ahapybyrëtsa hỹ. Uta zuba motare. Tsipikarekbanaha zeka uta zuba motare. Iwaze kazo zuba katuk. Kazo zuba ba zikare — niy.

³³ — Iwa motsasoko iwatsahi mytsaty mytsaty byitahaktsa kytsa kahumo ahaspirikporëtsa. Kytsa kahumo batu sispirikpo asahi pahasukyrykynaha. Utakta sispirikpobyitsa pehatsa zikwy pepykbaik. Iwatsahi ahapunihikrëtsa tsimoziknaha — Sesus niy.

17

Sesus tazo bo nipamykysoko.

¹ Kyze Sesus bjoikpe bo iktsa niy, tazo bo nipamykysoko:

— O kazo utakta atse babata my. Nawa ty botu tsiktsasoko kasoho ana hi myzubaha bo iky uta kamysapyrënikita kapunihikrënikita tsiky ana hi tsiwatawyky. Uta kino niwatihi my. Myzubaha bo iky “O Deus kazo imysapyrënikita ipunihikrënikita iwa iksiwatawy”.

² — O Deus azikwy ty botu kabo nyny tsiky iwatsahi kytsa kahumo sispirikporëtsa. Iwatsahi kytsa meky watu moziknaha. Kahumo simysapyrëtsa moziknaha. ³ Ikia zuba Deus babata. Utakta atse babata. Ikia tsikpeha. Mybarawy bo tsikpeha. Utakta Sesus Kiristu, mybarawy bo iknasik. Kytsa kaharere bo hỹ mahaze simysapyrëtsa moziknaha. Kytsa ahumo mospirikponahaze simysapyrëtsa moziknaha. Myhumo sispirikporëtsa. Myhumo simysapyrëtsa moziknaha.

⁴ Ikia aharere botu kabo tsiktsaso, ana kino myzubaha bo iktsasoko. “Deus imysapyrënikita ipunihikrënikita”

ana kino myzubaha bo iktsasoko. Abaka kahyrizikt-sokzawy nepykba.

⁵ — O kazo tapara ikia tukze bijoikpe iknyktsa atsumuẽhĩtsitsa kasoho ziknatsasokonaha:

“O Sesus imysapyrẽnikita ipunihikrẽnikita” ziknakaranaha. Tapara ikia bijoikpe mybarawy aha tsikzukni bijoikpe iknyktsitsa atsumuẽhĩtsitsa kasoho humo. “O atakta imysapyrẽnikita” ziknakaranaha. Abaka abo piksizoze iwa motsasozonaha hỹ — niy.

⁶ Iwaze zinymyrynahatsa tsyhyryze tazo bo nipamykysoko:

— O kazo ikia wastuhu kytsa tsiksiakzoko. Asahi atyryktsa niyzikiknaha. Ikia kytsa tsiksiakzohikze iwaze ikia humo katyryktsa niyzikiknaha. Azikwy sibo iwatawyky. Aharere bo hyỹ mykaranaha. ⁷ Sihyrinymyryrẽtsa mykaranaha. Hawa ha iktsasoko aharere zuba my, ana humo kino sihyrinymyryrẽtsa mykaranaha. ⁸ Hawa ha ty botu kabo tsiktsasoko kytsa kahumo sispirikporẽtsa atsatu iktsasoko. Aharere humo wasani mykaranaha. Ikia tsikpeha ana hi zinymyrykynaha. Ikia tsikpeha ana humo hi wasape mykaranaha.

⁹ — O kazo kakzohotsa tsyhyryze abo mopamykysoko. Utsa kytsa kahumo batu sispirikpo batu tyso. Asahi katyryktsabyitsa tu. Kakzohotsa iksihyrinymyryky sityhyryze zuba abo mopamykysoko.

¹⁰ Kytsa kahumo sispirikporẽtsa atyryktsa moziknaha. Iwatsahi katyryktsa kino niwatihi moziknaha. Mytyryktsa moziknaha — Sesus niy.

— Kaharere humo simysapyrẽtsa niyziknaha. Iwatsahi ustsahy kytsa kahumo sispirikpobyitsa pe maha: “O atakta imysapyrẽnikita ipunihikrẽnikita my ityryktsa simysapyrẽtsa humo maha” mykaranaha. Iwa motsasokonaha.

¹¹ — O kazo ikia zuba wasani tsinakara. Azikwy ty botu kabo nyny tsiky. Iwatahi azikwy hi kazikwy mozik. Abaka abo piksizo. Mybarawy eze ka ba mynapykyryk. Ikia bozo my. Katuktsa mybarawy eze mynapykyryknaha tysipokzitsiki. O kazo tysipokzitsikikta. Uta atukze atsabotu mytsaty tsimykaranaha abaka asa kino niwatihi atsa botu mytsaty mykaranaha kazo — my.

¹² — Uta situk ziknakaraze kytsa kaharere bo hyÿ ziknakaranaha. Uta ziknasipokzitsiki iwatsahi kahumo sispirikporëtsa. Myzubaha abo mysioktyhyryk. Estuba zuba katuk ba ziocky atakta batu isopyksapy. Atakta batu imysapy nikara iwatahi ba ziocky. Botu apapeu humo ziwatahaka niy. Nawa batu isopyksapy nikara, botu papeu humo ziwatahaka atsatu nikara.

¹³ Abatu abo piksizo. Zinymyrykynahatsa situk abo mynapamykysoko. Kaharere humo sakurëtsa moziknaha. Uta kakurëta asa kino niwatihi kawatsa sakurëtsa moziknaha. Sakurëtsa babatsa mysitsihikik!

¹⁴ Aharere botu sibo iktsasoko. Kasopyk humo sispirikpobyitsa meky watu sisopyk. Katuktsa niwatihi. Asahi sispirikpobyitsa sopyk humo meky watu mykaranaha. Iwatsahi sispirikpobyitsa katuktsa humo tahakyrikinaha. Mekywatsa humo sispirikpobyitsa tahakyrikinaha.

¹⁵ — O kazo “katuktsa mybarawy ekze ka ba ziksiokty” Katuktsa mybarawy Ezektsa humo tysipokzitsikikta kazo! Hyrikoso sapybara pehatsa Satanas inarokota katuktsa ipokso sipybyrëtsa iwatahi tysipokzitsikikta, katuktsa ikia hi tysipokzitsiki.

¹⁶ Kasopyk humo ka batu sispirikpobyitsa watsa. Katuktsa kino niwatihi. Nawa katuktsa sopyk humo batu sispirikpobyitsa watsa maha. Mekywatu mykaranaha. Kahumo simysapyrëtsa moziknaha. ¹⁷ Aharerebaba

wasani my. Aharere tisapyrëna. Aharere piwabykynahaze ahumo hyÿ mykaranaha. Ikia harere bo zuba hyÿ mykaranaha.

¹⁸ Ikia tsikpeha mybarawy ezeiksa bo tsiky. Tsikzipehaze mybarawy ezeiksa iksihyrinymyryky iwatahi zikpeha. Uta kino niwatihi, katuktsa zinymyrykynahatsa mysipeha. Utsa bo mysipeha. Iwaze mysihyrinymyrynaha. Aharere baba myzubaha bo mysihyrinymyrynaha iwatahi mysipehaka.

¹⁹ Abaka katuktsa sapyzeken mohyrikosokda. Kytsa pikbezenaha zeka yhyÿ my. Katuktsa pokzi yhyÿ my. Mohyrikosokdaze abo hyÿ maha niwatihi. Mohyrikosokda humo katuktsa kino niwatihi aharere bo hyÿ mykaranaha.

²⁰ Zinymyrykynahatsa soho abo motsasoko. Abaka utsa kytsa zinymyrykynahatsa harere piwabykynahaze kahumo sispirikporëtsa, sityhyryze abo niwatihi mopamykysoko.

²¹ O kazo tsimysitsumuëhÿze sakurëtsa moziknaha mytsaty mytsaty byijataha iwatsahi atsa botu mytsaty mykaranaha. Mywatsa sisopyk. Mywatsa sisopyk zeka sispirikpobyitsa tihi:

— Deus Sesus zipeha — mykaranaha. ²² Kazo tapara azikwy ty kabo nyny tsiky. Ikia wata uta kino kazikwy katuktsa bo nyny iky. Asahi kahumo sispirikporëtsa iwaze kazikwy ty sibo nyny iky. Iwaze mywatsa moziknaha, asa zuba sakurëtsa mykaranaha mywatsa kazo.

²³ Utakta situk yhyÿ my. Ikia katuk yhyÿ tsimy. Iwatsahi sisopyk mywatsa mykaranaha. Mywatsa sisopyk zeka sispirikpobyitsa pe maha:

— Deus kino Sesus zipeha — mykaranaha. Hawa Deus Sesus humo tsimypokzitsiarëta. Deus Sesus tuktsa kino niwatihi tsimypokzitsiarëta iwa motsasokonaha. Mywatsa sisopyk zeka iwa motsasokonaha.

²⁴ O kazo ikia nanabyri izuknihyize ikia zikzipokzitsiki. Tapara mybarawy nizukni kape tsiky:

— Kazikwy ty abo nyny my — tsiky. Abaka zinymyrykynahatsa kaharere piwabykynaha:

— Kazikwy ty abo nyny my — tsimy. Iwa piwabykynaha mytukze mynapykyryknaha.

²⁵ O kazo ikia zuba wasani tsimy kara. Tisopyksapyrëta amysapyrënikita iwatahi kamysapyrënikita tsimy. Kytsa sispirikpobyitsa tu ikia humo batu sihyrinomyry. Uta zuba any, zinymyrykynahatsa kasoho humo sihyrinomyrëtsa. İkia tsikpehahik tahi kahumo sihyrinomyrëtsa. ²⁶ Botu sibo iktsasoko:

— Kazo ikia kahumo tsikpokzitsiki nawa tihi asa bo kino niwatihi tsimy. Asa zuba simypokzitsirëtsa tyharape pokzitsikinaha. Iwa sisopyk. Katsa mywata ahasopyk uta situk kasopyk mytsaty mytsaty byijataha atsa botu mytsaty mykaranaha — Sesus niy.

Iwa Sesus nipamykysoko tsizubarëna tazo tuk zinymyrykynahatsa tsyhyryze nikara. Iwa.

18

Sesus taturukwy.

¹ Kyze Sesus tazo bo nipamykysobaze niparak. Zinymyrykynahatsa tuk itsipa tsibik Kederö inarokota zitsikzakanaha. Ana hwitsa sazik ziparikiknaha ana bo zumukunaha. ² Ana hi zinymyrykynahatsa ziny naha. Ana bo hi Sesus zinymyrykynahatsa tuk pororo ziknakara. Sudas kino ziny. Isopyksapybyita isukyrytsitsa mysioktyhyryk.

³ Atakta Sesus bo niy. Kederö tisaziksapyrëna ibo niy. Sodadutsa, Deus wahoro perytsitsa kino niwatihi Sudas nisioktyhyryk. Taparaktsa Deus wahoro eze ziknapamykysokonahatsitsa, Pariseutsa niwatihi sodadutsa

Sesus bo nisipehakanaha. Sudas isopyksapybyita iwatahi sodadutsa Deus wahoro perytsitsa kino niwatihi ibo nisioktyhyryk. Sodadutsa tahatanoratsa tahabototsa iwa inasibykyknaha. Rika izo tupyryri humo hopok nikaranaha niwatihi zibykyknaha. Sesus bo sizubarêtsa izumukunaha.

⁴ Sesus hawa mykaranaha botu tsihyrinymyrêta. Iwatahi kytsa nisihobykze ispe niy:

— Aty sa tsipiberikinaha — niy.

⁵ — Sesus tsipiberikinaha. Nasare ezekta — nikaranaha.

— Uta hiba Sesus — niy. Sudas imyspihikbatanikita sisukyrytsitsa tuk niriktohoko. ⁶ Nitsasokoze — Uta hiba Sesus — niyze sodadutsa. Iharere ziwabynahaze wytyk bo natsubaiknaha. ⁷ Iwaze Sesus ispezo niy.

— Aty sa tsipiberikinaha — niy.

— Sesus Nasare ezekta — niaha.

⁸ — Batu kawabyhy botu iktsaso uta hiba Sesus — niy. — Tspikberi tsihikiknaha zeka katuktsa ty ka paik paik byitaha iwaze piksinaha — niy.

⁹ Iwa nitsasoko. Nawa botu nitsaso tazo bo:

— Uta iksipokzitsiki asahi kahumo sispirikporêtsa — niy. Iharere wasani atsatu nikara. Iwaze kytsa Sudas tuktsa tihi — O zinymyrykynahatsa ty ka paik paik byitaha — niaha.

¹⁰ Iwaze Simaõ Peduru tasakorotsapu tsizezerêta zibokik. Ziknapamykysokota Deus wahoro zubata tsumuêhîtsa zispizykik. Ispipyryburuk niy. Marakos inarokota. ¹¹ Iwaze Sesus Peduru pe niy:

— Asokorotsapu ty ipesuk bo koroktykta! — niy.

— Niwazubakta katy pokzitsi pokzitsi byity. Uta sinini mynakara. Tubabatu Deus papeu humo ziwatahaka iwa sinini mynakara. Iwa Deus kazo botu nitsaso iwa sinini mynakara — niy.

Sesus Anas bo zioқтыhyryknaha.

¹² Iwaze kytsa Sudas tuktsa Sesus tsipa humo zioқтыhyryknaha. Sodadutsa pehatsaktsa Deus wahoro zubata perytsitsa sizubarētsa iwatsa itsipa humo zioқтыhyryknaha. Zipawarakanaha. ¹³ Niahatsahi Anas taparakta bo zioқтыhyryknaha. Anas Kajapas tsere niy. Kajapas Deus wahoro zubata eze ziknapamykysokonahatsa taparakta my. ¹⁴ Atakta botu nitsaso Sudeutsa pe niy.

— Estuba zuba tsipibezenaha zeka wasani maha. Iwatsahi mytyryktsa ba zik mymybanaha estuba zubata tsipibezenaha zeka wasani my — niy.

Peduru Sesus soho: — Batu kanyhy — mybarapetu nikara.

¹⁵ Kyze Simaõ Peduru Sesus hapik niukuru. Usta zinymyrykyta Peduru tuk Sesus hapik niukurunaha. Taparakta ziknapamykysokota ziny. Atahi iwahoro pe zumu Sesus hapik wahoro isturupeze zumu. ¹⁶ Peduru batu paku ape baze tu hokbowy baze niriktohoko. Iwaze usta izoizo. Wytyk hokbowy perytsata pe niy:

— Katukta tynatsukta! tsimy — niy.

Yhỹ niy.

— Anaeze paku tsimy — perytsata Peduru pe niy. Iwaze nitsuk. ¹⁷ Inatsukze atatsa ipe niy:

— O ikia sa niwatihi Sesus tukta — niy.

— Batu kanyhy — mybarapetu niy.

¹⁸ Tsiwarikrēna. Kytsa sodadutsa tsumuēhītsitsa niwatihi izo zipokoknaha. Kytsa izo baze niakpyzazakaranaha. Peduru situk niriktohoko niakpyzazaka.

Sesus taparakta ziknapamykysokonahatsa bo zioқтыhyryknaha.

¹⁹⁻²¹ Iwaze taparakta ziknapamykysokonahatsa Sesus bo nipamykysoko:

— Hawa sa zinomyrykynahatsa mykaranaha Hawa ha ty sa tsiksihyrinomyryky — niy. Sesus:

— Amy humo sa kaspirikpowy soho tsimy kara Zikwabykynahatsa sihyrinomyrêtsa. Uta iksihiyrynyryky iwatsahi ispetaha. Iktsasokoze aparabaha kaharere ziwabykynaha, anatyhi iksihiyrynyryky. Batu okpitsĩ. Sudeutsa wahoro eze ziknasihyrinomyryky, Deus wahoro zubata eze ziknasihyrinomyryky. Batu amy tohi ty okpitsĩ. Iwahatu kaharere soho zikwabykynahatsitsa bo tsimy — niy.

²² Anas nitsasohoze estuba maku Deus wahoro perytsa ibaze niriktohokota tatsyhyrype ty zioypykik. Ipe niy:

— Iwa taparakta ziknapamykysokonahatsa bo batu tyso. Batu wasani my — niy.

²³ Sesus:

— Kaharere ty wasani ahabyizeka kytsa bo tsimytsasoko. Kaharere wasani my zeka amy skaraba tsikokpykik — niy.

²⁴ Anas Sesus Kajapas bo zioptyhyryknaha. Itsipatsa waraha tatu ibo zioptyhyryknaha.

Peduru Sesus soho: — Batu kanyhy — mybarapetu nikarazo.

²⁵ Iwaze Peduru izo baze niakpyzazaka kytsa baze nidyhykyze wytyk ipe niy:

— O ikia niwatihi Sesus tukta sa — niy.

— O batu. Batu kanyhy — niy.

²⁶ Iwaze usta Peduru pe niy. Atahi taparakta tsumuêhĩtsa. Atahi Peduru zispizykikta tsy. Atahi ipe niy:

— Uta tisaziksapyrêna eze ikozo tawata. Sesus tukta sa ikia bo ikozo — niy.

²⁷ Peduru:

— Batu ba. Batu kanyhy. Aty skaraba Sesus — niy.

Iwa niyze hi kokuaro nipo.

Kytsa Sesus ispehatsa Piratus bo zioқтыhyryknaha.

²⁸ Iwaze Kajapas Sesus tuk nipamykysobaze ispehatsakta wahoro bo zioқтыhyryknaha. Sipehatsa Piratus inarokota iwahoro bo miwa botu zioқтыhyryknaha. Sudeutsa Piratus wahoro bo batu paku zikaha. Mynapupunaha zeka Paskoa eze Sudeutsa ba zik tahadisahanaha. Iwaze hi — Deus okzeka batu simysapy tsimykaranaha — nikaranaha. Maku Sudeutsa byitatu wahoro bo ba zikpupunaha sihumo batu simysapy maha. Paskoa myikaha batu tahadisahanaha mykaranaha. Iwatsahi Piratus wahoro bo ka batu paku zikaha.

²⁹ Iwaze Piratus sibo zoihik. Ape baze tu ispe niy:

— Amy humo sa Sesus kabo tsikzioқтыhyryknaha. Atakta sa batu imysapy tsimykaranaha — niy.

³⁰ Yhÿ nikaranaha.

— Atahi batu imysapy mytsaty tsimykaranaha. Moises harere bo batu yhÿ niy, iwatahi ikia kino ity tsipibeze tsimykaranaha — nikaranaha.

³¹ Piratus:

— Ikiahatsa zuba isoho tsimytsasokonaha. Hawa Moises harere bo batu yhÿ niy ahahyrinymyrÿtsa iwatsahi isoho tsimytsasokonaha — niy.

— Batu. Katsazuba ziky iharapatawyhyta humo ba zibezena. Katsakta iharapatawyhyta humo ba zihyriziknaha. Batu tybeze. Ikia zuba tsipibeze katsakta batu — nikaranaha.

³² Iwa nipamykysokonaha. Sesus botu nitsaso:

— Kytsa iharapatawyhyta humo pihyrizik tsihiknaha iwa pikbezena — niy. Sudeutsa iharere humo batu sihyrinymyry iwa Piratus bo nipamykysokonaha. Sesus harere atsatu nipamykysokonaha.

³³ Iwaze Piratus tawahoro bo pakuzo niy. Kytsa pe niy:

— Sesus kabo tyzioktyhyknaha — niy. Zioktyhyryknahaaze ipe niy:

— Ikia hi ja Sudeutsa pehatsa — niy.

³⁴ Sesus:

— Aharere pe sa tsimykara. Mekta harere pe tu sa tsimykara — niy.

³⁵ Piratus tihi:

— Hawa ha usta mytsaty mykara motsasoko. Utakta Sudeutsa byitatu. Sudeutsa taparaktsa hi ikia kabo zaoktyhyryknaha. Hawa amysapybyita tu tsimykara. Ikia Sudeutsa pehatsa ja hawa tsimy — Piratus niy.

³⁶ Sesus:

— Hawa ikia kytsa tysipeha utakta batu. Hawa apehatsa Sesa inarokota kytsa mysipeha utakta batu. Utakta pipeha zeka ikia wata katyryktsa takyrikinaha, iwaze kasukyrytsitsa mowatsorokonaha iwaze Sudeutsa ba zikoktynaha. Katyryktsaktsa mekywatsa tu maha. Batu Homa tyryktsa byitsawatsa tu — niy.

³⁷ Piratus:

— Ikia hi sa ispehatsa — niy.

— Yhỹ uta hi ispehatsa. Mybarawy ezektsa bo wasania ty mysihyrinymyryky. Asahi ana ty hi hyỹ mykaranaha zeka asahi kaharere bo kino niwatihi hyỹ mykaranaha — niy.

³⁸ — Amy sa wasape — Piratus niy.

Kytsa tihi: — Sesus tabezekta! Iharapatawyhyta humo tabezekta! — nikaranaha.

Iwaze nipamykysobaze Piratus tawahoro ikny zoizo. Sudeutsa pe niy:

— Atakta batu amy tohi ziky iwatahi ba zibeze — niy. ³⁹ Tubabatu tahamyikahakanahaze maku es-tuba myzuke ziknakara iwa sisopyk. Kytsa sizubarẽtsa sakryiukrẽnikitsa hurukwy eze tu mykaranaha. Iwaze ispe niy:

— Aty sa myzuke, Sudeutsa pehakatsa Sesus za myzuke
— niy.

⁴⁰ — Batu ba — kazi nikaranaha.

— Atakta batu myzuke — Opykani kaziu nikaranaha.

— Bahabas tyzukekta — nikaranaha.

— Bahabas sakyriukrēnikitsa hurukwy ezektsa tyzuke-
hikta tsimy tawata hỹ — nikaranaha. Bahabas kytsa
bakatsa niy.

19

¹ Iwaze Piratus sodadutsa pe niy:

— Sesus tytsakihiknahaktsa. Sirara hwyk tsarikihi
tsizezerēna ty tytsakinaha — niy.

Yhỹ niaha. Isukpetara buruk nitsakikinaha. ² Iwaze so-
dadutsa inisaha ty zitsorikeknaha. Ziky my nahaze iharek
humo pu niaha. Iwa nikaranaha. Ispehatsa mekywa
tu sitsorik Sesus zimyijakanaha. Isuk tsahirita ty zuba
korobyk ispehatsa hyritywata nikaranaha. ³ Iwaze ibo
ibaba botu ipe niaha:

— O Sudeutsa pehatsa ja tsimy — zimyijakanaha.
Ziokpypykyknaha.

⁴ Iwaze Piratus zoizo. Kytsa pe niy:

— Iktsa tahaktsa. Ikiahatsa boktahi myzioktyhyryk.
Atakta batu amy tohi nikara batu ziky — niy.

⁵ Iwaze Sesus puke niy. Zoize inisaha ty zitsorikiknaha
Isuk tsazirita tsizezerēta niy. Iwa kytsa sizubarētsa bo
zioktyhyryk. Piratus ispe niy:

— Iktsa tahaktsa kytsa! Tah ihumo batu ahamypokzit-
siuk — niy.

⁶ Ibo iktsa niahaze kazi nikaranaha:

— Tabezekta! Iharapatawyhyta humo tabezekta! —
nikaranaha.

Taparaktsa Deus wahoro eze ziknapamykysokonahatsa, Deus wahoro perytsitsa kino niwatihi opykani kazi nikaranaha.

— Tabezehikta tybezehik tsimaha — nikaranaha. Piratus tihi:

— Ikihatsa kino kabo tsikzioktyhyryknaha. Ikihatsa hi tsipibezenaha. Atakta wasani mytsaty mykara. Iwatahi batu pibeze. Tsimysapyrêta hi batu pibeze — niy.

⁷ — Katsa tabeze zeka wasani hỹ. Iharere batu imysapy my. “Utakta Deus tse” botu nitsasoko iwatsahi tabeze zeka wasani my. Moises harere humo wasani my — nikaranaha.

⁸ Nitsasokonahaze:

— Atakta Deus tse — Piratus ana ziwabyze iharere pokso tsipybyrêta. ⁹ Iwaze tawahoro bo pakuzo niy. Iwaze Piratus Sesus pe niy:

— Hana iknykta sa ikia — niy. Sesus batu harere.

¹⁰ — Amo skaraba batu harere ziky — niy.

— Hawa motsasoko kytsa kaharere bo hỹ mykaranaha. Mysipeha zeka kytsa pasukenaha atsipatsa warawy ty satsuk maha niy. Mysipeha zeka “Tabezekta”. Kytsa iharapatawyhyta humo pahyriziknaha iwa pabezenaha. Ana humo hi tsihyrinymyrêta — Piratus niy.

¹¹ Sesus:

— Amy ty tsimytsasoko kytsa aharere bo hỹ mykaranaha. Aharere wasani my. Deus humo kytsa aharere bo hỹ mykaranaha. Deus abo yhỹ ahabyi zeka aharere bo kytsa batu ma zikaha. Batu kabo tsimy. Tsipikbezenaha zeka Deus okze ka batu amysapy tsimy. Kytsa asahi abo zikoktyhyryknaha Deus okzeka simysapybyitsa babatsa mykaranaha — niy.

¹² Ana ziwabykyze nizuke tsihikik. Sudeutsa taparaktsa kazi nikaranaha.

— Sesus tsimyzuke zeka Sesa pehatsa harere bo batu yhỹ tsimy, Sesa pehatsa nanabyitaba zipaha. Aparakbaha

motsasokonahaze “Ikia mypehatsa”, Sesa Homa ezektsa pehatsa takyri, iwatahi Sesus tsimyzuke zeka Sesa pehatsa harere humo batu yhỹ. Tsimyzuke zeka Homa pehatsa ikia humo takyri — nikaranaha.

¹³ Siharere ziwabyze Sesus ape bo zioқтыhyrykzo. Myzubaha bo zoizo. Iwaze Piratus kytsa harerewabykywy bo niy anaeze tadyhywy bete nidyhyky. Anaka Kabata Sudeutsa harere inarokoha. ¹⁴ Tokbaha niyzikze sesta-peira eze niy. Sudeutsa myikaha nakymysohoze niy. Iwaze Piratus tihi:

— Atakta ahapehatsa — niy. Iwa Piratus Sudeutsa pe niy.

¹⁵ — Batu, tabezehik nikaranaha. Ihumo tahakyrikinaha “Tabezekta” kazi nikaranaha. Iharapatawyhyta humo tabezekta! — nikaranaha.

— Ahapehatsa iharapatawyhyta humo pihyrizikik iwa pibezenaha. Iwa sa tsimyzehikiknaha — niy.

— Yhỹ. Katsa mypehatsa estuba zuba. Sesa zuba mypehatsa — nikaranaha.

¹⁶ Iwatahi Piratus sodadutsa pe niy — Sesus iharapatawyhyta humo tsipibezena — niy. Iwaze zioқтыhyrykzonaha.

Sodadutsa Sesus iharapatawyhyta humo zihyriziknaha iwa zibezenaha.

¹⁷ Myzubaha pauk baze hara bo zioқтыhyryknaha. Hara iharekpokoso inarokota Sudeutsa harere kokokta my. Sesus iharapatawyhyta tasukara bete zibykyryk. Hara bo zumunaha.

¹⁸ Anabo izumunahaze iharapatawyhyta humo it-syhyry soik eze zihyriziknaha. Ipyrytsa humo niwatihi zihyrizikiknaha iwa niaha. Zikymynahaze iharapatawyhyta zitseknaha. Ituk makutsa petoktsa nisibanaha. Siharapatawyhytsa humo nisibanaha. Nataba natabaha.

¹⁹⁻²⁰ Kyze Piratus usta pe:

— Tsiwatahakta! niy. SESUS NASARE EZEKTA SUDEUTSA PEHATSA — niy. Anahi Sudeutsa harere hi ziwatahaka. Kereko harere niwatihi ziwatahaka. Ratĩ harere kino niwatihi ziwatahaka. Ziwatahabaze iharapatawyhyta Sesus harapu bete zihyrizik. Ana parakbaha pinynaha. Iharapatawyhyta Serusarẽhe pauk baze parakbaha iwataha zinykynaha. Siharere ziwatahaka — Sesus Nasare ezekta Sudeutsa pehatsa — niy.

²¹ Iwaze taparaktsa Deus wahoro zubata eze ziknapamykysokonahatsa Piratus pe niaha:

— “Sudeutsa pehatsa” tsiwatahakanaha batu mykparawy tsimaha. Tsipiwataha zeka. “Atakta botu nitsaso Sudeutsa pehatsa niy” iwa zeka yhỹ tsimaha — niaha.

²² Piratus:

— Batu. Hawa botu iwataha nahaka niwatihi — niy.

²³ Kyze sodadutsa Sesus iharapatawyhyta humo zihyrizikbanahaze isuk botu zibokiknahaze ziaksenaha. Jokboha zisysykyryknaha napetok napetok niaha. Estuba isuk tisapyrẽta ana hi sodadutsa nizihikiknaha.

²⁴ Iwatsahi asa zuba nipamykysokonaha:

— Na ty ka syk syk byitaha! Harahareziptyryktsa tahapaparanahaktsa kytsa, aty ja isuk piakse tsahi mybo piwatawy — iwa asa zuba nipamykysokonaha. Asahi yhỹ nikaranaha. Iwaze harahareziptyryktsa nisipaparakanahaze estuba zuba isuk tisapyrẽta ziaксе. Tubabatu Deus harere papeu humo botu ziwataha:

— Kasuk ty metutu nikaranaha.

Estuba kasuk ty harahareziptyryktsa mysipaparanaha — niy.

Iwa tubabatu ziwatahaka, aba atsatu sodadutsa niaha.

²⁵ Iwaze kykyryk iharapatawyhyta pauk baze niriktotohokonaha Sesusje, atatsa taeky tuk. Karapas oke

Maria inarokotatsa niwatihi. Maria Madarena niwatihi situk niriktohoko. Sizubarêza iharapatawyhyta pauk eze niriktotohokonaha.

²⁶ Sesus taje bo iksa niy. Zinymyrykyta atahi Sesus ihumo tsimypokzitsiarêta atatsa baze niriktohoko. Iwaze Sesus taje pe niy:

— Atahi atse mozik. Atahi taje zipokzitsiki nahawahi papokzitsi hỹ — niy.

²⁷ Iwaze zinymyrykyta pe niy:

— O atatsa aje. Ikia aje baba tatsa wa tsipokzitsi — iwa niy. Sesus nihyrikosokdaze zinymyrykyta Sesusje tawahoro bo zioқтыhyryk. Iwahoro eze ziknapykyryk, ije watatsa niyzik.

Sesus nihyrikosokda.

²⁸ Kyze Sesus tahyriziktsokzawy zepykbase ana humo hi tsihyrinymyrêta. Iwaze hawa tubabatu Deus papeu humo isoho ziwatahaka, atsatu nitsasoko:

— Karapukrêta — niy.

²⁹ Anaeze duabohotsa tsik itsârâkbara ty morosuk eze ky ty tsikok niy. Kytsa mazori waha ty humo duabohotsa tsik bo tsikuk tsikuk niaha. Iwaze mazori hyritywaha ty hwi humo zitsihibunaha iwaze zidokonaha. Iparikiha sazik ty isope inarokoha. Iwaze jobo Sesus sak bo tsyk tsyk nikara. ³⁰ Iwa duabohotsa tsik itsârâkbara tu ziku. Iwaze nitsaso.

— Aba pomozaka. Kahyriziktsokzawy zipykba. Deus kape nikara naha zipykba. O Deus mohyrikosokdaze wasani my ikia kahumo tsamypokzitsiarêta — niy.

Iwaze taharek ty tyk bo harapusiri niy. Iwa nihyrikosokda.

Sodadu tanora hyritywata ty ipektsa baze ziskoik.

³¹ Kyze taparaktsa Sudeutsa Piratus pe niaha:

— Kytsa asahi siharapatawyhytsa humo nisihyrizikik-nahaze mybyrykywy pomoze ba zik sereknaha siharapatawyhytsa humo mysereknaha zeka batu isapy mytsaty tsimykaranaha. Iwatahi sodadutsa pe tsimy. “Asahi siharapatawyhytsa humo tsikyrizikiknaha tysek-tsaharakiknaha” iwaze atsoko ziakbanaha. Iwa byiri sabado siharapatawyhytsa humoktsa mahani. Sinurytsa ty mysibykyknaha mybyrykywy sabado suk-mobyitu — nikaranaha. Iwa nitsasokonaha sesta-peira eze. Byriri sabado zumuze tabyrykywy Sudeutsa mykahakawy zumu. Iwatsahi asahi siharapatawyhy humoktsa nasispik tsihikiknaha sabado suk-mobyitu my.

³² Iwatsahi sodadutsa siharapatawyhy humoktsa bo niukurunaha. Sibo zumunahaze tapara estuba maku zekt-saharakiknaha. Usta ty kino niwatihi zektsaharakiknaha. ³³⁻³⁷ Iwaze Sesus bo zumunahaze. Botu zumuza.

— Atakta botu zumuza — asa zuba nipamykysokonaha. Iwatsahi batu tyektsaharak. Tubabatu Sesus soho Deus harere papeu humo ziwatahaka:

— Batu typoiktsa harak. Estuba zuba batu typoiktsa harak — niy.

Iwa tubabatu ziwatahaka. Hawa ha ty botu ziwatahaka atsatu sodadutsa nikaranaha. Iwaze sodadu tanora ty ipektsa baze ziskoik. Ziskoikze ispu zipoko niy. Pihik tuk tu zipoko niy. Tubabatu Sesus soho Deus harere papeu humo ziwatahaka:

— Kytsa iskohokta bo iktsa mykaranaha — niy.

Iwa ziwatahaka. Sodadutsa ziskoiknahaze ana soho humo hi batu sihyrynimyry iwatsa tu Deus harere bo hyÿ nikaranaha.

Utakta Sesus nihyrikosokdaze ibo iktsa iky. Ana hi pykyhytu iktsasoko. Wasani niy. Ikiyahatsa bo nihyrikosokdata soho iktsasoko iwahatu ikiahatsa kino ni-

watihi ihumo ahaspirikporêtsa. Ana hi iktsasoko wasani hiba. Kahyrinymyrêta hÿ.

Sose, Nikodemus ahatsa Sesus nury nitsahoroknaha.

³⁸ Kyze Sose Arimeteja ezekta Piratus bo zumu. Sose Sesus humo tispirikporêta zinymyrykyta. Batu tyso. — Utakta Sesus harere bo hyÿ ikykara ihumo kaspirikporêta — Sudeutsa pokso batu tyso. Tsipybyrêta. Atahi Sesus zispirikpoko. Atahi Piratus pe niy:

— O Sesus nury ty uta kabokta! — niy.

— Yhÿ. Inury tynazipikta — niy. Kyze inury inazipikze iytyk bo zibykyknaha.

³⁹ Nikodemus Sose tuk, atahi jokmorênikia tsizubarêna zebykyryk. Tirîta sîko kiros jokmorênikia zebykyryk. Jokmorênikia mira hwi soporo iwaze aroes wihara soporo itsakykyha. Tsokmorêna. Anahi zibykyknaha. Tubabatu Nikodemus Sesus bo nipamykysoko. Sesus atazuba tabo unata eze inakozoreze.

⁴⁰ Sesus nury nazipiknahaze panu ty ziakwarakanaha. Inury bo jokmorênikia ty ziharasusunaha. Iwa Sudeutsa sopykwy.

⁴¹ Sesus iharapatawyhyta humo zihyrizikiknaha eze hwitsa sisaziksapyrêtsa my. Anaeze iytyk ezytyk niy. Batu aty tohi humo iwihihukbara. ⁴² Nubaze sesta-peira Sudeutsa tahadisahawy humo nikaranaha sabado suk-mobyitu nikaranaha. Sabado eze ka tahabyri nepykyryknaha. Byri ziktahabyrykynaha. Iwaze iytyk ezytyk tykarawa tu anaeze nitsahukarenaha. Sesus iytyk bo zihoeKarenaha.

20

Sesus ytyk tsarawybara niapykyryk.

¹ Kyze zokorobyitu Maria Madarena iytyk bo niukuru. Miwa botu domiko eze atatsa iytyk bo zumuku. Zumuze harahare ihokbowy hana bo ja, sukyhy zikare niy.

— O aty sa inury zibykyk — mytsaty nikara. ²Iwatatsahi atsoko Peduru bo ziksizo. Utakta Sesus zinymyrykyta kahumo tsimypokzitsiarêta kabo niwatihi ziksizo. Ziksi-zoze. Atatsa:

— Kytsa Sesus nury zibykyryknaha. Hana bo ja. Iytyk batu tsarawyky niy. Hana bo sa zebykyryknaha — niy. Iwa makutsa petoktsa bo nitsasoko.

³ Iwaze Peduru itukta iwa atsoko iytyk bo nitururuknaha. ⁴ Petoktsa iytyk bo nitururuknaha. Uta hi Peduru haraze ikpararakak. Tapara iytyk bo ikumu. ⁵ Ikumuze iytyk bo iktsa iky, okmymy ikyze panu iakwarawy zuba nizozohoko ana bo zuba iktsa iky. Utakta batu paku. ⁶ Iwaze Simaõ Peduru iytyk bo zumuze. Atsoko iytyk bo zekeba. Panu bo iktsa niy. ⁷ Usa panu bo iktsa niy. Panu nihyrikosokdata iharekwarawy bo iktsa niy. Usa panu ka meky botu niapykyryk. Inury ykwarawy ka bara botu niapykyryk. Inury hana bo ja niy. ⁸ Utakta tapara iytyk bo ikumu. Iwaze uta kino niwatihi iktsuk. Ikozoze:

— Inury hana bo ja Sesus inahyryzikpo — atatuke iky. Iwatahi Sesus humo kaspirikporêta.

⁹ Tubabatu Deus harere papeu humo botu ziwatahaka:

— Sesus siakbatsa tukze Deus zihyryzikpowy — niy. Zinymyrykynahatsa anaharere humo tshokdharêna niy. ¹⁰ Kyze katsa zinymyrykynahatsa bo tsiksizonaha.

Sesus Maria Madarena bo natahaha.

¹¹ Kyze Maria Madarena iytyk bo niukuruzo. Atatsa iytyk baze nipuziuku. Nipuziukutatsa tu iytyk bo zikt-sutsu niy. ¹² Bijoikpe iknyktsa Deus tsumuêhîtsa petoktsa bo iktsa niy. Sisukbarazarêtsa. Sesus nury sapy eze

nidyhydyhykynaha. Estuba iharek sapy taba nidyhyky. Usta ipyrytsa sapy taba nidyhyky.

¹³ Ipe niaha:

— Amo skaraba tsimopuziuku — niaha. — Kapehatsa nihyrikosokdata nury zibykyknaha. Hana bo ja zibykyknaha — niy. Iwatatsahi pipokzitsiki.

¹⁴ Iwa nitsasokoze tasukpe bo uwok niy. Sesus ibaze niriktohoko. Ibo iktsa niy. Ihyritsik humo inyhybyitawano. Sesus batu inyhy. ¹⁵ Atahi ipe niy:

— Amo skaraba tsimopuziuku. Aty sa tsipiberiki — niy. Atatsa kino isazikperytsa ja niy. Iwatatsahi ipe niy:

— O aty sa zibykyk tsibykyryk zeka ikza kabo ky. Ikza mekybotu piytykzo — niy.

¹⁶ — O Maria — niy.

Iwaze zinyziu.

— Raboni — niy. Sudeutsa harere ka. — Kapokzitsitsa — piwatawyky.

¹⁷ Sesus ipe niy:

— Katy paik paik byityktsa! Kazo bo ka batu kado. Katuktsa bo tynakozorektsa! “Sesus jobo modo. Kazo bo modo.” Kazo Deus ikiahatsa kino niwatihi ahazo Deus tihi “Myzo Deus”. Iwa katuktsa bo tsimy — niy.

Yhỹ niy.

¹⁸ Iwaze Maria Madarena niparak. Zinymyrykynahatsa bo zumuze ispe niy:

— O Sesus iny. Inahyrizikpo. Abahi jo bo Deus bo modo. Ata hi ipokzitsihi. Katsa kino niwatihi Deus myhumo tsimypokzitsiukrêta — niy.

Sesus tuk zinymyrykynahatsa bo natahaha.

¹⁹ Zunubakaze Sesus tatuktsa bo. Domiko eze sibo zumu. Asahi wahoro bo inakypykbanahaze. Tahahok-bowy zitsykykiknaha. Sudeutsa taparaktsa pokso sipy-byrêtsa nikaranaha. Iwaze Sesus sibo natahaha ispe niy:

— Ahapybybyihuktsa. Ahapunihikuktsa kytsa! — niy.

²⁰ Tapapepe humo ky ziwatawyky. Tapektsa humo ky ziwatawyky. Zinymyrykynahatsa sakurêtsa nikaranaha. Tahapehakatsa bo nikozonehaze sakurêtsa niyziknaha.

²¹ Ispezo niy:

— Ahapunihikuktsa ahapyby byihu ja kytsa! Tapara kazo mybarawy ezektsa bo zikpeha. Uta kino niwathi, utakta myzahapehaka. Myzubaha bo kasohe tsimyt-sasonaha iwatahi myzahapehaka — niy.

²² Iwaze Sesus sibo huhu nikara. Ispe niy:

— Deus hyrikoso ikiahatsa tuk mynapykyryk.

²³ Tsimytsasonaha zeka sizubarêtsa pe: “Ahamysapybyri Deus pahaokzohik” tsimykaranaha. Deus simysapybyri siokzohik. Tsimytsasonaha zeka kytsa pe: “Deus ahamysapybyri batu pahaokzo” tsimykaranaha. Deus simysapybyri ba ziksiokzo. Deus simysapybyitsa tu ba zikspiriktsokda my — niy.

Sesus Tome iwa.

²⁴ Iwaze zinymyrykyta Tome inarokota niy. Usta inarokota beketsa niy. Atahi Sesus batu inyhy. Sesus zinymyrykynahatsa bo izumuze Tome batu situk dyhy niy. Sesus inahyrikpoze Tome batu inyhy. ²⁵ Iwatsahi ustsaha ipe niy:

— O Tome katsaktsa mypehakatsa tsinynaha — niaha.

— Batu ma. Ipapepehyrizikwy sapy bo katsyhyry ty kuruk ahabyizeka ba ma ziky. Nataba tanora sapy bo katsyhyry ty kuruk ahabyizeka ba ma ziky — iwa ustsaha zinymyrykynahatsa bo Tome nitsaso.

²⁶ Kyze mytsyhyrytsa wa zuruze Sesus tuktsa wahoro bo izumubazonaha. Tome situk niapykyryk. Wahoro tahahokbowy zitsykykiknaha. Atsoko Sesus sibo natahaha. Sesus zinymyrykynahatsa pe:

— Ahapunihiktsa kytsa. Ahapybybyihuktsa! — niy.

²⁷ Iwaze Tome pe niy:

— Pany! Katsyhyrype bo iktsa tykta. Na katsyhyrype hyrizikwy sapy bo atsyhyry ty kuruktykta. Na kaskowy tanora sapy bo atsyhyry ty kuruktykta. “Sesus nihyrikosokdata ba ziknahyrizikpo” ana ty hi sosobyity tsimy. Kahumo aspirikpokta! — niy.

²⁸ Tome:

— Ikia kino kapehatsa tsimy. Ikia humo kaspirikporëta hỹ. Ikia hi Deus babata — niy.

²⁹ Sesus ipe niy:

— Tsikny taowy kahumo aspirikporëta. Wasani my. Usta kytsa katy nyahabyitsatu kahumo sispirikporëtsa. Asa hi sakurëtsa babatsa — niy.

Abaka pepykbaka.

³⁰ Sesus tazikwy ziwatawyky. Zinymyrykynahatsa izikwy bo iktsa nikaranaha. Izororohotsa bo iktsa nikaranaha. Anasoho ba ziwataha. Papeu humo sisoho ty batu tywataha. ³¹ Hawa Sesus zikwy zororotsa soho tsikaeni zuba ziwatahaka. Anasoho ziwatahaka iwatahi pahaspirikpoko Sesus Deus tse. Deus Sesus zipehata pahaspirikpoko. Ana humo hi ahaspirikporëtsa zeka mekywatsa tu tsimoziknaha. Ihumo ahamysapyrëtsa tsimoziknaha. Ihumo ahaspirikporëtsa zeka tsimyhyrikosokdana-haze tsinahyrizikponaha. Iwaze Deus tuk ahawahi tsimynapykyryknaha.

21

Sesus sete zinymyrykynahatsa bo natahaha.

¹ Kyze Sesus tuk zinymyrykynahatsa bo inatakahazo. Pihikzotsabyri baze sibo izumu. Pihikzotsabyri Tiberiades inarokoha. Anaeze sete ahatsa ituktsa zitsikparakanaha.

² Peduru, Tome, Natanieu, Suão, Tsiaku, ustsã petoktsã iwatsã situk nikaranaha. ³ Peduru ispe niy:

— Pihik pitsikpapara — niy.

— Yhÿ! Katsã ikia hapik — niaha. Haramwe zunubakaze kokorohyk. Turi turi turi niaha. Zitsikpaparakanaha. Batu istyzo.

⁴ Kyze zokorobyitu Sesus pihik sak eze niriktohoko. Tsaraha bytykarawa tu niy, Sesus pihik sak eze niriktohoko. Zinymyrykynahatsã nikozonehaze:

— O aty skaraba.

O batu mynyhy — nikaranaha. ⁵ Iwaze Sesus huahua niy:

— Tsiknasizokonaha sa kytsã! — niy.

Batu niaha.

⁶ — Tõhõryk ty nataba tsioktsokzonehaktã! Abaka tsinasizonaha ty — niy.

Iwaze tõhõryk ziochtsoknaha. Abaka tõhõryk piknutsã tsakyrik humo, ba zikzizonaha. ⁷ Iwaze uta inymyrykyta Sesus kahumo tsimpokzitsiarëta Peduru pe iky:

— O mypehakatsã Sesus — iky. Peduru ziwabyta takpyzazawy ty korobyk niy. Tahyrikzitsokzawy humo awani nikarata iwaze takpyzazawy zikorobykze pihik bo nioktsok. Sesus bo atsoko uruk uruk nikara.

⁸ Ustsaktsã mahani. Tõhõryk zikyrikinaha. Tisakyrikrëna. Tsaraha imyrazata bytykara wata nowëta metros zuba niy. Nakpo bybybyu niaha. Tahatsaraha piknutsã ty nasihareknaha. ⁹ Nakpo tsaraha ekze nizuknahaze izo bo nikozonehaha. Sesus izo bete piknutsã nisizoko sizubabyitsã tu. Atsikara niwatihi.

¹⁰ Sesus tihi:

— O piknutsã ty puëtsik kabo wabehyryk tynaha — niy. Yhÿ Peduru niy.

¹¹ Iwaze Peduru tsaraha bo takoro, piknutsã tõhõryk eze inasikyriki:

— O inahareknaha — niy. Piknutsa sizubarētsa n-sizokonaha. Sēto sīkuēta teres piknutsa sizubarētsa nikananaha. Inahareknahatsa tu tōhōryk batu tuzu.

¹² Sesus:

— Parany! tyzahadisahanaha kytsa! — niy.

Yhỹ niaha. Zinymyrykynahatsa batu — Aty sa — niaha.

¹³ Mynyhy tihi Sesus atsikara ty sibo nyny niy. Piknutsa ty kino niwatihi. Tahadisahakanaha.

¹⁴ Abaka Sesus tuk zinymyrykynahatsa bo harakykbyi inahyrizikpota inatakaha.

Sesus Peduru ahatsa.

¹⁵ Kyze Sesus Simaō Peduru pe niy, atahi Suão tse iwaze Sesus ipe niy:

— Simaō ikia sa kahumo tsamypokzitsiarēta — niy.

— Yhỹ. Uta atukta babata my — niy.

— Kaharere ty katuktsa tysihyrinymyrykta. Hawa hozipyrykzatsa tsihitsa siraratsa tysipokzitsiki iwa ikia katuktsa humo tynasipokzitsiki.

¹⁶ Sesus ipe niyzo:

— Simaō kahumo sa tsamypokzitsiarēta babata tsimy — niy.

— Yhỹ utakta atukta babata my — niy.

— Kaharere katukytsa bo tysihyrinymyrykta! Hawa hozipyrykzatsa tsihitsa siraratsa tysipokzitsiki iwa katukytsa humo tysipokzitsi — niy.

¹⁷ Sesus ipe niyzo:

— Simaō ikia sa kahumo tsamypokzitsiarēta babata tsimy — niy.

Iwaze Sesus nitsasokoze — Ikia sa kahumo tsamypokzitsiarēta — atsa tyty harakykbyi Peduru pe niyze tisukat-sihikrēta niyzik. Peduru:

— O kapehakatsa tsahyrinymyrëta hiza. Ikiakta tsiknyba hỹ. Utakta ahumo kamypokzitsiarëta. Ana humo hi ahyrinymyrëta — niy. Sesus:

— Kaharere ty za katukytsa tysihrinymyrykta! Hawa hozipyrykzatsa tsihitsa siraratsa tysipokzitsiki ikia iwa katukytsa humo hi tysipokzitsiki hỹ. ¹⁸ Wabyziutykta. Simaõ mykyryburukta zikzurukuze asuk ty korobykyk ziknakaraze paikpa ziknakara hỹ. Ikia tsimytsaikbaze usta atsipatsa mysakwara. Akparawy bara bo paoktyhyryk-naha — niy.

¹⁹ Iwa Peduru pe niy. Peduru mora naha soho nitsasoko. Ipe niy:

— Tsimyhyrikosokdaze kytsa sizubarëtsa motsasokon-aha “Deus hi Peduru zipunihikwky hỹ. Iwatahi mohyrikosokdaze batu ipyby. Deus imysapyrëta hỹ” mykaranaha — niy. Hawa Peduru mohyrikosokda naha soho botu ibo nitsasoko.

Iwaze ipe niyzo:

— Kaharere bo hyỹ tsimykta! Kapik tynao — niy.

Hawa Sesus kasoho nitsasoko.

²⁰ Kyze Peduru uwok niyze kabo iktsa niy. Utakta zinymyrykta Sesus kahumo tsimypokzitsiarëta. Uta Peduru sukpe baze ikziktohoko. Tapara Sesus nihyrikosokda katsa ituk amyikaha eze tuze uta zuba ipe iky:

— Aty skaraba asukyrytsitsa bo paoktyhyryk — ikykara. Aba Peduru kabo iktsa niyze ta tihi:

²¹ — Hawa sa ipe tsimy — niy.

²² Sesus:

— Batu ityso. “Hawa sa ipe tsimy”. “Uta sa Deus harere bo zuba yhỹ my” tsimy. Iwa tsimy hỹ — niy. — Utakta motsasoko zeka “Atakta ba zikyrikosokda, atahi myziksizoze motare”. Wasani my. Ikia kino kaharere bo zuba hyỹ tsimykara. Utsa soho bo batu paikpa mytsaty

tsimykara. Kaharere bo zuba hyÿ tsimykara. Ikiã humo wasani tsimyzeãa kaharere bo zuba hyÿ tsimykara.

²³ Kyze Sesus tuktsã asa zuba nipamykysokonaha:

— Atakta ba zikyrikosokda, Sesus myziksizoze ispitu my — nikaranaha.

Iwa Sesus batu tyso. — “Atakta ba zikyrikosokda” tapara nitsaso “motsaso zeka atakta ba zikyrikosokda atahi myziksizoze motare” — iwa nitsaso. Batu siwabyzi-uhu.

²⁴ Zinymyrykyta Sesus kahumo tsimypokzitsiarëta piwatahaka. Hawa ha ty piwatahaka naha wasani my. Utakta Sesus harere ahabo motsasoko.

Abaka nepyk.

²⁵ Sesus tsizubarëna ty nikara. Iokboha zuba papeu humo ziwataha. Nanabyi soho ziwataha zeka abazuba papeu humo ba zikpyk. Ziwatahaba zeka papeu zikpykba. Niwazuba. Suão.

Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

